


EX MUNIFICENTIA
FERDINANDI III. M. E. D.
DIE 3. IUNII 1791.

15.7.501

~~15.7.501~~
15.7.501.





COGITATIONES RATIONALES
DE
DEO,
ANIMA, MUNDO,
ET
ENTIBUS
IN GENERE
SPECTATIS.



Stutgardiae,
Literis & impensis Jenischianis.


1 7 5 2.







Præfatio.



Ides, BENEVOLE
LECTOR! *Cogita-
tiones Rationales de
Deo, Anima, Mundo*

*& Entibus in genere spectatis; non quidem
novas illas, sed ex Institutionibus Philo-
sophiæ Wolffianæ Thümmigianis separa-
tim recusas, ita quidem, ut pauca fue-
rint immutata, pauca etiam è Dilucida-
tionibus*

tionibus Bilfingerianis adjecta. Eo omnia
fine, ut & ad docendum & ad di-
scendum fierent magis adcommodatae.
Id etiam monendum, quod paragra-
phi e Logica citatæ respiciant *Com-*
pendium istud Logicæ, quod in usum pu-
blicum Scholarum Würtembergicarum est
adornatum. In fine libelli adspersæ sunt
etiam *Definitiones* præcipuæ per omnia
Metaphysicæ capita, ut ad ediscendum
Tironibus essent paratiores. Faxit Deus,
ut favente ipsius gratia etiam hicce labor
in sui Nominis gloriam, & litterarum ce-
dat incrementum. Dat. Stuttgartiæ d.
XV. Cal. Mart. MDCCLII.



DE
METAPHYSICA
IN GENERE EJUSQUE
PARTIBUS.

CAP. I.

§. 1.

PHILOSOPHIA, in genere, *Def. Philosophia.*
est scientia rationes atque causas rerum quæ sunt atque fiunt; cur & quomodo ita potius sint atque fiant, & non aliter, ex principiis indubitatis demonstrandi. (Log. §. 18.) Philosophus ergo ille dicendus est, qui habitum possidet, causas & rationes rerum, quæ sunt atque fiunt, ex principiis indubitatis demonstrandi (Log. §. 19.) *Def. Philosophus.*

§. 2.

Objectum ergo Philosophiæ *Objectum Philosophia.*
sunt res omnes, quæ sunt atque fiunt;
A unt;

unt, vel fieri possunt. Quodsi hæc objecta specialius determinantur, deprehendimus 1. *Corpora*, quæ omnia simul sumta Mundum hunc corporeum constituunt; cum vero multa de Mundo corporeo in genere dici queant, exinde emergit *scientia*, quæ agit de Mundo generatim spectato, & adpellatur *Cosmologia*. 2. *Animas*, quas itidem in generalibus earum conceptibus considerare licet, ut adeo rursus nova exinde condi queat *disciplina*, quæ agit de *Anima*, iisque quæ in anima contingunt, & *Psychologia* adpellatur. A corporibus atque Animabus adscendere licet ad utrorumque originem atque conditorem 3. *Deum*; omnia illa, quæ ductu rectæ rationis de Deo cognoscere licet, si iusta methodo in unum congeruntur, novam fundunt *disciplinam*, quæ ea tradit, quæ ductu rectæ rationis cognosci de Deo possunt, & *Theologia Naturalis* adpellatur. Cum autem hæc tria 1. *Corpus*, 2. *Anima*, 3. *Deus* in uno aliquo conceptu genera-

Def.
Cosmologia.

Def.
Psychologia.

Def.
Theologia
Nat.

neralissimo convenient, Entis sc. conceptu, adeoque generalissima inde abstrahere liceat, quartam acquirimus *Disciplinam*, quæ *scientiam Entis ingenere* tradit, & *Ontologia* nominatur.

Def. Ontologia.

§. 3.

Ontologia, Cosmologia, Psychologia & Theologia Naturalis uno nomine dicuntur *Metaphysica*. *Metaphysica ergo est scientia de Deo, Anima, Mundo & Entibus in genere spectatis.* (Log. §. 33.)

Def. Metaphysica.

ONTOLOGIA.

CAP. II.

De summis Cognitionis humanæ Principiis.

§. 4.

Summum Principium subjectivum, ipsa indole & naturâ intellectus humani nixum, ita exprimitur: *Quidquid cogitari vel concipi non potest, illud etiam non est.* Vel plenius: *Quidquid cogitari vel concipi*

Summum Principium Cognoscendi Subjectivum.

cipi ut possibile non potest, illud etiam non est possibile; & quidquid cogitari vel concipi non potest, ut existens, illud etiam non est existens.

§. 5.

Possibile.

Impossibile.

Possibile ergo est, quod cogitari vel concipi potest; Impossibile vero est, quod cogitari vel concipi non potest, ex.gr. Circulus quadratus. Ita absolute s. interne quid possibile vel impossibile dicitur.

§. 6.

*Summa
Principia
objectiva.*

*Contradi-
ctio.*

*Principium
Contradi-
ctionis.*

Interno autem sensu quilibet id experitur, quod indoli & naturæ humani intellectus nihil tam repugnet, quam cogitare simultaneam ejusdem rei affirmationem & negationem. Ejusdem de eodem simultanea affirmatio & negatio dicitur Contradictio. Hinc summum Principium humanæ cognitionis Objectivum ita effertur: Nihil potest simul esse & non esse. Pendent ab hoc Principio veritates necessariae; infra explicandæ. Possibile ergo est, quod contradictionem non involvit; Impossibile, quod involvit.

§. 7.

§. 7.

Si vero ad actualia transgressi
 rursus ad indolem & naturam in-
 tellectus nostri attendimus, faci-
 le experiemur, quod Ens aliquod
 existens A. cogitari aliter nequeat,
 nisi simul etiam concedamus aliud
 quoddam Ens B. quod 1. sufficien-
 tibus polleat viribus ad istud pro-
 ducendum; 2. vires istas ad pro-
 ducendum adplicet, & 3. in ad-
 plicando non impediatur. Hinc
 enascitur alterum humanæ Cogni-
 tionis *Principium Objectivum*, ad
 veritates contingentes, infra ex-
 plicandas, relatum, quod ita ef-
 fertur: *Nihil est sine ratione suffi-*
ciente.

Principium
Rationis
Sufficientis

§. 8.

Ratio ergo est id, ex quo intelligi
 potest, quare alterum sit; vel: est
 id, quod responsionem præstat in-
 telligibilem ad quæstionem, quare
 res sit, sit potius, quam non sit, sit
 hoc modo, non alio? Sufficiens illa
 est, quousque nihil est in re, quod
 non ex ea ratione intelligi possit,

Def.
Ratio suffi-
ciens.

A 3

quare

quare sit ? Atque sic est sufficiens ad hoc, ut res vel actio *possit* fieri, si ad possibilitatem rei vel actionis non plus requiritur, quam adest. Est sufficiens ad hoc, ut *fiat*, si ad actualitatem rei præstandam non plus requiritur, quam adest. Est sufficiens ad hoc, ut *debeat fieri*, si ad inducendam obligationem non plus requiritur, quam adest. Est sufficiens ad hoc, ut *liceat*, vel *non liceat*, si ad evitandum in actione, aut inducendum per actionem reatum, non plus requiritur, quam adest ; & sic porro.

§. 9.

*Cautiones
circa Prin-
cipium Sub-
jectivum.*

Præmissimus ita summa humanæ cognitionis Principia. Quoad subjectivum notandæ sunt cautiones quædam sequentes.

1. Quodsi quid daretur, quod nihil involveret contradictionis, & nihilominus cogitari à nobis non posset, eo casu suspicio esset, dari posse Spiritum aliquem perfectiorem, qui majore gaudeat intellectu, ita ut & istud cogitare valeat.
2. Quamdiu autem nos ipsi nondum sufficienter certiores facti sumus, ita ut perspectum plene & exploratum habeamus, quod illud in intellectu perfectioris alicujus spiritus vel possibile vel actuale Ens sit : tamdiu stolidum

dum esset & absurdum, istud Ens pro possibili vel actuali Eote habere.

2. Quodsi vero, quando Ens aliquod non cogitabile pro possibili aut actuali habere recusamus, in aliis jam cognitis veritatibus contradictionem aliquam admittere cogeremur, non minus stolidum esset & absurdum, si istud Ens non cogitabile pro possibili aut actuali habere recusaremus.
4. Deinde si perfectior quidam Spiritus, falli & fallere nescius, nos redderet certiores, quod Ens aliquod nobis non cogitabile, vel possibile sit vel actuale, itidem absurdum esset atque stolidum, illud pro tali non habere.
5. Denique, quando nos obligatos esse sentimus, aliquid, nobis non cogitabile, pro possibili aut actuali habere, eam maxime ob causam, ne, contra gravissimas humanæ perfectionis regulas, fines nostros discrimini subjiciamus, aut contra legem aliquam peccemus, itidem stolidum esset & absurdum huic necessitati cedere nolle, atque recusare, quo minus id, quod à nobis cogitari, vel concipi non potest, pro possibili habeamus aut actuale.

§. 10.

Ens ergo est, quidquid cogitari potest. Ex. gr. Triangulum, Arbor. *Non-Ens autem est, quod primo quidem obtutu cogitari posse videtur, penitus autem consideratum nullam admittit cogitationem.* Ex. gr. Bilineum Rectilineum. Ens ergo potest existere, non-Ens non potest.

Def.
Ens.

Non-Ens.

§. 11.

§. 11.

Existencia.

Existencia est complementum Possibilitatis; Vel: Existencia est ille status entis, quo aptum est ad agendum vel patiendum. Ens Rationis est, quod nullam habet existentiam nisi in mente nostra. i. e. quod fingitur existere. Id duplici modo fieri potest, 1. aut cum fundamento in re, ex. gr. Genus, Species, habent enim fundamentum in rebus existentibus, a quibus abstrahuntur. 2. aut absque fundamento in re, ex. gr. Centaurus. Illud adpellatur Ens Rationis Ratiocinantis; hoc autem Ens Rationis Ratiocinatæ.

*Ens
Rationis,**Ratiocinan-
tis.**Ratiocina-
ta.*

§. 12.

*Determina-
re.*

Determinare est aliquid e multiplici possibilitate sua restringere ad unum. Ex. gr. Vestis potest esse alba, atra, rubra &c. adest igitur multiplex possibilitas. Pone esse atram, ita e multiplici sua possibilitate restricta est ad unum. Quatenus aliquid in multiplici sua possibilitate subsistit, eatenus dicitur indeterminatum.

*Indetermi-
natum.*

§. 13.

§. 13.

Possibile vel habet existentiam, *Ens Actuale.* & dicitur *Actuale*; vel non habet existentiam, ad alia tamen relatum in iis habere potest rationem sufficientem existentiae, & dicitur *Potentiale.* Si ens potentiale complementum possibilitatis s. rationem sufficientem existentiae habet in actualibus, tum dicitur *Ens in potentia proxima.* Si vero complementum possibilitatis in potentialibus contineatur, tum vocatur *Ens in potentia remota.* Ex. gr. Existente Patre, (naturaliter considerato, non ut relatum) filius est in potentia proxima, nepos in remota, pronepos in magis remota. Dantur ergo *gradus* Potentiae remotae. Et si ens in potentia remota habet rationem existentiae sufficientem in serie Entium sibi mutuo succedentium: hæc integra series ratio demum est sufficiens existentiae illius Entis.

§. 14.

Porro ad hoc, ut aliquid, quod nondum existit, incipiat existere,

A 5

requi-

requiritur 1. ut existant vires illi producendo sufficientes ; 2. ut non impediatur illarum applicatio causis quibuscunque. 3. ut denique illa applicatio actualiter fiat, aut futura sit. Igitur consuevimus dicere, nisi sufficientes adsint vires, nisi etiam actu earum applicatio fiat aut futura sit, res antea non existentes ad existentiam pervenire non posse. Inde nova Possibilium & impossibilium adpellatio, cum illud dicitur possibile, cui præstando & sufficiunt vires, & applicari sine impedimento possunt, & applicantur quoque in præsens aut futurum; Cujus itaque futuritio ex suis causis est determinata; cum ex adverso id, cujus non futuritio est determinata, hoc sensu arctissimo dicatur impossibile, de quo etsi id non sit supra vires causæ, etsi ejus productioni nullum intercedat impedimentum, physice aut moraliter ineluctabile, certum tamen est, id non esse futurum.

*Alio sensu
possibile &
impossibile.*

§. 15.

Improprie aliquid *impossibile* dicitur, cum respectus fit non ad *sufficientiam* virium, sed ad earundem *adplicationem* ad rem producendam, prout ea impeditur aut non impeditur, impedimentis quidem ejusmodi, quæ potentiaë sufficientiam non afficiunt. Ita impossibile Deo dicitur, ut Titium damnet innocentem, non quasi vires non sufficerent, ad inferendos Titio cruciatus, sed quod applicationi & exercitio illarum intercedat ex divina bonitate, sapientia, sanctitate &c. *impedimentum* adeo *efficax*, ut vires suas adeo crudeliter exercere nec velit, nec per divinas decentias possit. Hæc *impossibilitas* dici solet *Moralis*; moralis enim respectus est, qui intercedit adplicationi virium, & illarum exercitium suspendit, salva earundem sufficientia ad actum physice & in se consideratum.

Impossibilitas Impropria, Moralis.

§. 16.

§. 16.

Quid essen-
tia, & quo
constitua-
tur.

Ens est, quod existeret potest, §. 10. adeoque Ens si concipi debeat, illa erunt ponenda, per quæ est possibile, seu quæ sibi non repugnant. Atque si primus Entis conceptus sit formandus, illa quoque erunt assumenda, quæ se non determinant; nam *determinatum ponitur demum posito determinante*, adeoque non est *primum* in Ente. Quapropter cum *primus Entis conceptus* dicatur *Essentia*, hæc per ea, quæ sibi non repugnant, sed tamen se non determinant, constituitur, adeoque in *compossibilitate* essentialium seu *possibilitate* Entis *interna* consistit. Ad hæc essentia tanquam primus conceptus rationem continere debet omnium, quæ vel actu insunt Enti, vel eidem inesse possunt, ipsa vero in alio nullo sui rationem habere debet.

§. 17.

Quid At-
tributa.

Quæ Enti conveniunt & sui rationem habent in sola essentia, illa

la vocantur *Attributa* s. *Proprietates*. Illa vero, quæ in sola essentia sui rationem non reperiunt, *Modi* adpellantur. *Modi* essentialibus non debent repugnare, *Enti* enim convenire possunt; unde, quod *Modi* possint *Enti* convenire, id quidem rationem habet in *Essentia* sola. Ita ea, quæ *Enti* conveniunt sunt vel *Essentialia*, vel *Attributa*, vel *Modi*.

§. 18.

Cur *Modi actu in Ente reperiuntur*, ratio non est quærenda in solis essentialibus aut *Attributis*; unde illorum existentia vel ab aliis *Entibus*, vel modis præviis, vel ab utrisque simul dependet. Ex. gr. *Eruditio* est *Modus* hominis, cujus existentia dependet a modis illius hominis antecedaneis, nimirum diligentia & dotibus naturalibus, itemque ab aliis entibus, scilicet informatoribus atque doctoribus.

Ratio existentia Modorum.

§. 19.

§. 19.

*Essentia &
Attributa
sunt immu-
tabilia.*

Immutabile dicitur, quod aliter esse non potest. Cum autem illud, quod est possibile, non esse simul queat impossibile, §. 6. possibilitas aliqua semper manet, & est immutabilis. In qua compositibilitate eorum, quibus Ens determinatur, cum consistat *Essentia*, §. 16. hæc quoque erit *immutabilis*. Per consequens nihil eorum, quæ essentiam constituunt, ab Ente abesse potest. Attributa rationem habent sufficientem in *Essentia*, §. 17. adeoque posita *Essentia*, etiam *Attributa* ponuntur; per consequens *Attributa* quoque sunt *immutabilia*. Salvo igitur Ente nullum *Essentiale* ab eodem potest separari. Quæ *inseparabilitas* eorum, per quæ ens determinatur, s. essentialium, cum vocetur Entis *unitas*, OMNE ENS EST UNUM.

Unitas.

§. 20.

CAP. III.

De Convenientia & Diversitate Entium, & connexis.

§. 20.

E*adem* sunt, quæ sibi in vicem *Idem. Diversa.* possunt substitui, ita ut facta substitutione nulla prodeat mutatio. *Diversa* sunt, quorum unum continet aliquid, quod non est in altero; sive, quorum substitutio mutationem producit. *Idem numero* est, quod bis existere, adeoque numerari non potest; & quod ea propter de se ipso tantum affirmari potest in singulari. *Idem numero* habet sibi opposita *Diversa numero*, quorum unum de altero in singulari affirmari non potest; adeoque quodlibet illorum sibi propriam vindicat existentiam, quæ numerari seu numerum efficere possit. Ex gr. Cicero, Cæsar, Pompejus, sunt numero diversa & efficiunt tres. *Diversa specie* sunt, quæ in conceptu generico non conveniunt.

§. 21.

§. 21.

*Quid simili-
le, dissimile
a quale,
inaquale.*

Nota characteristica est id omne, ex quo res aliqua cognoscitur, & a reliquis distinguitur. Quæ easdem habent notas characteristicas, *similia* dicuntur; quæ diversas, *dissimilia*. *Multitudo* constat ex unitatibus junctis. *Quantitas* est multitudo eorum, quæ rem constituunt. Quæ eandem habent quantitatem dicuntur *equalia*; quæ diversam, *inequalia*. *Aequalitas* ergo est identitas quantitatis; *Inæqualitas* autem diversitas quantitatis.

Totum.

Partes.

§. 22.

Partes

Totum.

Plura, quæ simul sumpta, constituunt unum aliquod ens, dicuntur *Partes*; quod autem partibus constat dicitur *Totum*. Itatotum consideratur in oppositione ad *partem*; in oppositione ad *mutuum*, Totum est id, quod constat partibus sibi debitis. Cum individua plura, simul sumpta, ob similitudinem constituent speciem,

em, & similitudo specierum plurium, constituat Genus (Log. §. 104. 105.) tum Genus respectu plurium Specierum, & Species respectu plurium individuorum adpellantur *Totum Universale*. Cum corpora plura & diversa componunt unum aliquod corpus, illud unum corpus adpellatur *Totum Integrale*; illa plura ex quibus componitur, dicuntur *Partes Integrales*. *Totum simile s. homogeneum* est id, cujus partes sunt ejusdem naturæ cum Toto. ex. gr. Vinum, cujus quævis gutta est itidem vinum. *Totum Dissimile s. Heterogeneum* est, quod habet partes diversæ naturæ cum Toto. ex. gr. corpus humanum. Pro diversa Totius denominatione diversimode quoque denominantur Partes. vid. Log. pag. 140.

Totum Universale.

Integrale.

Simile.

Dissimile.

§. 23.

Pars aliquota est, quæ aliquoties repetita toti fit æqualis; ex. gr. numerus ternarius respectu nonarii.

Pars aliquota.

B

narii.

Aliquanta. narii. *Pars aliquanta* est, quæ aliquoties repetita toti non fit æqualis. ex. gr. numerus ternarius respectu septenarii. *Partes*, quæ toti possunt simul inesse, vocantur *Actuales*; quæ simul inesse nequeunt, dicuntur *Possibiles*. Illud Totum, cujus pars alteri toti æqualis est, adpellatur *Majus*; quod vero parti alterius æquale est, adpellatur *Minus*.

§. 24.

Coroll. Totum ergo est idem cum omnibus partibus simul sumtis & v. v. Posito itaque toto, ponuntur omnes ejus partes, & v. v. Et pars partis est etiam pars Totius, Totumque majus est qualibet sua parte.

CAP IV.

De
Necessario & Contingente.

§. 25.

Species Oppositæ.

Opposita dicuntur, quorum unum involvit negationem alteri.

alterius. *Contrarie opposita* dicuntur, quæ eidem Enti simul inesse non possunt. Ex. gr. calidum & frigidum. *Contradictorie opposita* sunt, quæ simul esse non possunt. Ex. gr. calidum, non calidum. *Relative opposita* dicuntur Relata, quorum unum non potest esse alterum. Ex. gr. Pater & filius. Cumque *Ens positivum* dicatur, quod est aliquid, seu quod realitate aliqua absolvitur; *privativum* vero *Ens*, quando defectum realitatis instar Entis consideramus, ex. gr. vita & mors: *Privative opposita* dici solent *Ens Positivum* & *Privativum*. Ex. gr. Visio & coecitas.

§. 26.

His præmissis *Necessarium* definitur per id, ^{Necessarium} ^{tim.} cuius Oppositum involvit Contradictionem. Dicitur alias etiam *Necessarium* id, quod est immutabile; quod non potest non esse, nec esse aliter & aliter,

B 2

quam

quam est; vel, quod sine contradictione non potest concipi aliter & aliter constitutum; quod est sui generis unicum possibile. Ex. gr. Triangulum habet tres angulos. *Contingens*. *Contingens* est, cujus Oppositum est possibile; quod potest esse, & non esse; quod potest esse sic, & esse aliter; quod non est immutabile; quod non est unicum possibile in suo genere. Ex. gr. scribo nunc; potuissem non scribere; scribo latina, potuissem scribere græca, gallica &c. Vocatur *Necessarium* hoc sensu acceptum necessarium *absolute* tale, item *Geometrice* vel *Metaphysice* necessarium. Fundatur adeo Necessitas Absoluta in determinabilitatis *unicitate*; contingentia autem in determinabilitatis *diversitate*.

§. 27.

*Essentia
sunt neces-
saria,*

Cum essentia rerum sint immutabiles, eadem etiam necessariae sunt, §. 26. consequenter etiam
æternæ

æternæ, quoniam nullum assignari potest tempus, quo ens cœperit esse possibile, & quo desinet esse possibile.

§. 28.

Cujus Oppositum in *Hypothesi* aliqua data impossibile est, vel contradictionem involvit, illud adpellatur *Hypothetice necessarium*.
Ex. gr. si cadit pluvia, hypothetice necessarium est, tempestatem esse turbidam.

*Necessitas
Hypothesi-
ca.*

§. 29.

Physice necessarium appellatur id, quod constitutâ rerum naturâ per leges in ea stabilitas esse vel fieri aliter non potest. Ex. gr. physice necessarium est, ut aqua humectet; ut ignis urat; ut Sol luceat.

*Physice ne-
cessarium.*

Moraliter necessarium est, quod per qualitates morales Enti competentes fieri aliter non potest.

*Moraliter
necessari-
um.*

B 3

Ex.

Ex. gr. moraliter necessarium est, ut Vir bonus datam fidem præstet; ut Deus malum puniat.

§. 30.

Coroll.

Non igitur repugnat, ut *contingentia* sint *hypothetice necessaria*. Et quoniam Attributa per Essentiam Entis sufficienter determinantur, Modi non item, §. 17. illa perinde ac essentiae necessaria sunt, hi minime, atque adeo contingentes sunt. §. 26.

CAP. V.

De Ordine, Veritate & Perfectione.

§. 31.

Ens Perma-
nens.

Ens succes-
sivum.

Si ea, quibus Ens in esse suo determinatur, fuerint simul, Ens dicitur *Permanens*; si continuo se invicem sequantur, Ens *successivum* adpellatur. Ex. gr. motus.

§. 32.

§. 32.

Similitudo obvia in modo, quo res juxta se invicem collocantur, vel se invicem insequuntur, est illud, quod *Ordinem* dicimus. Ita *Ordo.* *Euclides* ordine conscripsit Elementa sua, cum propositio præcedat, quæ ingreditur demonstrationem sequentis.

§. 33.

Cum similitudo ex determinandi identitate nascatur, omnis ordo suas habet *regulas*, juxta quas determinantur, quæ juxta se invicem collocanda, vel se invicem sequenda veniunt. Ita *Euclides* in ordine propositionum eam observavit regulam, ut priori loco ponatur, qua opus est ad demonstrandam alteram, hæc vero locum occupet posteriorem. Id, in quo varia sibi sunt similia, dicitur *Regula Ordinis.*

§. 34.

Veritas.

Cum in Essentia Entis contineatur ratio Attributorum, & in Entibus aliis extra ipsum ratio Modorum, præter Attributa autem & Modos nil quicquam convenire possit, obstante principio Rationis sufficientis, in omni Ente est *Veritas*, s. OMNE ENS EST VERUM. *Veritas* ergo est Ordo eorum, quæ Enti conveniunt. Principium Rationis sufficientis est *fons* omnis Veritatis; quo sublato habentur somnia.

§. 35.

Perfectio.

Si in varietate rerum fuerit consensus, ita ut singula ex rationibus generalibus iisdem determinentur, dicitur is *perfectio*. Ex. gr. Quæcunque ad structuram oculi pertinent, per imaginem in oculo delineandam radiis ab objecto immissis determinantur, in eo concurrentibus singulorum rationibus, ut eadem clara sit ac distincta, quan-

quantum ad visionem sufficit, atque propter hunc consensum oculus dicitur *perfectus*. *Imperfectio* est dissensus in varietate.

§. 36.

Si una fuerit Ratio determinans generalis, in quam ceteræ resolvuntur, *perfectio est simplex*; si plures fuerint, *Composita*; qualis in fenestra observatur, si non modo illuminationis conclavis, sed & commoditatis perspectus habeatur ratio.

§. 37.

Determinatio rationi conformis regulam parit; à qua *aberratur*, si rationi non conveniat. Atque hæc aberratio *defectum* gignit.

§. 38.

In perfectione composita regulæ è diverso fonte dimanant, §. 36. fieri itaque potest, ut inter se collidantur, una locum non habitu-

B 5 ræ.

Exceptio.

ræ. Ea regularum collisio *Exceptionem* parit. Unde oritur in Ente imperfectio ob perfectionem totius admittenda. Quem igitur in finem ea regula postponenda, cuius neglectus cum *maiore totius perfectione* consistit; id quod in casibus singularibus ex rationibus determinantibus generalibus æstimatur, cum constet, quænam illarum sit potior.

§. 39.

*Gradus
Perfectionis.*

Gaudent adeo perfectiones suis gradibus, non modo ob regularum multipliciter, §. 36. 37. sed & ob modum exceptionum, §. 38. Unde perfectius plures observationes generales suppeditat imperfectiori.

§. 40.

Theor.

Ex his patet:

1. Quod ubi unica tantum adfuerit regula perfectionis, ibi exceptioni non sit locus.
2. Quod adeo in perfectione simplici exceptio nulla esse possit, quam-

quamvis in perfectione composita locum exceptio habere queat.

3. Quod ex exceptione non verus, sed tantummodo adparens oriatur defectus.
4. Quod ex exceptione a regula perfectionis in parte quidem oriatur imperfectio, sed salva totius perfectione.

§. 41.

Perfectio Essentialis est, quæ continetur consensu determinationum Essentialium. *Perfectio* autem *accidentalis* est, quæ facit consensum determinationum accidentalium s. modorum cum essentialibus.

*Perfectio
Essentialis,
Accidentalis.*

§. 42.

Cum jam omne Ens sua gaudeat essentia, atque attributis in ea fundatis, quæ faciunt ut Ens præcise sit Ens, non vero non - Ens; ut sit hoc Ens, nec aliud; intelligitur omnes Ens gaudere perfectione

*Omne Ens
est bonum.*

ctione Essentiali, quam Scholastici dixerunt *Bonitatem Metaphysicam*. Hinc OMNE ENS EST BONUM.

CAP. VI.

De Ente Compositio.

§. 43.

*Extra se re-
præsentare.*

Quidquid concipimus tanquam à nobis distinctum, illud *extra nos* repræsentamus. Quæcunque tanquam à se invicem distincta concipimus, illa *extra se* invicem repræsentamus.

§. 44.

Compositum

Reale

Logicum.

Ens Compositum dicitur, quod ex pluribus à se invicem distinctis constat partibus. Ex. gr. Vestis, domus. Hoc compositum adpellatur *Reale*, ut distinguatur a *composito Rationis*. Est autem *Compositio Rationis* s. *Logica*, cum plura à se invicem distincta in Ente quopiam mente concipiuntur, quæ tamen realiter à se invicem distincta

ſta non ſunt. Ex. gr. Attributa,
quæ in Deo concipiuntur omnia;
item facultates animæ.

§. 45.

Differt Notio *Totius* a notione
Compositi. Nam in notione To- *Nota.*
tius potiffimum ſpectatur identitas
Entis cum partibus ſimul ſumtis;
in notione compositi, determina-
tio Entis in eſſe ſuo per plura ſimul
ſumta. Atque adeo in compositi-
to habetur ratio *nexus partium*,
qui in notione Totius non atten-
ditur. Eſſentiam itaque compo-
ſiti is demum perſpicere recte exi-
ſtimatur, qui cognoscit, *quales*
ſint in composito *partes*, *quove*
modo partes illæ ſint inter ſe *com-*
binatæ & connexæ.

§. 46.

Cum partes Compositi à ſe invi-
cem diſtinguantur, adeoque ex-
tra ſe invicem exiſtant, quælibet
illarum ſuum habet locum, &
compositum ex iis ſpatium replet,
deter-

*Composi-
tum menſu-
rabile.*

Metiri.

determinatam quoque habet magnitudinem, quæ multitudine partium absolvitur; quæ magnitudo ad aliam relata determinatæ rationis est, ob cuius determinabilitatem compositum dicitur *mensurabile*. Nimirum *metiri* idem est, ac rationem magnitudinis ad aliam datam homogeneam investigare; ex. gr. rationem, quam habet longitudo panni ad longitudinem ulnæ. Magnitudo data, ad quam exigitur ratio alterius, *Mensura* vocatur. Dicuntur autem *Magnitudines homogeneæ*, quarum una, aliquoties sumpta alterâ fit maior.

Mensura.

§. 47.

Nota.

Magnitudo ad mensuram revocanda concipitur instar compositi ex partibus similibus atque continuis, mox definiendis, atque adeo aliquid imaginarii habet.

§. 48.

Cum magnitudo multitudine
partium

partium determinetur, pluribus
 accedentibus compositum *majus*; *Compositum majus, minus.*
 aliis secedentibus, *minus* fieri potest.

§. 49.

Si multa à se invicem distincta
 tanquam in uno nobis repræsentamus, Ens *Extensum* concipimus; unde compositum est extensum, & vice versa, omne extensum est compositum. *Extensum.*

§. 50.

Quodsi in extenso partes eo ordine juxta se invicem collocentur, ut aliæ inter ipsas ordine alio interponi nequeant: compositum dicitur *Continuum*, siue fuerit permanens, siue successivum. §. 31. *Continuum.*
 Quodsi partes alio ordine alias interpositas admittant, compositum erit *interruptum*. *Interruptum.*

§. 51.

In continuo igitur non admittendæ sunt partes nisi actuales, *Nota.*
 hoc

hoc est, quæ cum in spatio, tum in tempore per phænomena actualia designantur. Qui notionibus spatii & temporis imaginariis nixi partes possibiles cum actualibus confundunt, in difficultates inextricabiles circa compositionem & divisionem continui incidunt, unde continuum *Philosophorum Labyrinthus* dicitur.

§. 52.

Spatium. Scilicet quam primum coëxistentia extra se invicem, & extra nos nobis repræsentamus, ideam *Spatii* habemus, prout imaginari quidpiam conantibus adparet. Quod si ergo distincte expendamus, quid notio *Spatii* involvat, in ea non reperimus, nisi ordinem coëxistentium s. simultaneorum, vi cuius primum est extra secundum, quemadmodum secundum extra tertium, & ita porro. Atque determinatus modus ceteris coëxistendi, qui enti unicuique convenit, est proprie loquendo id, quod *Locum* adpellamus.

§. 53.

§. 53.

Quando modum coëxistendi cum ceteris Entibus ab ente ipso distinguimus, eum tanquam extra ipsum repræsentamus; atque hinc *spatium ex locis tanquam ex partibus compositum* imaginamur, quæ sibi mutuo similes non nisi *numero* differunt. Cavendum verò ne *spatium imaginarium* cum *reali* confundamus.

§. 54.

Qualis ordo in *simultaneis* observatur, talis etiam in *successivis* conspicitur, ubi unum est actu, vocaturque *præsens*. Sublato actu præsentis sequitur alterum, quod modo in statu puræ possibilitatis constitutum erat, & ita porro. Quod ab actu recidit in statum possibilitatis *præteritum* dicitur: quod ut a potentia ad actum traducendum consideratur, *futurum* audit. Atque hic ordo in *successivis* est id, quod *Tempus* adpellamus; cujus partes

C

partes

partes cum non sint simul, inter Entia *successiva* referendum. §. 31.

§. 55.

Nota.

Est verò & circa *Tempus*, perinde ac circa *spatium*, imaginatio-
ni locus, quæ existentiam ab ex-
istente separat, & inde Ens quod-
piam veluti *successivorum recepta-
culum* fingit. Quemadmodum
verò notio imaginaria temporis
imaginarium spatii illustrat: ita si-
militer *vera* temporis notio *veram*
spatii notionem illustrat, id quod
conferenti perspicuum est.

§. 56.

Scholion.

Partes Spatii iis distinguuntur,
quæ actu existunt; partes autem
temporis distinguuntur mutationi-
bus, quæ se invicem subsequi ob-
servantur. In exiguis adeo parti-
bus discernendis utrobique *micro-
scopiorum* usus se se commendat.

§. 57.

Figura.
Limes.

Extensi limes *figura* vocatur.
Limes

Limes autem est defectus ulterioris realitatis. Cum ergo composita determinatam habeant extensionem, *Figuram* quoque determinatam habent, atque una per eandem nanciscuntur *magnitudinem* determinatam.

§. 58.

Cum spatium in ordine coëxistentium consistat, ratio hujus ordinis in rebus coëxistentibus querenda. Spatium igitur in abstracto consideratum est *indifferens* ad quodlibet recipiendum. Et idem tenendum est de tempore. Unde non mirum, quod locus mutari possit, mobili non mutato. Quæ loci mutatio *Motus* adpellatur, & palam loquitur, quod Entia non necessario sint in hoc loco.

Spatium & tempus indifferentes.

Motus.

§. 59.

Quoniam partes compositi à se invicem distinctæ, nec necessario huic inhærent loco, fieri potest,

Compositum.

C 2 ut .

est divisibile.

ut a se invicem separentur. Unde compositum est *divisibile*. Etenim *Divisio Extensi* in partium separatione consistit. Eadem ratione patet, partes posse translocari, & quod partibus caret, esse indivisibile.

§. 60.

Essentia compositi.

Composita similia.

Compositum ex partium combinatione oritur, §. 44. atque adeo *modus compositionis* ex diversitate partium, & combinationis determinandus, ejus *essentiam* absolvit, & composita *similia* sunt, quæ eodem modo componuntur.

§. 61.

Theor.

Quia partes non necessario loco suo inhærent, sed ex alio in alium moveri possunt: fieri potest, ut nova ratione combinentur, quæ ante fuerant disjuncta, & contra â se invicem separentur, quæ fuerant conjuncta. In priori igitur casu *essentiæ* actus ponitur, in posteriori

steriori tollitur. Unde patet *composita oriri ac interire* citra cujuspiam ex nihilo productionem atque annihilationem.

§. 62.

Partibus ablatis vel adjunctis vel *Theor.* transpositis variari potest limes extensionis. *Compositi adeo figura mutabilis.*

§. 63.

In explicanda compositione *Nota.* tantummodo descendendum ad partes, quæ spectantur, ut continuæ; ex. gr. in explicanda structura machinæ non progredimur usque ad partes ligni vel ferri, ex quo partes machinæ constant; quoniam illæ spectantur ut continuæ, nec earum differentiæ in machinæ structura habetur ratio.

§. 64.

Quodsi ergo salva continuitate *mutatio in partibus* totius mutatio accadat partibus, *salv. contin.*

C 3

veluti

si nonnullæ motu gaudeant intestino, *essentia compositi perdurat.*

§. 65.

*Mutationes
compositum.*

Nulla compositis mutatio accidere valet vi hæcenus dictorum; nisi quoad *figuram, magnitudinem, partium situm, motum intestinum, atque locum totius.*

§. 66.

Schol.

Corpora sunt Entia composita. Philosophia igitur compositi principia præbet philosophandi de corporibus sive naturalia fuerint, sive artificialia.

CAP. VII.

De Ente Simplici.

§. 67.

Simplex.

ENti Composito opponitur Ens *Simplex*, quod omnibus caret partibus;

partibus; vel: *Simplex* est, quod non constat partibus.

§. 68.

Dantur Composita, ergo dantur Simplicia. Nam sine simplicibus non dantur composita; Dantur autem composita; Ergo dantur Simplicia.

*Existentia
Simplici-
um.*

Minor est experientiæ. *Majorem* probō: Compositio dicit simulpositionem plurium, supponit igitur plura. Illa plura sunt aut composita, aut simplicia: Si hoc, obtinui quæsitum. Si prius, recurrit quæstio eadem, ac sine fine. Neque enim respondendo quicquam profeceris; eadem te quæstio præcurrit. Generaliter igitur *compositio præsupponit Simplicia*. Unde compositum (*non hoc vel illud, sed*) in genere? non ex simulpositione compositorum; quæsi vi enim de hisce, ut jam tum sub genere compositorum comprehensis; igitur ex *simulpositione* plurium simplicium.

§. 69.

Sunt, qui sibi persuadent, si quærat^r de Elementis corporum

*Judicium
de Materia
Universali.*

sufficere id, ut materiam quandam Vniversalem allegent, quæ sit respectu corporum specialium simplicior, sed in sese tamen divisibilis.

Non jam inquirō : quo sensu id in explicanda physica, & pro scopo v. g. Medico recte dici possit, & dici etiam alicubi debeat. Neque excurram in id, an ejusmodi materiam universalem, ex qua omnes materiæ speciales oriuntur, doceat ratio, experientia & scriptura sacra. Illud attendendum, utrum responsio infringat argumentum allatum? §. 68. Arbitror quod non. Aut singulæ illius materiæ universalis partes debent concipi ut simplicia, aut ipsæ ultimo ex simplicibus compositæ. Materia ergo universalis dari non potest sine elementis materiæ simplicibus. Aut illa materia constat Elementis non amplius in partes resolvablebus, aut non constat. Si constat: erunt elementa illa id, quod quaero, sc. simplicia naturæ. Si non constat, sequitur dari composita sine componentibus. Quænam enim sunt componentia? simplicia? id negatur. Composita? nihil proficitur;

ficitur ; non enim quæritur de hoc vel illo composito , v. gr. de Muro, qui compositus est ex lapide, calce & arena , compositis rebus , sed de composito in genere.

§. 70.

Ens simplex ergo non est exten-
sum, caret magnitudine, caret
figura, est indivisibile, non replet
spatium, consequenter a compo-
sito prorsus differt.

*Prædicata
Entis simp-
licis.*

§. 71.

*Simplex ex composito oriri ne-
quit.* Quidquid enim ex compo-
sito oritur per partium divisionem,
combinationem & transpositio-
nem oritur. Sed cum partibus
careat, nec hoc modo oriri pot-
est.

*Simplex
non oritur
ex compo-
sito.*

§. 72.

Quod partibus caret est indi-
visibile; *Ex simplici igitur uno ori-
ri nequit aliud.*

*neque ex
Simplici.*

C 5

§. 73.

§. 73.

*Simplex
oritur in
instanti.*

Quamobrem simplex aut necessarium, aut si ortum, detur necesse est Ens, quod illud *in instanti* produxit ob indivisibilitatem, cum antea ejus nihil esset. Suo loco ostendetur, ens simplex necessarium esse *Deum*, & ab eo animas atque elementa rerum corporearum ex nihilo producta esse. *Successivo* nimirum opponitur *instantans*, i. e. omne id, quod caret successione, quodque adeo temporis est expers. *Oriri* itaque *in instanti* quid dicitur, cum sine ulla successione existentiam accipit.

§. 74.

*Ortus Sim-
plicium ex-
plicari ne-
quit.*

Quoniam in ortu instantaneo non dantur, quæ à se invicem distinguui possunt, *nec ortus simplicium distincte explicari potest*. Ortus è contrario compositorum cum sit successivus, distinctam sui explicationem admittit, atque in tempore contingit.

§. 75.

§. 75.

Cum partibus careat simplex, nec eo modo interire potest, quo compositum interit, sed si desinere debet, *in nihilum* recidat necesse est. *Transmutationem* fingere haud licet, illa enim cum rationem in essentia rei contineat, transmutatio non esset, nisi status mutatio, ente subsistente eodem.

*Ens simplex
in interitu
annihilan-
dum.*

§. 76.

Omnis mutatio in variatione modorum consistit, quæ *modificationis* fert nomen. Quoniam verò modus variatur, salva essentia rei, omnis *modificatio in limitum variatione* consistit. Quod si ergo simplex mutationibus obnoxium ponamus, limitationes habeat, atque adeo in eo detur aliquid *perdurabile*, quod limitari possit, necesse est. Destitutum verò limitibus, mutationum impatiens est.

*Datur in
simplici
aliquid
perdurabi-
le.*

§. 77.

§. 77.

& limita-
tio intensi-
tatis.

Cum simplicia magnitudine & figura careant, quæ ex limitatione extensi resultant, non *aliam* in iis *limitationem* concipere licet nisi *intensitatis*, quæ graduum quædam multitudo est.

§. 78.

Differentia
Entis finiti
& infiniti.

Mutationes, quæ rebus accidunt, antequam contingunt, possibiles sunt. Quoniam itaque Entia limitata mutationum capacia sunt, §. 76. *non omnia, quæ in Ente limitato possibilia sunt, actu adfunt.* Cum in Ente illimitato contraria obtineat ratio, quæcunque in eo possibilia sunt, *actu* eidem inesse debent. Atque hæc est *differentia*, quæ inter *finitum* & *infinitum* intercedit, magni fane momenti, quemadmodum suo patebit loco.

§. 79.

Nota.

Vi Principii rationis sufficientis
in

in Entis finiti statu præfenti continetur ratio fubfequentis, hoc eft, datur in præfenti aliquid, unde intelligitur, cur fubfequens fequitur.

§. 80.

Determinatione mutabilium *STATUS ENTIS* enafcitur *status Entis*, quem adeo *tit.* limitationes præfentes conftituunt.

Accidentia alia alio modo in re quam existere obfervamus. Hinc enafcuntur varia *status genera*. Si accidentia fuerint *intrinfeca*, ita ut cum effentia rei & attributis fimul rei infint, tum inde oritur *Status internus*; ex *Extrinfecis* contra accidentibus vel modis *Status Externus* exfurgit. Ex. gr. cum quis virtute evirefcit, tum illa virtutis præfentia, quæ fimul cum effentia hominis & attributis in eo locum habet, conftituit *Internum* hominis *Status*. Cum verò quis divitiis affluit, aut in alto dignitatis gradu conftitutus vivit, intelligis, hæc omnia ad accidentia externa ftatumque externum pertinere.

Muta-

*Actio.**Passio.*

Mutatio status, cujus ratio continetur in ente, quod eundem mutat, dicitur *Actio*; si vero ejusdem ratio extra ipsum continetur *Passio*.

§. 81.

*Potentia.**Vis.*

Nuda agendi possibilitas vocatur *Potentia* s. *Facultas*; Conatus verò agendi, *Vis* s. *Virtus* adpellatur. Solet etiam nuda patiendi possibilitas vocari *Potentia Passiva*.

§. 82.

*Ex vi sequitur
actus.*

Ex vi igitur sequitur *Actio*, nisi impedimentum in contrarium adfit; at ex *potentia* minime, quæ ad actum nondum determinata sufficienter.

§. 83.

Substantia.

Ens agendi potentia præditum adpellatur *Substantia*; ea destitutum *Accidens*. Hoc autem loco accidens ita interpretamur, ut sub
eo

eo id omne complectamur, quod non est substantia, sive de cetero rei constanter & perpetuo competat, sive minus.

§. 84.

Vis f. Virtus non nisi gradus ad- *Vis habet gradus.*
mittit, nullas vero partes, atque adeo non aliam, quam *intensitatis* limitationem. Hæc intensitatis limitatio cum sit, quæ in simplici locum habet: in ente simplici *vis limitata* concipienda, qua status continuo mutatur ea quidem lege, ut præsens contineat rationem sequentis.

§. 85.

In Ente igitur simplici infinito *Sed non in ente infinito.*
vis illimitata, qua simul actuantur, quæcunque per essentiam ejus possibilia sunt.

§. 86.

Sunt adeo Entia simplicia cum *Ufus doctrina de Simplicibus.*
finita, tum infinitum substantiæ. Quo-

Quoniam itaque suo loco ostenditur, Deum, animam & Elementa Mundi Materialis esse substantias simplices: philosophia simplicium lucem affundit doctrinæ de Deo, anima & Elementis rerum materialium.

CAP. VIII.

De

Respectu Entium ad se invicem.

§. 87.

*Principium
Essendi,
Cognoscendi,
Fiendi.*

Quod in se continet rationem alterius, vocatur *Principium*. Nimirum *Principium Essendi*, si contineat rationem, cur alterum sit; *Principium cognoscendi*, si contineat rationem, cur alterum cognoscatur. Quod verò rationem sui in altero habet, *Principiatum* adpellatur. Additur etiam *Principium fiendi*, quod est id, in quo ratio reperitur, cur alterum fiat; ex. gr. Architectus respectu domus. *Principium Essendi* vocatur etiam *Causa*. §. 88.

§. 88.

Quodsi ratio existentiae alterius sit actio quaedam Entis, tum ipsum dicetur *Causa Efficiens*; Principiatum vero hoc in casu *Effectus* adpellatur.

§. 89.

Causa efficiens, quæ per suam actionem producit effectum, vel ita agit, ut possit quoque actionem *omittere*, vel ita agit, ut intrinseca sua natura ad agendum impulsæ, *non possit non agere*. Illam vocamus *Liberam*, hanc *Naturalem & Necessariam*. Ex. gr. Scriptionis hujus sum causa libera, poteram enim præsentem scriptionem quoque omittere. Cum vero ignis lignum comburit, ex necessitate Naturæ id fit, adeoque est causa *Naturalis & Necessaria*.

§. 90.

Cum causa efficiens producit
D effectum

effectum, tunc aut productus effectus est *eiusdem essentiae*, qua gaudet ipsa causa, aut *diversam* habet *essentiam*, diversæque est Speciei: si illud, causa *Univoca*; si hoc, causa *equivoca* adpellatur. Ita passer passerem generans est causa *Univoca*; futor respectu calcei est *equivoca* causa.

§. 91.

*Causa Principalis.
Instrumentalis.*

Causa efficiens vel *Principalis* est, vel *Instrumentalis*. Causa efficiens *Principalis* est, quæ effectum producit virtute sua propria; ex. gr. Deus respectu S. Scripturæ. Si vero actio vi aliena producit, dicitur causa *Instrumentalis*; ita Apostoli & Prophetæ sunt causa *Instrumentalis* S. scripturæ. In Instrumento tantum est *potentia* agendi, quæ in *vim* degenerat per influxum causæ principalis.

§. 92.

Causa Physica.

Causa efficiens porro est vel *Physica*

Physica vel *Moralis*. Causa *Physica* est, quæ effectum immediate vera & reali actione producit; Si vero quid effectum mediate, ac per alium ad existentiam perducit, tum dicitur causa *Moralis*. Ex. gr. Si quis alterum hominem sua interficit manu, est causa *Physica* homicidii; si vero quis ad alterius occisionem cohortando, suadendo &c. concurrat, causa *Moralis* dicitur.

§. 93.

Concausæ sunt, quæ simul concurrunt ad unum idemque effectum producendum. Ex. gr. sex equi currum post se trahentes sunt *concausæ*. Dicuntur etiam Causæ *Sociæ* ejusdem ordinis. Quibus opponitur Causa efficiens *solitaria*, cum effectus causa efficiens non nisi *unica* fuerit.

§. 94.

Causa efficiens porro alia *proxima* est, alia *remota*. Causa *remota* est,

est, a qua effectus intervenientibus aliis causis dependet. Causa verò *proxima* est, à qua effectus, nulla alia causa interveniente, dependet. Hæc etiam dicitur *Immediata*, illa *Mediata*. Avus ex. gr. est nepotis causa *remota*, pater filii *proxima*,

§. 95.

Causa ponit effect.

Quoniam causa efficiens sufficientem continet rationem, cur effectus existat, §. 88. *posita causa ponitur effectus.*

§. 96.

Finis.

Id, cujus gratia causa efficiens operatur, dicitur *Finis*. Atque adeo pertinet ad rationes, quibus actio causæ efficientis determinatur.

§. 97.

Ponit intellectum.

Causa igitur efficiens finem præcognoscat necesse est, incognitum enim intendere nequit. Unde liquet,

quet, *finem præsupponere agens intelligens.*

§. 98.

Quidquid rationem continet, cur finis actum consequatur, *Medium* vocatur. Unde vulgo dicitur, per *Medium* obtineri finem.

§. 99.

Non confundendus est finis cum rationibus voluntatem determinantibus, ut propter hunc finem agere velimus: quæ *causæ impulsivæ* nomine insigniuntur, & de quibus plura dicentur in Psychologia, ubi de voluntate agemus.

§. 100.

Finis, propter quem quis ita agit, ut, si nullum alium finem sibi haberet propositum, tamen ageret, *Principalis*; sicuti is, propter quem quis ita agit, ut si nullum alium sibi haberet propositum, non ageret, *minus Principalis* dicitur.

Finis Principalis,

Minus Principalis.

D 3

§. 101.

§. 101.

*Finis Ulti-
mus,
Interme-
dium.*

Dividitur etiam in *ultimum & intermedium* s. *subordinatum*. Ille est, propter quem sunt intermedii; & hic, qui propter ultimum. Ita ex. gr. Eruditio potest esse finis ultimus, lectio librorum & meditatio fines intermedii.

§. 102.

*Forma En-
tis.*

Quidquid in Ente singulari concipimus, suo modo determinatum est; sunt autem quædam determinationes *necessariæ* atque *constantes*; aliæ *contingentes* atque *variabiles*. Datis quibusdam necessariis dantur quoque ceteræ, atque adeo inde *essentia & attributa*, sicuti à variabilibus *modi* resultant. Quoniam per determinationes *necessarias*, quas *essentiales* adpellare licet, ens in esse suo constituitur, hoc est, ab iis pendet, ut ens sit hujus generis atque speciei, determinationes *Essentiales* sunt *Forma Entis*. Unde intelligitur *Formam dare Esse rei atque distingui*.

§. 103.

§. 103.

Illud quod determinatur, vocatur in Composito *Materia*. Unde vulgo dicitur, ens compositum ex *Materia* constare, de qua uberius agemus in *Cosmologia* generali.

*Materia
Compositi.*

§. 104.

Ens, quatenus consideratur ut habens essentiam, & præter eam aliorum capax, vocatur *Subjectum*; illa vero alia, quæ essentiam consequuntur, & vel attributa sunt vel modi, quibus accidentaliter ad aliquam Entis speciem refertur, *Adjuncta* audiunt. Ita ex. gr. homo est *Subjectum* doctrinæ, & doctrina *adjunctum* hominis, per quod ad Speciem quandam Entium, nempe hominum doctorum *accidentaliter* refertur.

Subjectum.

Adjunctum

§. 105.

Objectum contra appellari solet illud ens, quod actionem agentis determinat, seu actionis quasi limes est. Unde vulgo dicitur, agens versari circa hoc vel illud *objectum*. Ita color est *objectum*

Objectum.

visus, quia hic actus animalis per colorem determinatur. Similiter corpora naturalia dicuntur *objectum* Physici, quia ipsius actiones, quas tanquam *Physicus* suscipit, per corpora naturalia determinantur. Scholasticis *Materia circa quam* Objectum est, *Materia in qua* Subjectum; unde *Materia* proprie sic dicta cum addito *Materia ex qua*.

§. 106.

*Signum est
vel Demon-
strativum,
vel Prognos-
ticum vel
Rememora-
tivum.*

Quod si ex Ente aliquo dato alterius *præsentia*, vel *adventus*, vel *præteritio* colligitur, prius dicitur *Signum*, posterius *Signatum*; Et quidem in primo casu *Demonstrativum*, in secundo *Prognosticum*, in tertio denique *Rememorativum*. Si vero *Signum* attributa modos rei designatæ simul manifestat, & eorum inter se connexiones plures, vel pauciores animo ingerit, *Scientificum* adpellatur. Ex gr. Pythagoras e vestigiis Herculis agnovit illius magnitudinem.

§. 107.

§. 107.

Signa sunt porro vel *naturali* ra- *Naturalis*
 tione connexa rebus, quibus menti
 repræsentandis adhibentur; vel
arbitrio hominum; illa dicuntur
Naturalia, hæc *Arbitraria*. Ex. gr. *Naturale*
Arbitrari-
um.
 fumus est signum naturale ignis;
 picta autem Leonis, cervi &c.
 imago est signum *arbitrarium* cau-
 ponis.

§. 108.

Distinguuntur etiam signa in
Τεκμήρια & *Σημεῖα*, quorum illa sunt *Τεκμή-*
 certo significantia; hæc *probabili-* *σιον. Ση-*
μιον.
 ter tantum. Ita enormia peccata
 futuras Dei poenas certissime indi-
 cant. Quando autem dicitur:
pallet; ergo *studet*; pallor tantum-
 modo est signum probabiliter signi-
 ficans. Item mutationes Barometri
 respectu tempestatis.

§. 109.

Signa Naturalia sunt scientifica, *Theor.*
 quoniam hic signum & signatum
 inter se connectuntur, vel ut *causa*
 & *effectus*, vel ut *eiusdem causæ ef-*
 D 5 *fectus*

fectus communes; ab effectibus autem ad causas, & reciproce licet concludere. Ita tempore veris co-axatio ranarum causa quidem non est arboris virescentis, sed habet communem causam, solem sc. propius adscendentem.

§. IIO.

Theor.

Arbitraria possunt esse scientifica, & possunt esse rememorativa tantum. Ita voces sunt signa conceptuum & rerum, sed nude significativa & rememorativa. Quid enim commune est v. c. voci, domus, cum re designata? Sunt vero & alia signa arbitraria, v. gr. in Arithmeticis, Geometricis, Algebraicis, quæ ad veritates investigandas adjuvamento sunt. Eundem quoque usum præstant Globi, mappæ Geographicæ, figuræ &c.

§. III.

Theor.

Signa Naturalia sunt certa semper, si satis determinate illa intelligas. Neque enim id in rigore Metaphysico verum est, quod ejusdem

dem effectus diversæ esse possint causæ. Unusquisque effectus suam præcise causam certo & determinate indicat. Signa autem *arbitraria*, tanquam mutationi obnoxia, possunt esse probabilia magis, minusque pro circumstantiis usque ad *certitudinem*, quam vocant, *Moralem*, & in vita civili veræ certitudini faciunt æquipollentem.

§. 112.

Porro etiam *Signa Naturalia* Theor. possunt esse rebus conjuncta & exhibitiva, cujusmodi v. g. sunt Symptomata morborum; & a rebus separata vel significativa tantum, ut sunt v. gr. vestigia quædam nivi impressa. Sic *Arbitraria divinitus* constituta, quorum exempla sunt v. gr. pro *exhibitivis* sacramenta N. Testamenti, pro *significativis* Testamenti veteris. *Arbitraria humanitus* instituta possunt esse & *significativa* & *exhibitiva*, ut, si coronam Regi ordines offerant, si obsessi claves urbis exhibeant Duci obsidionis

obsidionis ; quæ signa sunt *exhibitiva moraliter* , non significativa tantum, qualia sunt, si mappam alicui Geographicam, aut urbis cujusdam ichnographicam privatus offerat. Sed in rebus physicis sunt nude significativa ; neque enim arbitrio humano res naturæ subjacent, ut re ipsa tradi signo arbitrario possint.

COSMOLOGIA.

Prolegomena.

§. 113.

Cosmologia. **C**osmologia est Scientia Mundi in genere. §. 2.

§. 114.

*Ufus variis
Cosmologia.* Usus hujus disciplinæ sunt multiplices,

Primus est Theologicus pro Theologia Naturali ad demonstrandam Dei existentiam & Attributa. Omnis de Deo notitia Naturalis acquisita hauritur ex creaturarum consideratione.

sideratione. Est igitur aliquid in creaturis commune, quo ad agnoscendas Dei sive existentiam, sive, ea præmissa, perfectiones deducamus. Talis est pro existentia Dei v. g. *contingentia rerum omnium*; pro attributis *Ordo rerum & constantia, & nexus &c.*

Secundus itidem *Theologicus*, pertinet aliquo sensu ad naturalem, aliquo ad supernaturalem Theologiam, præliminariter saltim. Dum enim ostenditur, leges motuum in corporibus, & successiones perceptionum in spiritibus non esse immutabiles & necessarias, sed ex divina sapientia & libertate statutas, & divino etiamnum influxui subjectas: Inde intelligitur posse Deum facere *miracula*, tum in corporibus sive totalibus Mundi sive partialibus, tum etiam in spiritibus, cujusmodi sunt prophetiæ.

Tertius usus est *Moralis s. Politicus*.

Si, per tradita cosmologiæ, nexus est in rebus, sequitur, ut *fines* obtineas, utendum esse *mediis*, ferendas igitur leges, proponenda cum pœnis præmia. Et qualia illa esse debeant, ex natura illius nexus potest & debet colligi.

Quartus

Quartus est Metaphysicus; nisi enim ex Cosmologia nexus rerum teneas, non potes in posterum ostendere, dari fines in hoc universo divinos; non potes de perfectione Mundi ea differere, quæ necessaria sunt in capite de providentia; & quæ sunt similia.

§. 115.

Atque hæc est ratio, cur *Cosmologia* præmittatur *Psychologiæ* & *Theologiæ* Naturali. Sequitur *Ontologiam*, quia principiis utitur *Ontologicis* in propositionibus demonstrandis, tum etiam terminis *Ontologicis* in definiendo.

CAP. I.

De

Mundi Definitione, & iis,
quæ hinc consequuntur.

§. 116.

Mundus.

Mundus est congeries rerum multabilium cum simultanearum, tum successivarum inter se conexarum.

§. 117.

§. 117.

Definitionis hujus realitatem *Schol.*
monstramus à posteriori, quoniam
mundus, qui existit, tanquam in-
dividuum suam continet Speciem
s. Genus, nempe Mundum in ge-
nere. Log. §. 105.

§. 118.

Quodsi enim Mundi hujus ad- *Examina-*
spectabilis contemplationem ge- *tur Defini-*
neralem instituamus, præter tellu- *tio.*
rem, quam incolimus, alia depre-
hendimus corpora totalia, veluti
Solem, Planetas & Fixas, quæ
tanquam partes compagem quan-
dam constituunt. In tellure ha-
bemus corpora partialia, quæ ali-
quandiu permanent. Unde elucet
dari in hoc universo res simultaneas,
quæ simul existunt. Corporum
partialium alia intereunt, alia ori-
untur, & cum totalia situm erga se
invicem mutant, tum partialia
continuis mutationibus subjacent.
Unde porro perspicuum est, *dari*
in hoc universo etiam res successivas,
quæ

quæ se invicem consequuntur. Mundus igitur f. Univerſum in genere, eſt quædam ſimultaneorum & ſucceſſivorum ſeries.

§. 119.

*Continua-
tio.*

Enim vero id multæ difficultatis eſſe videtur, num ſimultanea & ſucceſſiva ſint *inter ſe connexa*. Notandum itaque ea inter ſe *connexa* dici, quorum unum continet rationem alterius, nempe cur alterum una exiſtat, vel poſterius ſequatur prius. Talem verò in univerſo nexum denuo experientia ſuffultum deprehendimus.

Ex. gr. Sol eſt propter tellurem, quam illuminat & fœcundat, ut ab hominibus & animantibus habitari queat. Pluvia terram irrigat, ne calore Solis exuratur & plantis pabulum deſit. Imo in corporibus organicis pars una eſt propter aliam. Et in eo conſiſtit nexus ſimultaneorum. Nihil in Natura contingit, quod non ſuas *cauſas* habeat *efficientes*, in quibus ratio exiſtentiae ſuæ continetur. §. 8. & 7. principio rationis ſufficientis confirmiter. Atque in hoc conſiſtit *nexus ſucceſſivorum*. §. 120.

§. 120.

Denique notandum, quod qui- Continua-
tio.
dem per se patet, per *congeriem*
non intelligi quamcunque parti-
cularem, v. g. horologii, musi-
cæ &c. sed *universitatem rerum*
omnium. Ceterum cum in Theo-
logia Naturali demonstraturi si-
mus, mutuos rerum usus esse fi-
nes à Deo intentos; nexum simul-
tancorum esse dependentiam a
causis finalibus patebit; quemad-
modum jam constat, *nexum suc-*
cessivorum esse dependentiam a cau-
sis efficientibus. §. 119.

§. 121.

Sunt adeo in Mundo coëxisten- Continua-
tio.
tia connexa quoad *spatium* per
causas finales, §. 120. & 52. quo-
ad *tempus* per causas efficientes,
§. 54. 119. quamvis finalis in alte-
rum quoque nexum quodammodo
influat, atque sic *uterque nexus*
connectatur.

E

§. 122.

§. 122.

*Est ens
numm.*

Per causas igitur finales & efficientes Univerſum in eſſe ſuo determinatur, quibus variatis alius prodit mundus. Et hinc *obnexus* quoad ſpatium & tempus Univerſum eſt Ens *unum*, §. 19. corpora vero cum totalia, tum partialia cum eorum mutationibus ſ. ſtatibus diverſis, veluti partes *unum totum* conſtituunt.

§. 123.

*Mundus eſt
compoſitum
Ens.*

Cum Mundus ex compoſitis veluti partibus componatur, §. 122. ipſe quoque in numerum Entium compoſitorum referendus, §. 44. & ejus adeo eſſentia in modo compoſitionis ex diverſitate partium & combinationis determinando conſiſtit, §. 60. atque in eo ratio phænomenorum Univerſi continetur.

§. 124.

*Mundus eſt
Machina.*

Ceterum quia *machinae* ſunt entia compoſita, quorum operationes ad

ad regulas motus structuræ convenienter consequuntur, idem verò obtineat cum in singulis corporibus, experientia teste, tum in toto mundo, §. 123. *corpora* ac *Mundus Machinæ* lingua Physicorum appellantur, & omnia in universo *mechanice* fieri dicantur.

§. 125.

Apparet adeo, eum de corporibus *mechanice philosophari*, qui ^{*Mechanica philosophari.*} mutationes, quæ ipsis accidunt, ex eorum structuris, texturis & mixtionibus secundum regulas motus intelligibili modo explicat.

§. 126.

Ob *mechanismum* igitur datur ^{*Coroll.*} in rebus naturalibus *veritas*, §. 34. quo sublato *Universum* non distingueretur a *somnio*. §. 34.

§. 127.

Cum contingentis oppositum ^{*Contingentia Mundi.*} perinde ac ipsum possibile sit, §. 26.

26. per essentiam suam sufficienter determinatum non est, §. 16. Ut igitur existat, seu possibilitas compleatur, §. 11. aliud extra ipsum adsit necesse est, quod actum determinet, consequenter rationem contineat, qua possibilitas compleri intelligitur, §. 11. consequenter causa opus habet ut existat. §. 83. Quodsi igitur hæc causa itidem sit *contingens*, patet eandem denuo causa opus habere, ut ex stat, atque ita porro. Ut adeo *actus contingentis naturaliter non determinetur, nisi per seriem causarum, quæ a se invicem dependent ut effectus a sua causa.* §. 120. Ostendemus autem in Theologia naturali hanc seriem non posse continuari in infinitum, sed vi principii rationis sufficientis in causa aliqua prima necessaria terminandam esse.

§. 128.

Contin.

Enim vero cum entia composita in universo etiam a contiguis in actu

actû suo dependeant, veluti existentia corporis humani viventis ab aëre, quem respiramus, & â calore ambiente, quo fluiditas sanguinis conservatur vi nexus simultaneorum, §. 120. *actus contingentis præter seriem causarum successivarum etiam rerum simultaneousarum inter se connexarum supponit seriem; quæ dependentia corporum in actu suo a contiguitate aliorum in Physica distinctius explicatur. Contingentis itaque actus naturaliter non determinatur nisi per aliquod Universum.*

§. 113.

§. 129.

Unde evidens est, quod, quæ in *Coroll.* hoc mundo actum suum consequuntur, habeant in eodem *veritatem determinatam*, & quod non nisi ea evenire possint, quæ veritatem determinatam in eodem habent, cetera vero possibilia actum non consequantur.

E 3

§. 130.

§. 130.

Coroll.

Sunt igitur *Hypothetice necessaria*, §. 28. quæ tamen *hypothetica necessitas contingentiae non officit*, §. 29. cum absoluta tantum eidem repugnet.

§. 131.

*Necessitas
Physica s.
Naturalis
Mundi.*

Quoniam vero eventus rerum naturales sunt hypothetice necessarii, futuritio earum certa est. Vocatur hæc necessitatis hypotheticæ species, (quæ a constitutione universi & causarum serie pendet, seu, ut alii loqui amant, a præsentis rerum ordine), *necessitas Physica s. Naturalis*, quia in veritatibus Physicis s. rebus naturalibus obtinet, atque physicæ scientiæ fundamentum est.

§. 132.

Not.

Nondum nobis res est cum contingentibus illis, quæ ab actionibus hominum liberis dependent: de iis enim in psychologia agemus,
ubi

ubi libertatem humanam, & mentis cum corpore commercium explicabimus. Neque hujus est loci, ut inquiramus, quid Deus per Concursum extraordinarium efficiat, cum hoc argumentum ad Theologiam Naturalem pertineat.

§. 133.

Etsi autem hoc in universo seu præfenti rerum ordine non omnia contingentia actum consequantur, nondum tamen exinde cum Spinosa aliisque fatalis necessitatis defensoribus inferre licet, nullum alium possibilem esse ordinem rerum, quo & ipsa ad actum perducantur; quin attendenti contrarium patet.

Ex necessitate hypothetica nullum factum.

§. 134.

Quoniam contingentia opposita iis, quæ ad actum in hoc universo pertingunt, existere possunt, §. 26. etsi nunquam existant, nullius autem contingentis actus naturalis

Mundus est Ens contingens.

turaliter determinari possit, nisi per integrum aliquod universum, § 128. *plura omnino universa, seu si mavis, plures mundi possibiles sunt. Mundus adeo in numerum Entium contingentium est referendus.*

§. 135.

Ufus.

Hæc totius universi *contingentia* instar scalæ est, qua in Theologia Naturali ad Deum adscendimus, ejus existentiam necessariam & cetera attributa cognituri.

§. 136.

*Mutato aliquo eventu
Mundus
ille non
subsistit.*

Cum eventus contingens, qui à causis mere naturalibus pendet, per integrum Universum in actu suo determinetur, §. 128. si ponamus, ut naturaliter eveniat contrarium ejus, quod accidit, omnis præcedens universi status ab eo, qui in præsentī rerum ordine obtinuit, diversus ponendus est. Et quoniam vi nexus seu mutuæ depen-

dependentiæ in causarum contingentium serie, una causa mutata mutantur succedentes omnes, §. 133. in quantum antecedentes influunt in actum sequentium; si unus eventus contingens mutari ponatur in oppositum, sequens mundi pars non amplius erit eadem, quæ alias futura erat, §. 20. consequenter universum idem non subsistet. vi §. cit.

§. 137.

Quæ hætenus de Mundo seu rerum universo dicta sunt, simili quopiam illustrari possunt. Mundus enim fere se habet ut Horologium. *Illustratio per simile.*

§. 138.

Apparet autem, dum doctrina generalis de Universo, simili ab horologio desumpto illustratur, tertium comparationis minime esse modum agendi necessarium in oppositione ad libertatem hominis *Ufus comparationis.*

E 5 expen-

expensum, prouti argutantur, qui coram tribunali rationis causam dicere non didicerunt.

§. 139.

Scholion.

Hactenus de *nexu rerum corporearum*, qui sufficit ad id, ut necessitas *existentiæ* rationis supra mundanæ exinde erui possit.

§. 140.

Nexus spirituum,

Datur vero etiam nexus inter *spiritus*, & id quidem salva libertate.

§. 141.

ex ratione sufficiente.

Explicandus autem ille nexus ita uti *spiritibus* adscribi solet. Intelligitur ille, si noris, quid sit ratio sufficiens respectu spirituum? ex ratione enim sufficiente pendet nexus.

§. 142.

Quotuplex?

In spiritibus scilicet duo attenduntur, repræsentationes rerum
&

& appetitus. Oritur igitur *vel* ex repræsentatione appetitus, *vel* ex appetitu repræsentatio, *vel* ex repræsentatione una oritur altera, *vel* ex appetitu uno oritur alter.

CAP. II.

De Essentia & natura Corporum ac pendentibus inde affectionibus.

§. 143.

ENTia composita, ex quibus *Corpora.* tanquam partibus componitur Mundus, §. 122. corpora vocari solent.

§. 144.

Cum ergo Speciei competat, *Corporum eadem prædicata quæ Compositis.* quidquid generi competit, Log. §. 105. etiam corporibus omnes compositorum proprietates conveniunt; omnia igitur corpora sunt extensa, §. 49. & ob finitudinem determinatam habent magnitudinem, & spatium determinatum

tum replent, §. 46. determinata quoque gaudent figura, §. 57. divisibilia sunt, §. 59. oriri ac interire possunt citra cujus, piam ex nihilo productionem vel annihilationem, §. 61. locum mutare possunt, etsi ipsa maneant immutata §. 52. non aliam autem pati possunt mutationem, nisi quoad figuram, magnitudinem, partium situm, motum intestinum & locum, quem occupant, §. 65. ipsorum denique essentia in modo compositionis consistit, nempe in diversitate partium & combinationis, §. 60. consequenter in structura, si corpora fuerint organica, veluti corpus animale, & in mixtione atque textura, si in, organica, ut metalla.

§. 145.

*Mediante
motu omnia
in corpori-
bus acci-
dunt.*

Corporibus mutationes accidere possunt nullæ nisi mediante motu. Aut enim mutatur figura, aut partium situs, aut locus totius corporis, §. 144. Locum totius partium-

partiumque situm sine motu haud mutari posse manifestum est. §. 58. Figura mutatur partibus ablatis vel adjunctis, vel transpositis, §. 62. & magnitudinis variatio non alio modo fieri posse concipitur, consequenter figuræ etiam ac magnitudinis mutatio sine motu, nempe loci partium mutatione fieri nequit. §. 58. *Nulla igitur sine motu corporibus accidere potest mutatio.*

§. 146.

Experientia docemur, corpus *Vis inertia* motui resistere: unde est, quod non quævis vis movendo corpori cuicunque par sit, quemadmodum experiri licet, si alteri lanci, quæ fulcro supposito sustinetur, pondera diversæ gravitatis successive imponas atque lancem alteram deprimere nitaris sive sola manu sive contrapondio adjuta pondus elevaturus. Illud quo corpus motui resistit, vocatur termino Mathematicis solemni *Vis inertia*, itemque *Vis Passiva*. §. 147.

§. 147.

*Vis inertia
non ex Ex-
tensione.*

Cum extensio consistat in diffusionem multorum a se invicem distinctorum, sed simul unum constituentium, §. 49. *illa vis inertiae ex extensione non sequitur, sed in Extensio supponitur.* Quamobrem Cartesius à verò aberrat, dum naturam corporis in genere in sola extensione consistere arbitratur. Quoniam autem *vis inertiae* supponitur in eo, quod per sui diffusionem extensionem gignit, *extensione prior est.*

§. 148.

*Materia
corporis.*

Extensum vi inertiae praeditum nominatur *Materia* corporis. Corpus igitur ob materiam motui resistit. §. 146.

§. 149.

Actio.

Si corpus quiescens ab altero, quod in ipsum impingit, ad motum concitatur; in utroque quidpiam observare licet, quod antea non

non inerat. Nimirum movens movet, quiescens movetur. Cur movens moveat, ratio in ipso movente continetur, atque adeo agit, *reciproca.*
§. 80. cur quiescens moveatur, ratio extra ipsum, nempe denuo in movente quærenda, quia nimirum hac celeritate & directione impingit, consequenter ipsum patitur,
§. 80. Eodem modo perspicuum evadit, duo corpora *in se invicem simul agere, & a se invicem pati*, si secundum contrariam directionem in se mutuo impingentes a se invicem recedant.

§. 150.

Corpus adeo in motu constitutum vi agendi præditum est. *Coroll.*

§. 151.

Vis igitur activa corporum motui *locali* adhæret, qui cum fine dato celeritatis gradu, dataque directione concipi nequeat, nec vis activa corporum determinata celeritate atque directione carere valet.

§. 152.

§. 152.

Vis permanens in corporibus.

Quoniam vis illa celeritate, quemadmodum extensio figura limitatur, §. 57. modificatio vero in limitum variatione consistens concipi non possit sine re quadam permanente, quæ variis modis limitari potest; *vis quædam permanens in corporibus existit*, unde tanquam a principio motus consequuntur.

§. 153.

Motus continuus Materialis.

Quam ob rem cum vis Activa seu Motrix motui locali adhæreat, cum Viris illustribus *de Tschirnhausen* in Med. Ment. & *Leibnizii* in Actis Erud. An. 1695. p. 145. *omnem materiam in continuo motu concipimus*, etsi extus non semper adpareat, nec totum corpus locum mutet.

§. 154.

Natura.

Hæc vis activa corporum, unde actiones ejus pendent, §. 149. est id, quod Naturæ nomine compella-

runt veteres, ut adeo naturam habeat ens, quatenus vi activa præditum. Atque in eo corpus naturale ab artificiali distinguitur, quod illud præter essentiam atque materiam habeat naturam, hoc non nisi materiam atque essentiam.

§. 155.

Differt adeo natura cum a materia, quæ ex partium congerie resultat, §. 148. tum ab essentia, quæ in modo combinationis illarum partium consistit, §. 60. ut adeo in corpore *materia, essentia, & natura* distinguenda sint.

Materia, essentia & natura in corpore.

§. 156.

Cum ratio eorum, quæ rebus conveniunt, in essentia contineatur, §. 16. nulla autem in corporibus mutatio sine motu, §. 145. cui vis activa adhæret, §. 151. concipi possit; *mutationes, quæ corporibus accidunt, essentiæ ac naturæ eorum conformiter fiunt, seu*

His mutatio conformis.

F

per

per essentiam & naturam intelligibili modo explicari possunt.

§. 157.

*Natura rerum
universa.*

Quoniam omnis materia in universo in continuo motu subsistit, §. 152. vis activa per totum universum diffunditur, & per corporum conflictum seu mutuum impulsu continuo modificatur. Atque hæc vis in universum spectata dicitur *Natura rerum universa*, itemque *Natura simpliciter*. Liqueat igitur recentiorum nonnullos vocabulum naturæ tanquam terminum ignorantie perperam rejicisse ac sine ratione *Naturam* à veteribus defensam pro idolo venditasse.

CAP. III.

De Legibus Motus.

§. 158.

*Leges
Motus.*

Vis corporum tam passiva, quam activa in conflictu eorum

rundem juxta certas regulas modificatur, quas *Motus regulas* appellant, & in *Mechanica* recentiores *Mathematici* demonstrant. Insunt autem istis regulis *principia generalia*, unde demonstrari possunt atque solent, atque hæc principia *Legum naturalium Motus* nomine veniunt, & a *Mathematicis* sumuntur, non probantur: id quod *Metaphysici* est.

§. 159.

Quoniam corpus ob materiam *Materia* motui resistit, §. 148. se ipsum *movetur a* movere nequit, consequenter vi *causa qua-* principii rationis sufficientis *datur.* causa indiget ut moveatur.

§. 160.

Ex eodem principio rationis *Quies a* sufficientis sequitur, corporis motum, ad quem concitatum fuit, iterum *causa.* desinere non posse, nisi adsit causa externa. §. 93.

§. 161.

Etiam directio & celeritas.

Immo eodem modo patet, corporis moti *directionem* atque *celeritatem* mutari non posse, nisi adsit causa externa.

§. 162.

Prima Lex motus.

Corpus igitur *unum*, quodque in *statu suo* quiescendi vel movendi *uniformiter in directum*, hoc est, eadem celeritate & secundum eandem directionem, *permanet*, nisi a causa externa statum mutare cogatur, §. 158. 159. 160. quæ est *prima* lex motus naturalis, quam *Mathematici* sumunt ad regulas motus demonstrandas.

§. 163.

Nulla actio sine reactione.

Dum corpus motui resistit, in corpus movens reagit. Ponamus enim globum ligneum A suspensum ex filo CD quiescere, & alterum B ex argilla molliore confectum atque ex altitudine F demissum,

missum in istum incurrere, & ad motum eundem sollicitare: facto conflictu figura globi B mutabitur,

Fig. I.




Fig. I.

superficie convexa in G complanata. Quoniam illa complanatio fieri nequit, nisi ut partes quædam moveantur juxta directionem GI, quæ antea cum ceteris globi partibus movebantur secundum directionem GH, nullum autem corpus directionem mutet, nisi a causa externa, §. 160. evidens est, globum A motum contrarium imprimere, consequenter dum globus B in ipsum agit, in eundem reagere, ut adeo nulla sit in corporibus actio sine reactione.

§. 164.

*Quo major
massa corp
patient, eo
major re-
actio.*

Figura in globo B *magis* mutatur, si globus A *majoris* fuerit ponderis, quam si *minoris* fuerit, consequenter si massa cohærens, quæ nempe cum corpore ponderat & movetur, fuerit major, quam ubi minor. Unde perspicuum est, *reactionem fieri majorem si massa corporis patientis fuerit major.*

§. 165.

*Quo major
massa agen-
tis, eo ma-
jor actio.*

Si Globus incurrens B *majoris*, fuerit ponderis, & cum minori eadem celeritate moveatur; globum A *majori* velocitate movet, quam minor. Unde patet, *actionem esse majorem, si massa corporis agentis fuerit major*, §. 163. Et eodem prorsus modo intelligitur, actionem ejusdem corporis majorem esse, si *majori* celeritate impingat, quam si *minori*. Globus autem B majorem celeritatem acquirit, si ex *majori* altitudine demittitur,

*Quo major
celeritas eo
major actio*

§. 166.

§. 166.

Quoniam verò in iisdem casibus, Quo major actio, eo major reactio. ubi globus B vel majori velocitate impingit, vel majoris ponderis extiterit, major figuræ mutatio observatur, consequenter major quoque reactio adest, §. 162. *reactio ejusdem corporis patientis major est, si actio agentis major, quam si minor fuerit.* §. 164.

§. 167.

Cum corpus vi inertiae, qua Vis inertia determinatur quantitate actionis. motui resistit, §. 146. reagat; *vis inertiae*, etsi per omnem materiam diffusa, §. 193. per se tamen indeterminata, *quantitate actionis determinatur, atque adeo in conflictu modificatur.* §. 76.

§. 168.

Experiendo discimus, celeritatem corporis moti augeri, novo impulsu accepto, eandemque minui, si in aliud quiescens incurrat. Similiter directio non mutatur, ni-

Sine perensione nulla mutatio.

si novo impulsu ab alio incurrente accepto, ut adeo motus nec *producatur* nec *sistatur*, nec *augeatur*, nec *intendatur* sine percussione. Atque hæc conformia sunt *Legi naturali motus primæ*. §. 161.

§. 169.

*Vis activa
gradu cele-
ritatis va-
riatur.*

Percussio corporis majore celeritate lati, vel majorem massam possidentis major deprehenditur, quam ubi vel celeritas vel massa fuerit minor. Cum verò major concussio tanquam effectus major à majori vi proficiscatur, minor autem a minori; *vim activam corporum per integram quidem massam diffundi, sed gradu celeritatis variari patet.*

§. 170.

*Vis act. per
conflictum
modifica-
tur.*

Celeritatis variatio cum impulsui debeatur, §. 167. *vires corporum activas per conflictum modificari constat.*

§. 171.

§. 171.

Cum itaque manente eadem *Modificatio*
 massæ seu materiæ quantitate, §. 163. vis cum inertia, §. 166. tum *nec ab ex-*
 motrix, §. 169. per conflictum mo- *tensione nec*
 dificetur, ut nunc major, nunc *ab essentia*
 minor evadat; *virium modificatio*
ab extensione non pendet, §. 147. *ne-*
que etiam ab essentia corporum, quæ
 ab illa resultat, §. 144.

§. 172.

In conflictu corporum partes *Vis elastica,*
 sese mutuo contingentes compri-
 muntur: id quod in corporibus
 mollibus sensui obvium est, in ce-
 teris exinde colligitur, quod post
 impactum resiliunt, manifesto in-
 dicio, figuram *vi elastica* restitui.
 In corporibus post impactum resi-
 lientibus pressionem perinde ac in
 corporibus mollibus fieri, figuram
 vero vi elastica restitui, sequenti
 experimento confirmatur. Pila
 aëre inflata allidatur parieti vel ta-
 bulæ oleo illitæ; ubi resilierit cir-
 cellus

cellus in superficie oleo infectus major deprehendetur, quam pro contactu non impingentis. Obiter monemus per vim elasticam designari eam, qua compressa in statum pristinum restituuntur a vi comprimente liberata.

§. 173.

Restitutio.


Atque adeo una liquet, in conflictu corporum elasticitate prædictorum partes compressas situi pristino restitui, antequam corpora in se invicem impingentia a se invicem discedunt.

§. 174.

Quoniam corpus totum eadem celeritate progreditur, quin singulæ ipsius quantæcunque partes eadem celeritate moveantur dubitari nequit.

§. 175.

Fig. 2.



De-

Demonstratu facile est, corpora *In conflictu*
 A & B durante conflictu in eodem *corpora man-*
 spatio veluti immota teneri. Nam *ent immo-*
 in conflictu corpus B comprimit *ta.*
 quas in partes corporis A vi re- *Fig. 2.*
 actionis, adeoque urget corpus A
 juxta directionem AH. quod cum
 contrariis directionibus simul mo-
 veri nequeat, ulterius juxta dire-
 ctionem BJ progredi nequit. Sed
 nec corpus B secundum eandem
 directionem progredi valet, quam-
 diu juxta directionem A H reagit
 in corpus A, cum alias perinde
 contrariis directionibus una pro-
 gredi niteretur, quod absurdum.
 Corpora igitur A & B durante con-
 flictu sese mutuo immota tenent
 in spatio, ubi in se invicem impin-
 gunt,

§. 176.

Duo corpora sese invicem in *Actio & re-*
 eodem spatio veluti immota tene- *actio aequa-*
 re nequeunt, nisi eadem vi juxta *les.*
 directiones contrarias sese mutuo
 urgeant, cum nulla adsit ratio,
 cur

cur vis unius prævaleat adversus vim alterius, absque ratione sufficiente vero nil quidquam fieri possit; §. 7. in altero casu evidens est, fortiolem vim prævalere adversus debiliolem. In conflictu itaque corpus A & B sese mutuo eadem vi urgent, §. 174. atque hinc manifesta est *lex motus naturalis altera*, quod *actiones & reactiones corporum in conflictu sint æquales*,

§. 177.

Uterior explicatio.

Qui difficultates nectunt circa hanc naturæ legem, non attendunt corpus A non omnem vim suam ad actionem in corpus B impendere, sed non nisi eam partem, quæ ad hujus resistantiam impenditur infringendam. Ita ex. gr. equus trahens lapidem funi allegatum eam impendit vim in actionem, qua resistantiam lapidis infringit, *vi residua incedit secumque trahit lapidem.*

§. 178.

§. 178.

Quoniam corpora in conflictu, *Identitas*
 hoc est, durante actione & re- *celeritatis*
 actione in eodem spatio sese veluti *& directionis.*
 immota tenent, §. 174. cohærere
 quasi atque unum corpus consti-
 tuere intelliguntur. Unde *celeritas*
ea ratione per utrumque distri-
buatur necesse est, ut utrumque ean-
dem celeritatem acquirat & motum
secundum eandem directionem.

§. 179.

Ex principiis hætenus stabilitis *Ufus.*
 demonstrantur *regulæ motus cor-*
porum vi elastica notabili destituto-
rum.

§. 180.

Quodsi corpora A & B in se in- *Omnia cor-*
 vicem impingentia vi elastica in- *pora aliquo*
 structa fuerint, *celeritas per confli-* *elasticitatis*
ctum acquisita modificatur per ean- *gradu gau-*
dem. Etenim per conflictum par- *Fig. 2.*
 tes in contactu comprimuntur,
 sed vi elastica iterum restituuntur,

§. 171.

§. 171. 172. Ponamus ex conflictu corpori utrique motum acquiri juxta directionem B J. §. 177. Dum vi elastica restitutio fit in corpore B, corpus A secundum Directionem A H urgetur, atque adeo vis motus versus J retardatur. E contrario patet, facta restitutione in corpore A motum versus J accelerari. Quamobrem cum corpora, absoluto conflictu, aliquo intervallo à se invicem distent, etiamsi juxta eandem plagam & eadem fere celeritate progrediantur vi experientiae; *omnia corpora aliquo elasticitatis gradu gaudent.*

§. 181.

*Vis elastica
quantitate
ictus deter-
minatur.*

Vis elastica æquatur vi percussione, qua partes corporum in se mutuo impingentium comprimuntur, alias enim compressio foret major, nisi resistentia ex vi elastica orta pressioni foret æqualis. Evidens inde est, *quantitatem vis elasticæ per conflictum seu quantitate ictus determinari, perinde ac vim inertiae, §. 146.*

§. 182.

§. 182.

Quoniam actio corporis A in corpus B tanta est, quanta reactio corporis B in corpus A. §. 175. *Æqualitas virium elasticarum.* vires comprimentes utrinque æquales sunt, consequenter etiam vires elasticæ quibus partes compressæ corporum A & B restituuntur.

§. 183.

His ex principiis derivantur regulæ motus corporum *elasticorum*; juxta quas directio & celeritas in conflictu determinatur seu vis activa corporum modificatur: quemadmodum denuo videre est ex *Elementis Mechanicæ* Lib. Bar. de Wolf. *Ufus.*

§. 184.

Quæ de conflictu corporum hactenus demonstrata sunt, abunde docent, communicationem motus in conflictu corporum fieri *successive*, adeoque non in instanti, sed in tempore. *Successiva communicatio motus.*

§. 185.

§. 185.

Schol.

Leibnizius quidem alias adhuc proposuit leges motus naturales, ex quibus perinde ac ex hætenus explicatis motus regulæ deduci possunt, veluti, *quod motus perpetuus mechanicus sit impossibilis, quod effectus plenus sit viribus causæ æqualis, quod in conflictu virium eadem conservetur virium quantitas &c.* Enim vero leges non ea facilitate demonstrari possunt: quin potius ex regulis motus vi principiorum hætenus explicatorum demonstratis corollariorum instar deducuntur; aut per eas veritati consentaneæ comprobantur.

§. 186.

Regula motus non sunt absoluta necessaria.

Ceterum cum leges motus naturales, à quibus modificatio virium in conflictu corporum pendet, ex corporis essentia atque extensionis notione minime fluant, quemadmodum ex antecedentibus patet; *regulæ quoque non absolute necessariae*

sarvæ sunt, nec notioni materiæ atque corporis essentia repugnat, ut leges motus ab his essent diversæ.

§. 186.

Quamobrem cum corpora videntur agant & patiantur, *natura rerum ab absoluta necessitate libera*

CAP. III.

De

Naturali & Supernaturali.

§. 187.

Naturale dicitur, cujus ratio in *Naturale.* essentia & Natura corporum continetur; consequenter, quod per structuram organicorum & texturam mixtionemque inorganicorum atque regulas motus, juxta quas vires corporum modificantur, explicari potest.

§. 188.

Si quid vero contingat, cujus ratio in essentia & natura corporum non continetur, vel quod eidem

Supernaturale seu Miraculum.

G

non

prorsus contrariatur, consequenter, quod per structuram organico-
rum & texturam mixtionemque in-
organicorum atque regulas motus,
juxta quas corporum vires modifi-
cantur, explicari nequit, id *Super-
naturale* vocatur seu *Miraculum*.

§. 189.

*Possibilitas
Miraculo-
rum.*

Miraculum esse possibile antece-
dentia loquuntur. Quoniam enim
præter ea, quæ in hoc universo na-
turaliter actum consequuntur, alia
adhuc perinde ac ipsaabilia
sunt, §. 133. legesque motus non
sint necessariae, sed salva materia
atque essentia corporum diversæ
esse queant, §. 185. haudquaquam
repugnat, ut contra regulas motus
in universo mutationes producan-
tur juxta eas non subsequaturæ, vel
etiam in essentia corporum ratio-
nem nullam habentes. Istius-
modi igitur mutationes, conse-
quenter *Miracula*, §. 188. *possibili-
tatem intrinsecam habent*. In *Theo-
logia naturali* autem demonstrabi-
tur,

tur, quod nec *extrinseca* possibilitate destituuntur, cum per virtutem *causæ primæ* ad actum deduci queant.

§. 190.

Quoniam Miraculum actum *Schol.* consequi nequit, nisi detur ens ab universo diversum, cuius virtute ad actum deducantur possibilia in hoc universo naturaliter non determinata; evidens est ratio, cur miraculorum existentiam negent Athei, eademque cum Spinoza in Tr. Theol. Polit. c. 6. per *effectus insolitos* interpretentur, quorum ratio seu causa naturalis ignoretur. Quamvis etiam hanc miraculorum notionem tueri debeant, quotquot immutabilem necessitatem in rebus naturalibus agnoscunt ob dependentiam necessariam à causa prima sive Deo, vel ex aliis etiam rationibus. Unde apparet *in conclusionibus consentientes, non semper in principiis consentire.*

§. 191.

Schol.

Notio Miraculi *illustratur* motu indicis violento a causa externa, quemadmodum jam innuimus. §. 137.

§. 192.

*Miracula
producunt
effectus
alias.*

*non subse-
cuturos.*

In rerum natura effectus denuo fit causa alterius effectus, §. 127. Quamobrem si quis effectus *supernaturalis* seu *miraculosus* producat, in causam abiens naturaliter, hoc est, essentiae ac naturae corporeae conformiter, §. 124. *producet effectum alias in universo non subsequens tempus.*

§. 193.

*Miraculum
variat
mundum.*

Quod si ergo per miraculum non restituatur effectus, qui naturaliter ex causa aliqua secuturus erat miraculo non facto, seu effectu quopiam supernaturaliter in alium mutato; *per omne subsequens tempus mundus differet ab eo, qui futurus fuerat, miraculo non patrato, perinde*

perinde ac situs indicis in horologio per violentiam promoti vel retroacti per omne tempus, quo motus continuatur, diversi sunt ab iis, qui futuri fuerant, motu violento absente, nisi simili motu index situi restituatur, quem eo tempore habiturus erat ex horologii motu.

§. 194.

Nugantur, qui hinc arguunt, affirmari, quod corporum mundi totalium situs per miraculum in partiali patratum mutetur.

§. 195.

Miraculum igitur agnoscitur ex *Indicium*
defectu causæ naturalis, §. 187. 188. *miraculi.*
atque hæc est ratio, cur pro miraculo reputet vulgus, si quid *in-*
soliti accidit, cujus causa latet.

§. 196.

Quod si miraculo locus sit ex *Difficultas*
defectu causæ remotæ, tum quidem *circa mira-*
cula.

G 3

ægre

ægre a nobis agnoscetur, cum in causis proximis plerumque nostra rerum naturalium cognitio terminetur: quæ etiam ratio est, cur nexus rerum in universo vulgo non agnoscatur. §. 120.

§. 197.

Schol.

Obiter notamus, miracula in sacris relata arguere defectum causæ naturalis *proximæ*: cujus quidem ratio infra in *Theologia Naturali* patebit.

§. 198.

*Motus sine
reactione est
miraculo-
sus.*

Motus, qui juxta regulas motus non consequitur, non est naturalis, sed miraculosus, §. 188. quoniam nimirum vis motrix aliter, quam rerum fert natura, modificatur. Sed per regulas motus nulla fit communicatio motus sine reactione mobilis seu corporis, quod movetur. §. 175. Ergo *motus corporis, qui sine reactione consequitur, non est naturalis, sed miraculosus.* Eodem modo liquet, *naturaliter non moveri corpus sine percussione.*

Cap. V.

CAP. V.

De
Elementis.

§. 199.

MUNDUS ex compositis tan-
quam partibus componitur. *Simplicia
dantur.*

§. 123. Quodsi eorum particulas quantumlibet exiguas microscopio subjiciamus, eas adhuc ex partibus aliis minoribus, quæ nec oculo armato discerni possunt, componi observamus, v. gr. particulæ minutissimæ auri per exquisitissima microscopia sunt aurum, consequenter cum aurum sit corpus ex aliis simplicioribus massis mixtum, quantumlibet exigua auri particula ex aliis particulis miscibilium componitur. Neque vero in hac particularum divisione in alias minores progredi licet *in infinitum*, ita ut partes minores in infinitum componerentur ex aliis minoribus, cum ita ad sufficientem compositionis rationem non per-

veniremus, eâdem semper quæstione residua, unde vero partes illæ minores ortum trahant, quanto quanto intervalla progressus fueris. *Vi igitur principii rationis sufficientis admittenda sunt simplicia partibus carentia, unde partes compositorum tandem ortum trahunt. Eodem modo hic argumentamur, quo ab existentia causarum contingentium serie argumentamur ad causam primam necessariam.*

§. 200.

Elementa.

Hæc entia Simplicia, unde compositorum partes ortum trahunt, seu compositorum principia, dicuntur *Elementa*.

§. 201.

Coroll. 1.

Elementa igitur magnitudine, extensione, figurâ, motu intestino carent, nec spatium replent, atque a composito prorsus differunt.

§. 202.

Coroll. 2.

A vero igitur aberrant, qui elementis proprietates compositorum affingunt.

§. 203.

§. 203.

Quamobrem *exigua corpuscula*, Coroll. 3.
ex quibus tanquam partibus ma-
jora componuntur, pro elementis
perperam à philosophis *corpustu-
laribus* venditantur.

§. 204.

Elementa ista aut similia sunt, Elementa
sunt dissi-
milia.
aut dissimilia. Quodsi similia fo-
rent, discrimine intrinseco desti-
tuerentur. §. 12. adeoque nulla
foret ratio, cur hoc potius ordine
fese invicem exciperent, quam alio,
§. 8. consequenter permutatione
facta idem compositum inde resul-
tans persistere valeret. Sed cum
sine ratione sufficiente nil esse pos-
sit, §. 8. necesse est, ut *singula
Elementa sint dissimilia*, atque adeo
discrimen intrinsecum admittant.

§. 205.

Haud absimili modo de compo- Alia de-
monstratio,
sitis seu corporibus patet, in eodem
universo duo similia nec eodem
tempore, nec diversis temporibus
G 5 existere

existere posse: id quod a *Leibnizio* jam notatum. Demonstrationem vero aliam superaddimus. Contingentis scilicet actus cum naturaliter non nisi per aliquod universum determinetur, §. 128. duo corpora similia producta supponerent eundem prorsus rerum ordinem per tempora antecedentia, §. 116. id quod, utpote experientiae contrarium, est absurdum.

§. 206.

Schol.

De *omnimoda* loquimur *similitudine*; quæ enim in quibusdam differunt, non similia sunt. §. 21. Obiter hoc monemus ad arcendas *exceptiunculas* hominum de rebus non ex notionibus judicantium.

§. 207.

Schol.

Impossibilitatem actus similium in eodem universo *Leibnizius* in aprium produxit sub nomine *Principii indiscernibilium*, & foliorum ejusdem arboris experimento comprobavit, Epist. 5. §. 4. controversiæ

verfiæ cum celebri *Anglo Samuele Clarkio* agitatæ.

§. 208.

Quoniam rerum materialium ultimum principium sunt elementa, §. 200. ultimas quoque rationes eorum continent, quæ in rebus materialibus locum habent. Atque adeo a diversitate elementorum tandem omnis in composito diversitas emanat, 204. confequenter ubi composita five corpora ab his, quæ existunt, debent esse diversa, ibi *diversa quoque elementa* existant necesse est: quod est magnum principium ad demonstrandam *creationem universi ex nihilo*.

§. 209.

Arcetur igitur *materia primigenia*, quam per modum massæ uniformis, seu partibus solo numero & loco differentibus constantis, & instar *Vertumni* in quaslibet figuras mutabilis fingunt.

§. 210.

Quodsi igitur cogitemus, omnia universi spatiola, quantumvis minima,

a diversitate elementorum diversitas corporum.

non datur Materia primigenia.

Varietas in universo.

nima, tempusculo quantumvis minimo aliter aliterque repleri, quin *maximam* rerum in universo *varietatem* stupeamus fieri nequit.

§. 211.

*Elementa
sunt finita.*

Elementa dissimilia sunt, §. 204. & ejusdem tamen generis, §. 105. Log. tanquam rerum materialium principia, §. 200. Entia igitur *infinita* esse nequeunt, sed *finita*. §. 78.

§. 212.

Corol.

Vim adeo habent, qua status interior continuo mutatur, ea quidem lege, ut præsens rationem contineat sequentis, §. 79. Quamobrem cum constanter dissimilia sint, §. 204. *quovis momento in cujuslibet statu observari quidpiam datur, quod in altero haud continetur.*

§. 213.

*Diversitas
corporum
e divers.
Elemento-
rum.*

Cum ratio sufficiens adesse debeat, cur quovis momento quodlibet elementum hoc vel isto modo cum ceteris existat, §. 8. in spatio
autem

autem ob partium uniformitatem, & per eandem rationem in tempore istius modi ratio reperiri nequit; *quærenda erit in interno elementorum statu*, §. 212. quæ conspirant cum effato, quod *omnis diversitas in composito emanet ex diversitate elementorum*, sive composita ut in quiete in statu momentaneo spectes, sive variata per motum.

§. 214.

Cum hoc pacto elementa inter se consentiant, ita ut status unius sit veluti interpret status alterius, §. 213. in composito hinc enascitur *perfectio*, §. 35. Cum porro composita perinde ac elementa inter se connectantur, ita ut ratio status unius contineatur in altero, §. 119. non minus eadem inter se consentiunt, atque ita enascitur *totius Universi perfectio*.

§. 215.

Qualis illa vis sit, qua continuo status Elementorum internus variatur,

*Ignota Vis
Elemento-
rum inter-
na.*

riatur, nondum satis constat. Equidem *Leibnizius* elementis rerum materialium perinde ac substantiis simplicibus ceteris *vim percipiendi* tribuit, ita ut universum repræsentent obscure, sibi minime eorum conscia, quæ repræsentant, atque omnes substantias simplices *Monades* adpellat; sed cum nondum adpareat, quomodo ex elementis tanquam substantiale rerum materialium vis motrix in compositum derivetur, *Leibnizio* nondum subscribitur.

§. 216.

Omnia simul spatium replent.

Quoniam modus coëxistendi cum ceteris in unoquoque elemento per id determinatur, quo unoquoque momento a ceteris intrinsece differt, §. 213. unius cujusque modus coëxistendi cum ceteris ab alio quocunque differt, atque adeo unum extra alterum existit, §. 43. consequentur *omnia simul spatium replent*, §. 52.

§. 217.

217.

Patet adeo, quod *ex simplici* Ex simplici
enascitur
compositum. *enascatur compositum.* Cessant autem difficultates, quod substantiæ simplices, quas Elementa concipimus, differant a punctis Zenonicis, quæ tanquam puncta Mathematica imaginamur, quorum unum ab altero non differt, nec intrinsece, quidpiam habet, quo ejus ab altero contiguo *inseparabilitas* foret manifesta, & quod alterius contiguitatem exigit.

§. 218.

Cum exquisitissima microscopia, A posteriori
nulla inda-
gatio Ele-
mentorum. quibus objecta mirum quantum augentur, in naturaliter mixtis non detegant mixti particulas, §. 199. *ut elementorum rationem à posteriori indagamus fieri sane nequit*, §. 200. Inde tamen nihil incommodi in *Physicam* redundat, quoniam phænomenorum tantum in sensus incurrentium rationes proximas investigamus, nec de
ulti.

ultimis ex natura Elementorum derivandis, §. 208. foliciti sumus.

§. 219.

Schol.

Interea in *Metaphysicis*, ubi de primis rerum principiis foliciti sumus ad talia attendendum est, ut ex *Physicis* conceptus *chimærici* proscribantur.

§. 220.

Schol.

Hinc in explicandis corporum viribus acquiescimus in fluidis subtilibus, quæ ipsorum poros replent, veluti dum vim gravitatis & vim elasticam in *physicis* concipimus: atque in divisione materiæ in corpusculis subsistimus, in *minimis* corpusculis cohæSIONem a motu conspirante, qui fit secundum contrariam directionem eodem celeritatis gradu; in *majoribus* etiam a figuris derivamus.

CAP.

CAP. VI.

De Perfectione & Ordine
Universi, Cursuque Naturæ.

§. 221.

Perfectio Mundi in eo consistit, *quod rationes istæ particulares tandem in rationes generales communes resolvantur*, atque mundus ideo perfectionis capax, quatenus res in eodem occurrentes inter se connexæ, hoc est, a causis finalibus atque efficientibus pendent.

*Perfectio
Mundi in
quo consi-
stat.*

§. 121.

222.

Ob infinitam autem rerum varietatem, quam comprehendere supra vires nostras positum est, §. 210. fieri nequit, ut perfectionem totius, quod existit, Universi comprehendamus.

*Totam com-
prehendere
non possu-
mus.*

§. 223.

Quodsi ergo ex parte judicare volueris de toto, fieri sane potest, ut a veritate aberres, cum in parte

*ex parte
astimari
non debet.*

H

subinde

subinde admittenda sit imperfectio, ob perfectionem totius. §. 38.

§. 224.

*Continua-
tio.*

Imo ex eadem ratione contingit, ut nobis imponamus, si tantum de corporum atque status *no-
stri* perfectione in singulari judicare voluerimus.

§. 225.

*Perfectio
Mundi ni-
titur suis
regulis.*

Quoniam autem omnis perfectio suis nititur regulis, unde aestimatur, §. 36. mundi quoque perfectio *regulas* habeat necesse est, quibus continetur. Istiusmodi regulæ sunt leges motus naturales, §. 161. 175. 184. danturque aliæ complures, veluti *naturam agere via brevissima, in natura nil fieri per saltum.*

§. 226.

*Judicium
de imperfe-
ctione in
parte.*

Cum ~~ex~~ regularum conflictu *ex-
ceptio* oriatur, unde imperfectio in partem redundat, §. 38. in universo autem perfectio suas quoque habeat regulas, §. 225. patet ratio, unde imperfectiones in partibus
universi

universi subinde resultant, veluti cur monstra generentur, cur extraordinariæ tempestates ingruant &c. *Optica* rem præsentem egregie illustrat, ubi salvis iisdem regulis objecta diversa eodem modo in oculo repræsentantur.

§. 227.

Facile autem adparet, Mundum esse perfectiorem, ubi exceptiones rariores, major rerum consentium varietas, & rationum generalium numerus major. §. 39.

*Gradus perfectionis
Mundi.*

§. 228.

In mundo perfecto coëxistentia & successio rerum variarum rationibus generalibus, §. 221. adeoque eodem modo determinatur, consequenter in modo, quo res juxta se invicem collocantur, vel se invicem sequuntur, adest similitudo, §. 21. quæ cum ex perfectione resultet, regulis quoque nititur, quæ ex perfectionis regulis deducuntur.

*Similitudo
ex perfectione.*

§. 229.

Ordo Naturæ.

Leges motus sunt regulæ perfectionis universi, §. 225. ex legibus motus autem derivantur regulæ conflictus, §. 157. regulæ adeo conflictus sunt ex illarum numero, quibus continetur *Ordo Naturæ*. Et sane constat ex recentiori *Astronomia*, esse regulas motus, juxta quas corpora Mundi totalia, ipsi etiam Cometæ in spatiis cœlestibus moventur, a Keplero inventas, quæ veluti leges atque jura *Poli* spectandæ.

§. 230.

Ordo Mundi cum perfectione non confundendus.

Quoniam regularum rationes in rationes generales communes tandem resolvuntur, §. 228. 221. ordo naturæ perfectus est §. 35. Etsi enim regulæ constantes, juxta quas res variæ juxta se invicem collocantur, vel se invicem subsequuntur, ordinem pariant, §. 32. earum tamen consensus, seu dependentia ab iisdem rationibus generalibus demum perfectionem largitur,

largitur, §. 35. id quod notandum est, ne ordinem cum perfectione confundamus, quæ ab illo diverſa de eodem prædicatur.

§. 231.

Eventus in univerſo naturales Natura curſus. per eſſentiam corporum atque regulas motus determinantur, §. 187. atque adeo ſecundum naturæ ordinem conſequuntur, §. 229. Eventuum igitur eſſentiis corporum atque regulis motus conformis conſecutio Naturæ curſus appellatur.

§. 232.

Miracula cum per eſſentiam corporum atque regulas motus non conſequuntur, §. 188. & naturæ curſui contraria ſunt, 231. & naturæ ordinem turbant. §. 229. Miracula turbant ordinem naturæ.

* * * *

H. 3 Pſy-

Psychologiæ Prolegomena.

§. 233.

Psychologia.

P*psychologia* est Scientia animæ, eorumque quæ in anima contingunt; seu est ea pars Metaphysicæ, quæ agit de Anima. §. 2.

§. 234.

*Dividitur
in*

Dividitur illa in duas partes, quarum altera *Psychologia Empirica* dicitur, altera autem *Psychologia Rationalis*.

§. 235.

Empiricam

&

Psychologia Empirica est ea Psychologiæ pars, ubi traduntur quæ de anima a posteriori innotescunt.

§. 236.

Rationalem.

Psychologia Rationalis est Psychologiæ pars altera, qua rationes eorum redduntur, quæ de anima in parte Empirica annotantur.

§. 237.

§. 237.

Pars itaque Empirica *præcedit* Empirica
rationalem, atque adeo illa prior *præcedit*,
est, hæc posterior, & ex princi- *Rationalis*
piis rationalis theses empiricæ in- *sequitur.*
ſtar concluſionum deducuntur.

§. 238.

Cum pars *Empirica* contineat *illa conclu-*
concluſiones, pars *rationalis* de- *siones hæc*
monſtrationes, §. 237. illa Logicæ *demonſtra-*
atque Philoſophiæ practicæ, præ- *tiones conti-*
fertim Ethicæ principia ſuppedi- *net.*
tat, hæc autem in illas diſciplinās
nullo modo influit.

§. 239.

Quodſi adeo vel maxime veritas *adeoque*
in rationali acu non tangatur, *nullum ex-*
inde dam-
num.
nulum tamen hinc *damnum* Logicæ
atque Philoſophiæ practicæ, Ethicæ
nimirum atque Politicæ metu-
endum.

§. 240.

His præmiſſis plenius definitur *Def. Psycho-*
H 4 *logia.*

tiva virtutum sufficientia, dehortamenta vitiorum efficacia, invenire media conciliandis hominum animis, gerendisque rebus idonea velit; Certum est, illum uti notitia de animis hominum, & sine illa nihil agere; eaque ipsa de causa doctrinæ moralis auctores solere suis commentationibus de anima tractationem exemplo Ill. Pufendorffii præmittere; secutos hac in parte Medicorum facta, qui neglectas a physicis partes, tanquam derelictas occupare necessariu habuerunt, ne carerent Præliminariibus Physiologiæ, Botaniciæque & Chymiciæ dogmatis,

§. 243.

Tertius Psychologiæ usus est *theologicus naturalis.* *Usus Theologicus naturalis.*

Dic, unde acquiris de Deo ideam? unde intellectus? Voluntatis? Bonitatis? sapientiæ? justitiæ notionem? Num ex conscientia tui interna hauris ideam intellectus & perfectionum ejus? additaque infinitudinis, h. e. omnitudinis possibilitium idea, elevas ad notionem attributi divini? Ego, cum audio, intellectum hominis esse faculta-

H 5

tem

tem repræsentandi aliqua distincte: Vice facultatis, concipio actum; vice aliquorum, concipio *omnia*; vice *successionis*, quæ in particularissimo repræsentationis distinctæ locum habet, concipio *simultaneitatem*, quæ sequitur ex *omnitudine*; & dico intellectum, qui omnia possibilia simul distincte repræsentat. Ita acquirō ideam intellectus divini. Atque ita procedo in ceteris.

§. 244.

*Usus pro
Theologia
Revelata.*

Quartus Psychologiæ *usus* est pro *Theologia Revelata*.

Potest enim hoc modo ostendi possibilitas operationum gratiæ; Possibilitas virtutum sublimiorum ex motivis per Christianismum accedentibus, ex illuminatione supernaturali &c. Possibilitas elevationis animæ post hanc vitam ad gradus cognitionis majores, eoque ad proemia & pœnas sensibilissimas.



Psy-

Psychologia Empirica.

SECTIO I.

CAP. UNICUM.

De Existentia Animæ.

§. 245.

Quilibet experitur, se sui aliarumque rerum extra se conscius esse, Log. §. 234. 237. id quod a nemine in dubium vocari potest, cum dubitando confirmetur. Unde enim nosti te dubitare, nisi fueris conscius? Cum verò existat, qui sui aliarumque rerum actu conscius existit, quin *nos existamus* dubitari nequit.

*Conscientia
sui & aliarum.*

§. 246.

Nititur adeo *existentiæ nostræ* cognitio sequenti Syllogismo:

*Demonstratio
existentiæ nostræ.*

Quodcunque Ens sui ipsius aliarumque rerum extra se conscius est, illud existit;

Atqui nos nostri aliarumque rerum extra nos actu conscii sumus;

Ergo nos existimus.

§.

§. 247.

*Confirma-
tur.*

Eadem ergo evidentia, qua existentiam nostri intuemur, etiam cognoscitur, quod per Syllogismos infertur, quorum præmissæ sunt propositiones evidentes, vel judicia intuitiva experientiis clavis superstructa, consequenter, quod demonstratur. Log. §. 220.

§. 248.

*Anima
quid?*

Ens illud, quod in nobis sui & aliarum rerum extra nos conscium est, *Anima* sive *Mens* adpellatur. Unde *animam* *existere* evidens est. §. 245.

§. 249.

Animæ ergo existentiam ante cognoscimus, quam existentiam corporis.

**SECTIO**

 SECTIO I.

 De Facultate Cogno-
scitiva.

CAP. I.

 De Facultatis Cognoscitivæ
Parte inferiore.

§. 250.

EX usu loquendi dicimur cogi- *Cogitare*
tare, quando nobis consciū *quid?*
sumus sive ejus, quod in nobis con-
tingit, sive eorum, quæ nobis tan-
quam extra nos exhibentur.

§. 251.

Quatenus mens objectum sibi *Perceptio,*
repræsentat, illud *percipere* dici- *Adpercep-*
tur; quatenus vero hujus *percep-*
tionis sibi est conscia, stilo Leib-
niziano eidem *Adperceptio* tribui-
tur. Objectorum repræsentatio-
nes vocantur etiam *Ideæ*.

§. 252.

Cogitatio itaque cum perce- *Cogitatio*
ptio

ptionem tum ad perceptionem involvit. §. 251.

§. 253.

*Differentia
idearum.*

Differunt perceptiones vel *formaliter* vel *materialiter*, hoc est, tum quoad modum repræsentandi, tum quoad objecta, quæ repræsentant.

§. 254.

Formalis.

Nimirum si perceptiones *formaliter* considerentur, vel *claræ* sunt vel *obscuræ*, & *claræ* porro vel *distinctæ* vel *confusæ*.

§. 255.

*Idea Clara.
Obscura.*

Clara dicitur *perceptio*, si rem repræsentatam ab aliis distinguimus; *obscura* autem si minus.

§. 256.

*Criterion
utriusque.*

Claritas ergo ab observato discrimine in varietate; *obscuritas* a defectu discriminis in varietate observati pendet.

§. 257.

Gradus claritatis.

Clariora igitur nobis evadunt, in quibus

quibus plura, quam ante, distinguimus.

§. 258.

Si ea, quæ in objecto distinguimus & per quæ ipsum ab aliis discernimus, assignare valeamus, tum perceptio vocatur *distincta*; in casu opposito adpellatur *confusa*. *Distincta.*
Confusa.

§. 259.

Distincta igitur perceptio enascitur ex claritate perceptionum partialium, ex quibus componitur. *Criterion.*

§. 260.

Sumus itaque in statu perceptionum distinctarum, si perceptiones rerum una repræsentatarum *partiales* fuerint *claræ*, etsi *confusæ*, hoc est, si perceptio *totalis* fuerit *distincta*. §. 258. *Status perceptionum*
Distinctarum.

§. 261.

E contrario in statu perceptionum confusarum, si perceptiones *partiales*, consequenter & *totalis*, fuerint *obscuræ*. §. 255. *Confusarum.*

§. 262.

§. 262.

*Facultas
Cognosciti-
va Inferior.
Superior.*

Facultatis Cognoscitivæ pars *Inferior* est, quæ objecta confuse & obscure repræsentat; *Superior* autem, quæ eadem distincte repræsentat.

§. 263.

*Diff. Mate-
rialis.*

Materialiter differunt perceptiones, quatenus objecta, quæ repræsentantur, vel sunt *præsentia* sensibus, vel *absentia*.

§. 264.

Sensationes.

Perceptiones, quarum ratio continetur in organis corporis nostri dicuntur *Sensationes*; organa vero corporis, in quibus ratio ista continetur, vocantur *Organa Sensoria*. Et facultas percipiendi objecta externa mutationem organis sensorii inducentia *sentiendi facultas* seu *sensus* adpellatur.

§. 265.

*Organa Sen-
soria.*

Cum quinque istius modi organa in corpore humano distinguantur, *Oculus* scilicet, *aures*, *nasus*,
lingua

lingua & papillæ ac fibrillæ nerveæ per totum corpus dispersæ; quinque etiam numerantur sensus, *visus* nimirum, *auditus*, *olfactus*, *gustus* & *tactus*, quorum definitiones singulares ad ductum generalis modo traditæ, §. 264. facile formantur.

§. 266.

Evidens autem est, sensationes ad animam referri, non quatenus mutationes in organis sensoriis accidunt, sed quatenus objecta percipimus; quæ istas mutationes inducunt.

Nota.

§. 267.

Differunt autem sensationes gradu claritatis, ita ut una alteram obscuret, omni ad perceptione prorsus cessante, §. 251. Quemadmodum enim *Optici* dudum instar Axiomatis sumfere, lumen majus obfuscare minus, lumen ex. gr. Solis lumen stellarum, ita similiter sonus major impedit minorem, odor major tollit minorem.

Gradus claritatis in sensationibus.

I

§. 268.

§. 268.

*Anima non
potest muta-
re sensatio-
nes.*

Nulla animæ potestas competit in sensationibus quidquam immutandi, v. g. *non ab ipsa pendet*, quale lumen Solis percipere velit. Forma illarum ab arbitrio animæ minime pendet, v. gr. anima efficere nequit, ut dulcedinem percipiat, dum linguam tangit amarum.

§. 269.

*Nec positis
ponendis
velle vel
nolle sentire.*

Neque in potestate animæ positum est, utrum *velit* sentire nec ne? dum objecta externa in organa sensoria rite constituta agunt, v. g. num *velit* oculis apertis videre objectum, quod radios in eosdem immittit; num *velit* audire sonum, qui in aures illabitur: num *velit* percipere odorem objecti, cujus effluvia odorifera cum aëre in Nares attrahuntur.

§. 270.

*Potestas ali-
qua in sen-
sus.*

Est tamen animæ aliqua potestas impediendi sensationes, quatenus organa sensoria avertere potest ab objectis, ne in ea agant.

§. 271.

§. 271.

Objectorum quæ sensibus percipimus, reproducere va-
lemus perceptiones, illis licet absentibus.
Et facultas producendi perceptiones rerum absentium *facultas imaginandi seu imaginatio* adpellatur.

§. 272.

Facilius autem ea imaginamur, *Quo clarius sensatio, eo clarius imaginatio.*
quorum perceptiones sensuales sunt distinctæ, quam quæ confuse percipimus, dum sentimus.

§. 273.

Accidit hinc, ut imaginatio *Impedimentum imaginationis.*
non singula clare satis repræsentet, quæ ad objectum pertinent: unde enascitur harum perceptionum *obscuritas* quædam, qua objecta, quæ imaginamur, distinguimus ab iis, quæ sentimus. *Sensatio* ob maiorem gradum claritatis *obfuscet imaginationem.*

§. 274.

Quemadmodum autem sensatio *Cessante sensu clarius imaginatio.*
minus clara clarius adparet, clario-

ri absente, ita similiter perceptiones, quas producit imaginatio, *clariores* adparent sensationibus cessantibus, veluti in somno experimur.

§. 275.

*Ultior ex-
plicatio.*

Atque ea est ratio, cur his perceptionibus claritatem conciliaturi oculos claudamus, & cur vires imaginationis majores deprehendantur in tenebris & absentibus objectis, quæ præter oculum reliqua organa sensoria feriunt.

§. 276.

*Regula
Imagina-
tionis.*

Certam autem ad regulam se attemperat *imaginatio*. Nimirum si quæ simul percipimus, & unius perceptio denuo producat, sive sensuum, sive imaginationis vi, *imaginatio producit & perceptionem alterius*. Maximi hæc regula per omnem philosophiam momenti est, quemadmodum in progressu patebit. Vocabimus eam *Legem imaginationis*.

§. 277.

§. 277.

Claret hinc somniorum ratio, Ratio som-
quæ à sensatione nondum experge- niorum.
facti ortum trahunt, & ab imagi-
natione juxta legem ipsius conti-
nuantur.

§. 278.

Tendit autem imaginatio non Alia ima-
modo ad olim percepta, sed etiam ginationis
vires suas exercet circa alia, quæ activitas.
sensu nondum percepit, dum vel
absque ratione sufficiente olim per-
cepta dividimus & componimus.

§. 279.

Prior imaginandi modus dicitur Facultas
facultas fingendi, & ideæ, quæ eo fingendi,
producentur *figmenta*; ubi tamen prior.
notandum est, fingentibus sæpis-
sime prodire figmentum diversum
ab eo, quod intenderant, cujus
ratio ex lege imaginationis haud
difficulter liquet. §. 276.

§. 280.

Posteriori imaginandi modo ni- Posterior.
tatur ars inveniendi architectorum.

Utuntur arte ex eodem fonte derivata, qui sermones sacros ex *Postillis*, uti dicuntur, & *Concordantiis* ex scribunt, &c.

§. 281.

Memoria.

Habemus quoque facultatem ideas reproductas recognoscendi, quod eadem sint, quas antea jam habuimus, v. gr. nos jam videre hominem, quem jam ante vidimus, vel hominis alias visi, etsi nunc absentis, imaginem oculis nostris oberrare. Atque hæc facultas est proprie illud, quod *Memoriam* adpellamus.

§. 282.

Schol.

Vulgo memoriam imaginantur veluti quoddam idearum receptaculum, in quo condantur, & unde rerum usu exigente denuo promantur, atque talia fingentes reproductionem idearum ad memoriam quoque referunt.

§. 283.

*Subtilis
Memoria.*

Facile autem memoriæ mandantur,

dantur, quæ vel *diu* intuemur, vel *sæpius* percipimus, vel *frequenter* repetimus.

§. 284.

Contrariæ rationes sunt Oblivionis, quæ memoriæ defectus est, adeoque impotentia ideam denuo oblatam recognoscendi, vel eam reproducendi. *Oblivio.*

§. 285.

Perceptionum præteritarum reproductio cum memoria copulata Reminiscentia adpellatur. *Reminiscentia.*

§. 286.

Memoria autem & imaginatio suis gaudent gradibus, qui vel à *multitudine* perceptionum una reproductarum vel a *facilitate* easdem memoriæ mandandi pendent. *Grādus Memoria & imaginationis.*

§. 287.

Inde est, quod vires imaginationis atque memoriæ extendere liceat, accedente exercitio.

CAP. II.

De Facultatis Cognoscitivæ
Parte Superiori.

§. 288.

A confusa perceptione ad distinctam non per saltum progreditur mens nostra, sed per gradus. Quamobrem cum facultatem cognoscitivam exposituri docere teneamur, §. 262. quænam circa cognitionem distinctam observentur, singulos istos gradus intermedios annotari convenit.

§. 289.

Attentio.

Deprehendimus in anima facultatem efficiendi, ut in perceptione totali partialis quædam clarior evadat ceteris, & claritate sua ceteras veluti obfuscet, §. 267. Atque hæc facultas *Attentio* salutatur.

§. 290.

*Attentio
augeri &
impediri
potest.*

Attentionem continuo exercitio
intendi posse constat; cujus rei ex-
emplum

emplum offert *Archimedes* in meditationibus suis Geometricis ita ad rem attentus, ut militem in conclave irruentem non agnosceret. *Impeditur* autem attentio cum a sensibus, tum inprimis ab imaginatione, si sensationes multum habeant claritatis, atque perceptiones ab imaginatione reproductæ cum affectibus jungantur.

§. 291.

Quodsi attentionem nostram *Reflexio.* successive in aliis aliisque partibus perceptionis totalis defigamus atque perceptionum partialium inter se collatarum diversitatem aut similitudinem intueamur, super re percepta *Reflectimus.*

§. 292.

Dum super re percepta reflectimus, atque beneficio memoriæ, *Notio Universalis.* certi reddimur, nos perceptiones rerum ejusdem speciei imaginationis vi reproductas, 271. jam ante habuisse, easque cum præsentibus comparantes earundem similitu-

dinem intuemur; notiones specierum universales acquirimus, Log. §. 105. quæ cognitionis Universalis prima fundamenta sunt. Nam per notiones proprie designamus repræsentationes *generum, specierum atque individuorum.*

§. 293.

*Reflexionis
ejus.*

Eadem vero reflexione pervenimus ad notiones distinctas, Log. §. 78. ut adeo pateat, quinam sit *transitus* a cognitione singulari ad universalem, §. 292. & a confusa ad distinctam.

§. 294.

Intellectus.

Facultas res distincte repræsentandi, quam superiorem facultatis Cognoscitivæ partem appellavimus, *Intellectus* fert nomen, unde intellectus a sensu atque imaginatione, §. 264. 271. formaliter, seu modo repræsentandi differt.

§. 295.

*Analysis
notionum.*

Dantur autem Notionum distinctarum gradus. Major nempe gradus

us adest, si in partibus, quas in perceptione totali distinguimus, plures partes discernimus, quam si pauciores. Quod si notio varietatem tantum in volvat, quæ tanquam varia distinguuntur, partium instar considerantur. Atque hoc ipso continetur notionum distinctarum in alias simpliciores continuata *Analysis*.

§. 296.

Hinc intellectui tribuitur *Profunditas*, quæ est facultas ^{Profunditas.} notiones distinctas in alias simpliciores continuo resolvendi, atque tanto major est, quo longius *Analysis* continuare licet.

§. 297.

Differt autem profunditas ab *Acumine*, quod est facultas multa ^{Acumen.} in eodem objecto distinguendi, atque adeo cum profunditate conjunctum acumen illam reddit perfectiorem.

§. 298.

§. 298.

*Intellectus
purus.*

Quoniam distincta cognitio ad intellectum, confusa ad sensus & imaginationem refertur, §. 294. Intellectus a sensu atque imaginatione prorsus liber, ubi notio nil confusi atque obscuri involvit, *Purus* adpellatur.

§. 299.

*Non datur
plane purus.*

Etsi autem intellectus noster nunquam prorsus purus deprehendatur, cum notionum Analysis nunquam â nobis ad finem perducat; intellectum tamen *purum* non esse Mathematicorum figmentum, Algebrae exempla ad eum prope accedentia docent.

§. 300.

*Facultas
abstrahendi.*

Quando ea, quæ in perceptione distinguimus, tanquam a re percepta sejuncta intuemur, *abstrahere* dicimur, & eatenus *menti facultas abstrahendi* tribuitur.

§. 301.

§. 301.

Quoniam vero actu separari nequeunt, quæ in ideis rerum continentur; tum res ipsas, tum quæ in iis distinguimus, verbis tanquam *signis*, Log. §. 115. designamus, atque ita citra confusionem exhibentur, quæ ad unam quamque notionem distinctam pertinent.

Ufus Terminorum.

§. 302.

Hinc duplex nascitur cognitionis discrimen. Aut enim ipsas rerum ideas intuemur, aut verbis tantum enunciamus, quæ in ideis continentur, vel aliis signis eadem repræsentamus. Prior cognitio dicitur *Intuitiva*, posterior *Symbolica*.

Cognitio Intuitiva, Symbolica.

§. 303.

Exempla aliorum signorum præter verba sunt in Arithmetica notæ numericæ, in Astronomia signa Planetarum, in Algebra signa quantitatum & operationum Arithmeticarum, in arte saltatoria signa saltatoria.

Ufus signorum.

saltationum, quæ ingeniosus quidam Gallus Feuillet invenit, in Musica notæ Musicæ &c. De signorum differentia & usu agendum est in Arte characteristica, quæ hætenus inter desiderata ponitur.

§. 304.

*Judicare,
quid?*

Dum, quæ in Ente distinguimus, ab ipso quoque distinguimus, v. gr. ignitum à ferro ignito, sed tanquam ipsi inexistent, aut ad idem pertinens consideramus, judicare dicimur. Idem fit in casu opposito, ubi aliquid ab eo diversum tanquam eidem non inexistens notis repræsentamus.

§. 305.

*Experiri,
quid?*

Quæ ad perceptiones nostras attenti cognoscimus, experiri dicimur. Unde liquet, experientiæ deberi notiones à sensibus derivatas, §. 292. atque judicia intuitiva ex perceptione complexa formata.

§. 306.

§. 306.

Quoniam perceptio complexa, *Vitium*
 vi cuius diversa à subiecto in eodem *Subreptionis.*
 repræsentantur, est fundamentum
 iudiciorum intuitivorum, quæ experientia debentur, §. 305.
 opera inprimis danda est, ne de
 subiecto aliud prædicemus, quam
 quod in illa perceptione continetur,
 nec subiecti alias determinationes
 admittamus, quam quas perceptio
 ista involvit. Secus qui faciunt,
 Vitium Subreptionis committunt,
 & ad experientiam referunt, quæ
 ab eadem aliena. Inde autem experiendi
 difficultas manat.

307.

Dum vi verborum seu vocum *Prærogativa Symbolica.*
 singula discernuntur, quæ in notatione
 complexa continentur, §. 301. usus
 cognitionis symbolicæ in dijudicando
 apparet, §. 302. utpote quæ iudicia
 distincta reddit. §. 258. Atque hinc est,
 quod eam in iudicando cognitioni
 intuitivæ præ-

præferentes, dum judicamus, nobis met ipsis tacite loquamur, verbis minimum mentem subeuntibus.

§. 308.

*Similitudo
casuum.*

Quoniam quæ rebus inesse vel accidere experimur, raro necessario insunt, sæpius non nisi in determinato quodam statu inesse vel accidere possunt, vi experientiæ certum est, fore ut idem insit vel accadat, subjecto in eodem statu posito, seu ut generatim, in casu simili, v. gr. ut ferrum candeat, si carbonibus candentibus folle inflatis imittatur.

§. 309.

*Expectatio
casuum si-
milium.*

Quatenus ergo homines in actionibus suis Empirici sunt, hoc est, easdem secundum experientiam moderantur, casus similes expectant, in quibus imitantur olim facta. Sunt autem plerique homines, nec illis exceptis, quorum consiliis regitur mundus, in plerisque

risque actionibus Empirici olim facta in casu simili imitantes.

§. 310.

In hac vero imitatione latet tertia mentis Operatio, perinde ac cum nominibus obvia entia distinguimus.

Fit mediante tertia mentis operatione.

§. 311.

Quodsi cognitio confusa in distinctam abeat, prior modus argumentandi redit ad Canonem; Cui competit definitio, illi competit definitum; posterior vero ad alterum: quidquid competit generi vel speciei, illud etiam competit Speciei sub genere, vel individuo, sub isto genere, vel sub ista specie contento. Nullæ enim inferuntur conclusiones affirmativæ, quæ non hisce regulis universalibus contineantur, cum ens in determinato quodam statu constituat veluti certam speciem subalternam.

Dux istius operationis regula.

§. 312.

Judicia, quæ ex duobus aliis hac
K ratione

Syllogismus.

ratione eliciuntur, vocamus Discursiva, & operatio animæ, qua judicium discursivum formatur, Ratiocinium vocatur, cujus præsentatio Symbolica proprie Syllogismus audit.

§. 313.

Usus Syllogismi.

Ufu autem non contemnendo eminet Syllogismus, si quidem distincte explicare voluerimus, quomodo ex præfenti aliqua sensatione non interrupta serie ceteræ perceptiones deducantur, quæ mentem successive subeunt, donec ista series nova sensatione interrumpatur.

§. 314.

Idem modus cogitandi omnium.

Apparet hinc *primo* communem cogitandi modum non differre a demonstrationibus Geometrarum, §. 220. Log.

§. 315.

Diversi animæ status e judiciis cognoscendi.

Apparet *secundo*, quodlibet judicium peculiarem exprimere animæ

mæ statum, nimirum in primo ratiocinio iudicium intuitivum refert statum præsentem, iudicium alterum, quod succurrit, status præteritos plerumque plures, & iudicium, quod infertur discursivum, statum sequentem, qui enascitur ex præsentis vi præteriti. Ut adeo nunc comprehendamus, quomodo in anima ex statu præsentis per præteritum imprægnato enasci possit sequens.

§. 316.

Apparet tertio, literis operam navantes à naturali cogitandi modo deflectere & facultatem cognoscitivam corrumpere, si vel confuse percepta memoriæ infigant, vel demonstrata non naturali ordine evolvant, ut ne Matheſeos studio perficiatur intellectus.

Ordo transferendum.

§. 317.

Parit autem demonstratio scientiam; quippe quæ absolvitur habitu asserta ex principiis indubitatis demonstrandi. Log. §. 18.

Demonstratio parit scientiam.

K 2

§. 318.

§. 318.

*Ars inven-
niendi.*

Sunt, qui habitu pollent ex quibusdam veritatibus cognitis alias incognitas eliciendi, quem *Artem* inveniendi adpellamus.

§. 319.

*Unde fun-
damenta
Matheseos?*

Cum ex cognitis inveniuntur veritates incognitæ, primi inventores ex veritatibus plebi obviis, quæ invenere, deduxerunt.

§. 320.

*Principium
Reductionis.*

Ad inveniendum non modo ratiocinandi habitu opus est, §. 318. 313. 314. sed experiendo discimus, alia quoque artificia adhiberi, ex gr. *Principium reductionis*, quo casus, in quo quid quæritur, reducitur ad alium similem nobis cognitum, ut in Arithmetica additio ad communem numerandi diversæ speciei monetæ morem.

§. 321.

Ingenium.

Ad hoc quidem opus est, ut acumine polleas ad observandam simi-

similitudinem : quam facilitatem observandi rerum similitudines *Ingenium* vocamus.

§. 322.

Veritatum universalium nexum *Ratio.* demonstrationes loquuntur, Log. §. 105. quem intuendi facultas *Ratio* dicitur.

323.

Rationi *conforme* vocatur, quod *Rationi conforme.* cum veritatibus cognitis connectitur, seu ex iis legitima consequentia deducitur. *Contrarium* rationi habetur, quod veritatibus universalibus contradicit.

§. 324.

Rationi opponitur *Experientia,* *Experientia.* quæ nexum judiciorum intuitivorum ipsi debitorum cum veritatibus universalibus non patefacit. §. 305.

§. 325.

Hinc *duplex* datur cognoscendi *Duplex cognoscendi* *modus,* quorum alter dicitur procedere
K 3

cedere *à priori* sive per rationem, recto intellectus usu; alter autem *à posteriori* sive per experientiam, recto sensuum usu, ab intellectu, sicubi opus est, adiutorum.

§. 326.

Ratio pura.

Quamdiu ex solis notionibus *à priori* ratiocinamur, ratio pura est; sed ubi notionibus & judiciis intuitivis inter præmissas locus conceditur, ratio *pura non est*, id quod in ceteris disciplinis plerumque obtinet, præsertim in Physicis.

§. 327.

Mittimus ea, quæ de *certitudine* cognitionis humanæ, de *probabilitate*, de *opinionem*, de *erroribus* dici poterant, ne repetamus ea, quæ in Logica prolixè sunt tractata. Vid. Log. pag. 225-281.



SECTIO

SECTIO III.

De

Facultate Appetitiva.

CAP. I.

De Facultatis Appetitivæ
Parte Inferiore.

§. 328.

Pars Facultatis Appetitivæ Inferior est, quæ à perceptione confusa ortum trahit. A perceptione ad appetitum non fit progressus per saltum. Quamobrem omnis progressus distincte exponendus.

*Facultas
Appetitiva
Inferior.*

§. 329.

Dum rem perceptam contemplati ejus perfectionem intuemur, *Voluptas* oritur, quæ adeo cum Cartesio Epist. Part. I. per sensum seu intuitum perfectionis definiri potest; sive illa fuerit vera, sive apparens, hoc est, nostro saltem judicio, etsi erroneo.

Voluptas.

§. 330.

*Voluptas
mutabilis,
quo casu ?*

Si perfectio tantum fuerit appa-
rens, errore animadverso voluptas
evanescit, §. 329. atque hoc in ca-
su voluptas mutabilis; in casu op-
posito constans est.

§. 331.

*Gradus Vo-
luptatis.*

Intenditur autem voluptas tum
per gradus perfectionis, tum per
gradus certitudinis nostri de eadem
judicii. Unde est, quod artificii
opus consummatum insigni volu-
ptate perfundat artificem peritum,
cum idiota nil ejus percipit.

§. 332.

*Continua-
tio.*

Atque eadem est ratio, cur pro-
funda rerum cognitio adeo dele-
ctet intelligentes.

§. 333.

Tedium.

Ex sensu imperfectionis sive ve-
ræ, sive apparentis oritur *Tedium*;
ita enim Voluptatis Oppositum ad-
pellare licet. Quæ de mutabili-
tate, constantia, & gradibus vo-
lupta-

Iuptatis dicta sunt, valent etiam de Tædio.

§. 334.

Differt autem Tædium à nudo Status in-
voluptatis defectu, qui locum ha- different.
bet, ubi omnis & perfectionis &
imperfectiois sensus abest.

§. 335.

Differt etiam à dolore, qui ex Dolor.
solutione continui in corpore ori-
tur.

§. 336.

Quidquid nos statumque no- Bonum.
strum perficit, Bonum; quidquid Malum.
nos statumque nostrum imperfe-
ctiores reddit, Malum audit.

§. 337.

Unde quod Voluptatem parit Judicium.
sensuum iudicio Bonum reputatur;
§. 329. quod vero Tædium parit
Malum. §. 333. Hanc autem no-
tionem subinde fallere facile pa-
tet. §. 330. 333.

K 5

§. 338.

§. 338.

*Sensuum
nostrorum.*

Qui solo sensuum stant iudicio, gradus bonitatis atque mali ex gradibus voluptatis atque tædii seu doloris æstimare solent, qui tamen ex perfectionis vel imperfectionis nostri statusque nostri æstimandi sunt.

§. 339.

*Sensitivus
Appetitus
& Avers.*

Ex confusa boni repræsentatione oritur *Appetitus Sensitivus*; ex confusa mali repræsentatione *Aversatio Sensitiva*.

§. 340.

idem.

Est adeo *Appetitus Sensitivus* inclinatio mentis ad objectum pro ratione boni confuse in ea percepti.

§. 341.

idem.

Aversatio vero *sensitiva* est reclinationo mentis ab objecto pro ratione mali confuse in ea percepti.

§. 342.

*Status in-
differens.*

Differt a defectu appetitus, ubi nulla

nulla neque ad appetitum, neque ad averfationem adest ratio, cum objectum nec bonum, nec malum judicatur.

§. 343.

Ad appetitum vero pariter ac ad averfationem non modo concurrunt perceptiones præfentes, verum etiam abfentes vi imaginationis reproductæ, §. 271. & vi memoriæ agnitæ, §. 281. quamvis faltem confuse.

Cautio circa Appetit. & Averf.

§. 344.

Atque ea potiffimum est ratio, cur appetitus vel averfatio ejusdem objecti pro diverfitate Subjectorum plurimum differat.

Diverfitas in app. & averf.

§. 345.

Appetitus & Averfatio fenfitiva vehementior Affectus audit, conjunctus cum extraordinaria commotione fanguinis & fluidi nervei in corpore per variatum arteriarum pulfum colorisque faciei atque vultus & gestuum mutationem manifesta.

Affectus.

§. 346.

§. 346.

Falsa species affectu.

Affectus adeo cum insigni gradu voluptatis vel doloris seu tædii coniungitur, §. 336. 335. ut perperam voluptas atque dolor, voluptatis oppositum, pro affectuum speciebus habeantur. Species potius affectuum in diversa voluptatis atque doloris modificatione consistunt.

§. 347.

Latitia.

Voluptatum prædominium insigne *Latitia* est, & oritur adeo ex boni præsentis opinione. §. 336. 329.

§. 348.

Tristitia.

Tristitia e contrario est prædominium insigne tædii sive doloris. Oritur adeo ex mali præsentis opinione. §. 336. 333.

§. 349.

Amor.

Amor est dispositio mentis ex alterius felicitate voluptatem percipiendi.

§. 350.

§. 350.

Odium contra est dispositio animi ex alterius infelicitate voluptatem percipiendi. *Odium.*

§. 351.

Lætitia ex alterius infelicitate orta *Irrisionis* fert nomen, ab insigni odio ortum trahens. §. 347. 350. *Irrisio.*

§. 352.

Invidia est tædium five dolor ob felicitatem alterius, cujus adeo mater est odium. §. 350. *Invidia.*

§. 353.

E contrario *Misericordia* est tædium five dolor ob infelicitatem alterius, cujus adeo mater est Amor. §. 349. *Misericordia.*

§. 354.

Acquiescentia in se ipso est lætitia ob bonum, quod patravimus. *Acquiescentia in se ipso.*

§. 355.

Pænitentia e contrario est tristitia ob malum, quod patravimus. *Pænitentia.*

§. 356.

§. 356.

Gloria.

Gloria est lætitia orta super bono à nobis patrato quatenus ad aliorum opinionem refertur. Stimulus est ad præclara facta, spretis difficultatibus & absque lucri cupidine fubeunda.

§. 357.

Pudor.

E contrario *Pudor* est tristitia si-ve tædium ortum ex malo a nobis patrato vel patrando, quatenus ad aliorum opinionem refertur.

§. 358.

Gratitudo.

Gratitudo est amor in benefactorem ob præstita nobis beneficia.

§. 359.

Favor.

Favor est amor personæ ob mores nobis acceptos.

§. 360.

*Spes.
Fiducia.*

Spes est voluptas ex bono obtinendo percepta; si prædominetur voluptas seu in lætitiā degeneret, §. 347. *Fiduciæ* nomen nanciscitur.

§. 361.

§. 361.

Metus est tædium ex malo imminente perceptum. Desperatio autem tristitia intolerabilis super malo imminente.

Metus.
Desperatio.

§. 362.

Nimia tristitia ex malo improviso percepta *Terrorem* absolvit.

Terror.

§. 363.

Vacillatio animi est alternatio voluptatis atque doloris super bono, quod an obtentu possibile sit reperire non possumus. Definiri quoque potest per pugnam Spei atque Metus. §. 360. 361.

Vacillatio animi.

§. 364.

Pusillanimitas est tristitia orta ex difficultate boni obtinendi.

Pusillanimitas.

§. 365.

Desiderium est tædium subortum ex mora boni obtinendi.

Desiderium.

§. 366.

Ira denique est tædium insigne ortum

Ira.

ortum ex injuria nobis vel aliis illata, conjunctum cum odio ejus, qui eam intulit. Intenditur, si cum eadem pudor, §. 357. poenitentia, §. 355. terror, §. 362. Metus, §. 361. desperatio pro natis circumstantiis jungantur.

§. 367.

*Imaginatio-
nis efficacia
in affectu.*

Ceterum ut in appetitu sensitivo & aversatione sensitiva multum quoque tribuendum est imaginationi, §. 343. ita non minus eadem ad affectus plurimum confert, §. 345. ut sæpius non appareat, *undenam* sit affectus vehementia.

§. 368.

*Gradus af-
fectuum.*

Videmus etiam affectum esse vehementiorem, si animus ob alias rationes prægnantes ad eum jam jam dispositus ab alia causa leviori ad eundem concitetur.

§. 369.

*Affectus
impediit at-
tentionem.*

Affectus impediunt attentionem, ne verum cernere queamus, & ex præcipitantia ad actiones feramur, quarum postea poenitet. §. 370.

volitione, quæ est indifferentia ad volendum & nolendum, nulla ad utrumque ratione præfente.

§. 373.

Lex Appetitiva.

Quidquid appetimus, illud appetimus sub ratione boni; quidquid averfamur, illud averfamur sub ratione mali.

§. 374.

Motiva.

Repræsentationes istæ boni atque mali dicuntur Motiva, ut jam appareat vi legis appetitus, animam nunquam appetere nec averfari sine motivis. Hinc itidem veteres: incogniti nulla cupido.

§. 375.

Diversitas in appetendo.

Quoniam vero ad appetendum & averfandum non requiritur iudicii veritas, §. 371. 372. ideo fieri potest, ut homo appetat malum, quia illud pro bono habet, & quod malum esse cognoscit, appetere potest, quatenus est medium majus malum propellendi, tum enim ipsi hoc respectu videtur bonum.

§. 376.

§. 376.

Quemadmodum vero intellectus *Appetitus mixtus.* nunquam est prorsus purus, §. 299. a quo distincta cognitio manat, §. 298. ita quoque cum appetitu rationali plerumque miscetur sensitivus, cum ille a distincta, §. 371. hic a confusa boni dijudicatione, §. 339. oriatur.

§. 377.

Distinguuntur motiva in *completa & incompleta.* *Motiva completa, incompleta.* Completa sunt motiva, si omnes rationes expendimus, ob quas objectum ad appetendum vel averfandum propositum judicatur vel bonum vel malum; *Incompleta* sunt, si aliquas tantum expendimus, ceteris subsequentibus.

§. 378.

Appetitus qui oritur ex motivis incompletis *Voluntas Antecedens;* *Voluntas antecedens, consequens.* qui oritur ex completis *voluntas consequens* dicitur.

§. 379.

*Consuetudo
agendi.*

Ubi sæpius appetivimus vel averfati fuimus aliquod objectum: id denuo oblatum appetere vel averfari solemus nulla ratione distincte expensa, cur appetamus vel aversemur, in confusa scilicet imo obscura olim distincte perceptorum repræsentatione acquiescentes. Habitus iste agendi ex determinatione præterita *Consuetudo agendi* salutatur.

§. 380.

Coroll.

In consuetudine igitur agendi latent motiva, §. 377. unde distincte cognituri, quomodo appetitus vel averfatio enascatur, ad eos casus attendere tenemur, ubi aliquid prima vice appetimus vel averfamur.

§. 381.

*Motiva non
necessitant.*

Etsi autem anima nec appetat, nec averfetur sine motivis, §. 374. non tamen ideo necessario agit.

§. 382.

*Ergo anima
se determinat
ipsa.*

Anima itaque semetipsam determinat,

minat, etsi motivis suis conveni-
enter, ita ut voluntatem non mu-
tet, nisi aliis rationibus oblatis,
quas ad hanc mutationem suffici-
entes judicat.

§. 383.

Cum anima in appetendo & & intelligere debet actionem,
averfando fequatur judicium in-
tellectus, num bonum sit obje-
ctum an malum, §. 373. antequam
fese ad appetendum vel averfan-
dum determinet, cognitio objecti,
circa quod verfatur, præsupponi-
tur. Atque hinc requiritur, *ut*
anima intelligat actionem, ad quam
fese determinat.

§. 384.

Porro actiones, quas anima de- & eligit optimam.
cernit, ipsi etiam motus corporis
ab ipsius decreto seu voluntate
pendentes, ac ideo voluntarii di-
cti, cum earum oppositum æque
possibile deprehendatur, in se con-
tingentes sunt, §. 26. *ut adeo ex*
pluribus possibilibus eligat, quod ipsi
maxime arridet, §. 373.

§. 385.

*Indifferen-
tiam exer-
citii,*

Quoniam vero eligere potest, quod ipsi maxime arridet, ideo ex necessitate naturæ determinata non est ad hoc vel illud agendum, ad agendum hoc vel isto modo, & ideo per naturam indifferens dicitur ad agendum, agendum hoc vel isto modo, quam *indifferentiam Exercitii* appellarunt Scholastici.

§. 386.

*motiva non
tollunt.*

Et quia motiva eam non necessitant, ita ut etiam iis non obstantibus sese aliter determinare possit, si quidem ob rationes oblatas commodum visum fuerit, §. 381. in ipso determinationis actu indifferentia illa exercitii adhuc subsistit.

§. 387.

Spontaneitas.

Quatenus denique anima semet ipsam determinat, neque principio determinandi externo habet opus, eatenus *Spontaneitas* ipsi tribuitur.

§. 388.

§. 388.

Cum tamen sese non determinet, nisi adsit ratio, cur hoc faciat, §. 382. in casu autem *perfecti æquilibrii* nulla ratio adsit, cur ad hanc potius contradictionis partem, quam ad alteram sese determinet; in hoc casu ad neutram sese determinare liquet.

*Indifferen-
tia perfecti
æquilibrii.*

§. 389.

Ex his tandem elucet, quid per *Libertatem* animæ intelligatur, nempe facultas ex pluribus possibilibus sponte eligendi, quod ipsi maxime placet, cum ad neutrum per naturam suam determinata sit.

Libertas.

§. 390.

Atque ideo lubenter agimus, quod libere agimus, quia nempe libere eligimus, quod maxime aridet; coacti verò, quod displicet, vel minus placet.

Coroll.



L 4

SECTIO

SECTIO IV. CAPUT UNICUM.

De Commercio inter Animam & Corpus.

§. 391.

*Experien-
tia docet.*

AD nos met ipsos attenti experimur, quando objecta externa in organa sensoria agunt, eo ipso momento oriri quoque in mente perceptiones, quibus eadem tanquam extra nos repræsentamus.

§. 392.

*coëxistenti-
am muta-
tionum in
corp. & ani-
ma,*

Observamus autem non nisi *coëxistentiam mutationum* in corpore atque in mente, nequaquam vero, quod corpus physica quadam actione producat illas perceptiones in mente.

§. 393.

*sed non in-
fluxum.*

Non tamen hoc ex capite rejicitur physica corporis in animam actio, quod nullam ejus habeamus notio-

notionem; sed inde tantum infer-
tur, quod non possit tanquam *per*
experientiam evicta admitti, con-
sequenter, qui hoc faciunt, eos
committere *vitium subreptionis.*
§. 396.

§. 394.

Experimur præterea, animam *Uterior ex-*
percipere dolores ac infirmitates, *perientia.*
& lassitudinem corporis, ita ut nec
animæ bene sit, si corpori male est;
immo mentem inprimis pati ab ex-
traordinaria sanguinis ac fluidi
nervei commotione; hac vero se-
data & animo pristinam restitui
tranquillitatem.

§. 395.

Neque ignotum est, animam, *Uterior ex-*
crescente corpore, fieri perfectio- *perientia.*
rem. In ætate contra senili, de-
jectis corporis viribus, subinde vi-
res animi deficiunt.

§. 396.

Experimur etiam ex altera par- *Uterior ex-*
te, certos corporis motus in cor- *perientia.*
L 5 pore

pore ad decretum animæ liberum consequi, & mutato animæ decreto, jam cœptum extemplo fisti; quos ideo *motus voluntarios* supra diximus.

§. 397.

*sed nulla
modi,*

Quoniam tamen nullam actionis animæ ideam ne confusam quidem tenemus, qua motus isti producerentur, dum ad decretum animæ in corpore sese exerunt; dici sane nequit, quod illam experiamur; §. 305. Per experientiam non constat, nisi quod motus isti in corpore ad liberum animæ decretum consequantur.

§. 398.

*ergo vitium
subreptionis
est.*

Lubenter autem concedimus, non ideo actionem istam animæ in corpus rejiciendam esse: id tantum urgemus, quod *vitio subreptionis* sumatur tanquam experientia suffultum. §. 306.

§. 399.

Nota.

Tenendum vero, motum non conse-

consequi, nisi organis ac instrumentis motus in corpore rite se habentibus. Neque motus ab anima decretus aliter sequitur, quam corporis fert structura mechanica.

§. 400.

Imò modum, quo motus in corpore producitur, ignorat anima, ut ex Physica satis constat: multi-que motus voluntarii contingunt mira velocitate continuo variantes, quorum particularia decreta in mente non observamus. Exemplo est loquela, inprimis ubi orator sermonem recitat.

Nota.

§. 401.

Quoniam sensationes tum quoad existentiam, tum quoad speciem pendent a mutationibus in organis sensoriiis factis, & hæc a situ corporis in universo, §. 391. & vicissim motus, qui dicuntur voluntarii, in corpore nostro ab animæ liberæ decreto; ideo corpus ad animam, & animam ad corpus pertinere, atque

Anima corpori unita.

atque utrumque ens *unam personam* constituere concludimus, animamque corpori *unitam* dicimus.

§. 402.

*Regimen
corporis.*

Et quia anima libere decernit motus corporis, huic vero corpus in exequendo resistere non potest; ideo animæ tribuitur regimen corporis; ut adeo facultas regendi sit facultas pro arbitrato suo motus corporis decernendi, seu cum constanter per corporis structuram plures motus sint possibiles, libere determinandi eum, qui actum consequi debet.

§. 403.

Schol.

Hæc quidem de commercio inter mentem & corpus indubia experientiæ fide constant citra vitium subreptionis, nec plura de eodem tenere debet *morum doctor* & *politicus*, quemadmodum suo loco in moralibus & politicis constat.

Pfy-

Psychologia Rationalis.

SECTIO I.

CAP. UNICUM.

De Essentia & Natura Animæ.

§. 404.

Anima sui aliarumque rerum extra se conscia est, §. 248. id quod obtinet, quoties ea, quæ simul percipiuntur, a se invicem, & se tanquam percipientem à rebus perceptis distinguit, consequenter quando perceptio totalis distincta, §. 258. partiales claræ minimum, §. 255. etsi confusæ, §. 258. hoc est, quando in statu perceptionum distinctarum sumus, §. 260. ut adeo illa adperceptio non amplius subsistat, quando in perceptione totali nihil distinguimus, consequenter partiales obscuræ sunt, §. 255. atque nos in statu perceptionum obscurarum existimus. §. 261.

Status perceptionum obscurarum.

§. 405.

§. 405.

*A reflexione
& memoria
derivatur
adperceptio.*

Diversitatem eorum, quæ percipiuntur, cognoscimus, dum nobis patet, si perceptiones partiales sibi invicem substituantur, perceptionem totalem mutari. Cum igitur perceptiones partiales inter se componimus, super totali reflectimus, §. 291. atque adeo eandem perceptionem per aliquod tempus præsentem veluti a se ipsa distinguimus atque hoc momento eandem adhuc esse, quæ fuerat modo præcedenti, intelligimus: quod cum beneficio memoriæ fiat, §. 281. perspicuum est *à reflexione atque memoria derivari adperceptionem.* §. 251.

§. 406.

*Cogitatio
tempus po-
stulat.*

Plures igitur actus adperceptio involvit, §. 405. Quamobrem cum cogitationes nostræ sint perceptiones cum adperceptione conjunctæ, §. 250. quælibet cogitatio determinato absolvitur tempore.

§. 407.

§. 407.

Res materiales mutationem non
fubeunt nisi mediante motu, §.
58.62. nec partium situs immuta-
tus aliam, quam figuræ ac magni-
tudinis mutationem inducere va-
let, §. 65.57. *Materia non potest cogitare.* Materiæ igitur co-
gitandi facultas repugnat.

§. 408.

Anima nostra cum cogitet, §.
248. materialis sive corpus esse ne-
quit, §. 407. *Anima ens simplex.* Quoniam adeo inter
entia composita locum nullum ob-
tinet, §. 44. in numerum simpli-
cium referenda, §. 67. consequen-
ter *substantia* est, §. 83. atque adeo
agendi potentia prædita. §. 80.

§. 409.

Exceptioni nulla vis est, quod
forſan *Deus materiæ facultatem co-* *Remouetur obiectio.*
gitandi superaddiderit. §. 5.

§. 410.

Quoniam *substantia simplex* vi
quadam, seu conatu agendi in- *vis anima actuat,*
ſtrui-

struitur, §. 83. 81. anima quoque vim cogitandi habet, 408. per quam adeo actuantur, quæ per facultates ipsius vi *Psychologiæ Empiricæ* possibilia sunt.

§. 411.

*Vis anima
est unica.*

Cum in ente simplici tanquam partibus carente, plures à se invicem distinctæ vires concipi nequeunt, unaquaque illarum ob continuum agendi conatum peculiare subjectum requirente, vis animæ non nisi unica est, qua nunc sentit, §. 264. nunc imaginatur, §. 271. &c. &c.

§. 412.

*Anima vis
repræsen-
tandi sibi
universum,*

Dum anima sentit, corpora sibi repræsentat, quæ in organa sensoria agunt, §. 80. convenienter mutationibus in hisce contingentibus, 264. Vi igitur animæ producuntur perceptiones rerum materialium si-ve corporum in organa nostra sensoria agentium convenienter mutationibus, quæ in organis sensoriiis contingunt. §. 410. Corpora agunt

agunt in organa sensoria pro situ corporis organici in universo. Unde liquet, *animam sibi repræsentare hoc universum pro situ corporis organici in universo convenienter mutationibus, quæ actione corporum ambientium in organis sensoriis efficiuntur.*

§. 413.

Quoniam igitur anima non nisi *est essentia ipsius.* unica vi gaudet, §. 411. eadem vi repræsentativa Universi, situ corporis organici in universo materialiter, constitutione organorum sensoriorum formaliter limitata, §. 412. cetera quoque actuantur, quæ per reliquas ipsius facultates fieri possunt. §. 411. Et quoniam ulterius â sensu ortum trahunt ceteræ animæ mutationes, quemadmodum ex Psychologia empirica â posteriori constat, in rationali autem â priori ostenditur; vis illa universi repræsentativa est primum, quod in anima concipitur, & unde ratio ceterorum, quæ eidem insunt, redditur, consequen-

M

ter

ter *essentiam animæ* constituit.
§. 16.

§. 414.

☛ *Natura.* Immo eadem *naturam* mentis absolvit, quia per eam actuantur, quæ per facultates fieri possunt, §. 413. vis autem activa entis *naturam* absolvit §. 153.

§. 415.

Coroll. Animæ igitur *naturale* est, quod per vim illam distincte explicari potest: *Supernaturale*, cujus in ea ratio non continetur.

§. 416.

Schol. Nostrum adeo erit distinctius explicare, quomodo ob vim repræsentativam universi, situ corporis organici in universo materialiter, constitutione organorum sensoriorum formaliter limitatam, §. 412. animæ præter facultatem *sentiendi*, ceteræ quoque inesse possint, & juxta quas regulas per facultates *possibilia* vi ista actuentur.

SECTIO

SECTIO II.

De Facultate Cogno-
scitiva.

CAP. I.

De Facultatis cognoscitivæ
Parte Inferiore.

§. 417.

DUm sentimus, anima repræ-
sentat corpora in organa sen-
soria agentia, §. 80. & dum ima-
ginamur eadem anima repræsentat
corpora absentia. Corpora sunt
entia composita, anima vero ens
simplex. Perceptiones igitur ani-
mæ sentientis atque imaginantis
sunt repræsentationes compositi in
simplici & differunt adeo ab ima-
ginibus materialibus, quæ sunt
repræsentationes compositi in
composito.

*Anima re-
præsentatio-
nes compo-
siti in sim-
plici.*

§. 418.

Dum perceptioni adperceptio
accedit, anima res perceptas cum
a se invicem, tum a se ipsa distin-
guit,

*alia diffe-
rentia.*

guit, §. 404. 405. eamque ob rationem eas extra se invicem & extra se ipsam repræsentat. Atque ea in re perceptiones denuo differunt ab imaginibus materialibus, quoniam composita non extra se, sed intra se objecta repræsentant.

§. 419.

Repræsentationes rebus repræsentatis similes.

Cum anima non hoc universum alteriusve universi corpora repræsentaret, si perceptiones ipsius forent rebus repræsentatis dissimiles; haud difficulter colligitur perceptiones rebus perceptis similes esse debere, consequenter cum in compositis non distinguantur nisi figuræ, magnitudines, motus; perceptiones quoque non nisi figuras, magnitudines, & motus repræsentant; quæ ubi distinguimus perceptio fit distincta; ubi confundimus, confusa. Inde est, quod, si confusa ope microscopiorum reddantur distincta, figuræ, magnitudines & motus appareant, quorum ante discrimen nobis nullum fuit.

§. 420.



§. 420.

Perceptio igitur confusa cum re- *Continua-*
præsentet, quæ rei diversa insunt; *rio.*
perfecta ejus cum re percepta simi-
litudinis inde elucet. §. 258.

§. 421.

Et quoniam anima repræsentat *Identitas*
res materiales extra se eo ordine, *repræsentationis &*
quo organa sensoria tangunt, §. *temporis.*
264. 265. ordo autem successivo-
rum tempus absolvit: eodem tem-
pore res materiales in anima repræ-
sentantur, quo in rerum natura
contingunt.

§. 422.

Est vero anima substantia finita. *Perceptio-*
Etenim perceptiones ipsius conti- *num finitu-*
nuq variant, vel experientia teste- *do.*
tum etiam variare debent rebus
materialibus in universo, corporis-
que nostri situ in eodem varianti-
bus: id quod substantiæ finitæ pro-
prium. §. 78.

§. 423.

Objectis externis in organa sen- *Idea mate-*
soria agentibus, motus fluido ner- *riales*

veo impressus ad celeberrimum usque propagatur. Perceptionibus igitur seu ideis immaterialibus in mente respondent *Ideæ materiales in cerebro*, ab Aristotele dudum agnitæ, & ab omnibus philosophis constanter admissæ.

§. 424.

Immaterialis pendet a materiali.

Quoniam vis non agit nisi mutationibus in organis sensoriiis convenienter, §. 412. organis sensoriiis læsis vel quacunque ratione deficientibus, mirum non est, deficere quoque perceptionem. Variatur enim idea materialis, quæ à mutatione organi pendet vel prorsus deficit: ergo etiam, quæ eidem respondet, *immaterialis variari, vel prorsus deficere debet.* §. 423.

§. 425.

Continuatio.

Ex eadem ratione liquet, si eadem mutatio in organo sensorio à diversis objectis producat, ideas materiales in cerebro, adeoque etiam immateriales in mente eadem

dem esse: cuius rei exempla sinu
largissimo offert Optica.

§. 426.

Similiter cum in fomno organa *Somnus sta-*
sensoria parum aut nihil affician-
tur ab objectis externis; in mente *tus obscur.*
quoque cessant ideo immateriales
claræ atque distinctæ: ut adeo so-
mnus respectu animæ sit *status per-*
ceptionum obscurarum. §. 261.

§. 427.

Imaginatione non producuntur *Anima præ-*
nisi ideæ rerum ante perceptarum, *terita re-*
§. 276. quæ cum ad status univer-
si præteritos spectent, patet vim *præsentat.*
animæ repræsentativam universi
non modo tendere ad statum ejus
præsentem, *verum etiam ad præ-*
teritos. Conatur adeo anima re-
præsentare hoc universum non
modo quoad statum præsentem,
verum etiam quoad præteritos.
Quoniam tamen fieri nequit, ut
propter finitudinem omnem præ-
teritum statum repræsentet, non

nisi eam clare repræsentat, quæ quidpiam cum præsentī habet commune. Unde *ratio regulæ imaginationis* liquet. §. 276.

§. 428.

Idea materiales imaginationis a sensuum materialibus excitantur.

Imaginationem læso cerebro turbari experientia Medicorum dudum constat. Perceptionibus itaque ad imaginationem spectantibus suæ quoque respondent ideæ materiales in cerebro, seu ideæ materiales in cerebro producuntur, quæ ab impressione in organa sensoria objectis præsentibus oriuntur, si eadem absentia imaginamur. Cumque imaginatio à sensu oriatur, §. 276. *ideæ materiales in cerebro ab ideis materialibus sensuum excitantur.*

§. 429.

Memoria pendet a cerebro.

Unde porro constat ratio, cur etiam *memoria a cerebro pendeat*: pendet enim ab imaginatione, §. 281. 282. hæc verò a cerebro. §. 428.

§. 430.

§. 430.

Cum imaginationis actus a sensu pendeat, §. 276. si sensationes fuerint obscuræ, adeoque *totalis confusa*, ut nihil in ea distingua-
mus, nec imaginatio reproducere potest perceptiones præteritas aliquid commune habentes. Atque ea est ratio, *cur in somno imaginatio cesset*. In corpore perinde res manifesta. In somno parum aut nihil organa sensoria tanguntur, ut idearum materialium productio in cerebro cesset, quæ perceptibili motu agitentur: cessat igitur & reproductio illarum, quæ hinc oriri debebant.

In somno cessat imaginatio.

§. 431.

E contrario *in somnio imaginatio suo fungitur munere*, cum res absentes repræsententur, §. 276. excitantur itaque & ideæ materiales respondentes in cerebro, §. 428. Enimvero quia nec actus imaginationis determinari in mente potest nisi prævia sensatione, §. 276. nec

Somni initium a sensatione.

M 5 ideæ

*Somnia vel
simplicia
vel compo-
sita.*

ideæ materiales in cerebro re-
producuntur, nisi ante quædam
impressionem in aliquod organum
sensorium excitetur, §. 428. *omnis
somnia initium sensationi cuidam de-
betur*, per regulam imaginationis
postea continuandi *vel non inter-
rupta serie*, vel nova sensatione in-
terposita. Unde somnia in *simplici-
cia & composita* abeunt.

§. 432.

Somnia, quæ hoc modo se ha-
bent, *naturalia* sunt, §. 415. si
quod vero vel a sensu ortum trahit,
vel per legem imaginationis non
continuatur, id pro *supernaturali*
habendum. §. 415.

§. 433.

*Somnium
fictus in-
termedium.*

Ex regula imaginationis §. 276.
liquet, cur eorum quæ in somnio
repræsentantur tanquam præsen-
tia, non detur ratio sufficiens, cur
potius sint, quam non sint: atque
adeo *somnium est status perceptio-
num distinctarum inordinatarum*,
con-

consequenter cum *vigiliæ* denotent statum perceptionum distinctarum ordinatarum, *status quidam intermedius inter vigilias atque somnum.*

§. 434.

In somnio perceptiones totales sunt distinctæ, §. 433. sed perceptionibus distinctis adperceptio adhæret, §. 404. unde eadem quoque in somnio locum habet.

In somnio datur adperceptio.

§. 435.

In imagine seu objecti alicujus repræsentatione omnia inter se consentiunt, si nihil in ea occurreret, quod non aliquid in objecto repræsentet, nec in objecto distinguatur, quod non repræsentetur ab imagine. Quamobrem cum consensus in varietate perfectionem absolvat, §. 35. similitudo imaginis cum objecto, quod repræsentat, seu prototypo suo perfectionem ejus constituit. *In similitudine igitur perceptionum cum rebus*

*Perfectio percepti-
um.*

bus

bus perceptis earundem perfectio consistit, quæ tanto major, quanto magis distinctæ sunt perceptiones; cum in confusis similitudo non appareat, etsi adsit. §. 419.

§. 436.

Ordo sensuum.

Hinc conficitur, *visum esse sensum omnium perfectissimum, & hunc proxime sequi auditum, gustum vero & odorem esse ceteris imperfectiorem.*

§. 437.

Repræsentationis gradus.

Ensigitur universi repræsentativum eo perfectius, quo plura universi objecta simul repræsentat, & quo plura in singulis distinguit, ut adeo *gradus perfectionum* pendent cum a *numero* objectorum simul perceptorum, tum à *gradu* distinctæ perceptionis unius cujuslibet objecti.



CAP.

CAP. II.

De Facultatis Cognoscitivæ
Parte Superiori.

§. 438.

Cum tres sint mentis operationes, *notio*, *judicium* atque *discursus*, §. 251. 304. 312. ostendendum nobis inprimis erit, quomodo per vim universi repræsentativam *actus* notionis, *judicii* atque *discursus* determinetur, & quænam singulis in corpore mutationes respondeant.

Ratio instituti.

§. 439.

Tenendum itaque objecta in universo obvia partim ad eandem speciem, partim ad idem genus pertinere, atque eatenus similia inter se esse, §. Log. 105. Fieri itaque solet, ut sensui plus simplici vice objiciantur, quæ ad eandem speciem, vel ad idem referuntur genus. Quod si ergo objectum aliquod sensu percipitur, cum similia quædam habeant communia, §. 21.

Prima Mentis operatio ex vi repræsentativa.

Ob-

Objecta ejusdem Speciei vel generis olim percepta denuo repræsentantur, §. 427. Anima has perceptiones inter se conferens & ad similitudinem in iis deprehensam attendens notionem Universalem habet, §. 292. *Prima igitur mentis operatio non excedit vim repræsentativam universi supra definitam.* §. 412.

§. 440.

*a notione
universali
concluditur
ad immate-
rialitatem.*

Et si in cerebro ideæ materiales respondeant cum sensationibus, tum iis perceptionibus, quæ ad imaginationem referuntur, §. 423. 428. non tamen ideo notionum universalium formationi quidpiam in corpore respondet, quia in ad-perceptione fundatur, §. 439. quæ in materiam non eadit, §. 407. Atque eatenus patescit, *quod a cognitione universali ad animæ immaterialitatem recte concludatur.*

§. 441.

*Ideæ mate-
riales vo-
cuntur,*

Quoniam tamen notiones uni-
ver-

versales, hoc est, specierum atque generum nominibus tanquam signis designantur, §. 301. nomina autem ista *voces* sint *articulatæ*, quarum cum idea materialis in cerebro, §. 423, tum immaterialis in mente datur, §. 417. universales notiones in corpore repræsentantur, quatenus vocum ideæ materiales in cerebro excitantur, quibus tum objecta insigniuntur, tum ea denotantur, quæ in ipsis distinguuntur.

§. 442.

Judicia sermoni adfueti itidem *Judicio-*
vocibus exprimimus: unde ea quo-
rum,
que perinde ac notiones universales, §. 441. *per ideas materiales in cerebro repræsentantur.*

§. 443.

Ad *judicia* autem *intuitiva* formanda sufficit sensus, imaginatio atque memoria, quamvis in gradu excellentiori, consequenter vis repræsentativa universi, quoad statum
Judicia intuitiva e vi repræs.

tum præsentem atque præteritum.
§. 412. 427.

§. 444.

*isidem Ra-
tiocinia,*

Judicia discursiva ratiocinio inferuntur, nempe dum judicium intuitivum ob terminum communem, §. 276. in memoriam revocat aliud olim formatum & duo termini diversi combinantur, §. 310. Quamobrem cum judicia intuitiva vim repræsentativam universi non excedant, §. 443. nec imaginatio & memoria eadem superior existat, §. 427. patet tandem, *quomodo ratiociniorum actus per vim universi repræsentativam determinantur.*

§. 445.

*qua cerebri
læsione im-
pediuntur.*

Omne ratiocinium tribus judiciis constat, §. Log. 197. singula judicia materialiter repræsentantur quoque in cerebro, §. 439. ergo & Syllogismi seu ratiocinia materialiter in cerebro repræsentantur. Unde non mirum, quod *cerebri læsiones etiam in facultatem ratiocinandi redundant.* §. 446.

§. 446.

Intellectus est facultas possibilea *Intellectus*
 distincte repræsentandi, §. 294. *absolutus-*
 Duplex ergo fundamentum limita- *summus.*
 tionis habet, alterum materiale,
 quod per numerum possibileum
 constituitur, alterum formale,
 quod in modo repræsentandi con-
 sistit. Major ergo est intellectus,
 qui ad plura possibilea extenditur,
 quam qui ad pauciora, & qui ma-
 jorem admittit notionum distin-
 ctarum gradum. §. 294. *Absolute*
maximus sive *summus* est, qui ad
 omnia possibilea extenditur, &
 omnia in iis distinguit, quæ diffe-
 rentia insunt.

§. 447.

Quemadmodum vero intelle- *Soliditas.*
 ctui tribuitur profunditas, atque
 acumen ratione primæ mentis ope-
 rationis, §. 296. 297. ita ratione
 tertiæ *soliditas*, quæ est habitus di-
 stincte ratiocinandi & ratiocinia
 concatenandi, hoc est, judicia sua
 demonstrandi, §. Log. 220. Tan-
 N tum

tum autem *solidior* censetur, quo quis in probandis præmissis ad prima principia seu notiones irresolubiles propius accedit.

§. 448.

*e vi Repres.
Ratio,*

Dum per ratiocinia nexus veritatum universalium manifestatur, §. Log. 220. eundem ratiocinantes intuentur. Atque adeo cum vi repræsentativa universi, quoad statum præsentem atque præteritum ratiociniis locum concedat, *eadem quoque rationem admittere tenetur.*

§. 449.

*qua deficit
in surdis ac
mutis.*

Quoniam sermonis usu judicia, §. 307. consequenter etiam ex iis composita ratiocinia redduntur distincta, §. 310. 311. sermo perficit usum rationis, atque adeo non mirum, cur inter bruta adulti vel a nativitate muti ac surdi *omni fere rationis usu destituantur*, nisi in quantum subinde vocum defectum aliis *Symbolis* ad arbitrium confectis suppleant. § 450.

§. 450.

Ingenium in anima locum habet *e vi repres.*
ob acumen, §. 321. quod a clari- *Ingenium.*
tate in percipiendo pendet, §. 297.
A vi igitur repræsentativa universi,
modo determinatus quidam clari-
tatis supponatur gradus, qualis in
anima nostra notatur, ingenium
quoque emanat. Et quatenus cla-
ritas in percipiendo majorem sup-
ponit quantitatem motus in idea
materiali, quæ in cerebro existit,
§. 423. perspicitur quoque, quo-
modo ingenium â cerebri consti-
tutione pendeat.

§. 451.

Cur Ars inveniendi in animam *e vi repres.*
cadat, jam ex iis liquet, quæ de *Ars inveniendi.*
eadem in Psychologia Empirica
annotavimus.



N 2

SE-

SECTIO III.

De
Facultate Appetitiva.

CAP. I.

De Facultatis Appetitivæ
Parte Inferiore.

§. 452.

*Percepturi-
tio.*

QUoniam in anima perceptiones continuo variant; eam continuo à perceptione una ad alteram transire liquet. Perceptiones istæ vi animæ producuntur, §. 410. Adest igitur in qualibet perceptione conatus eam mutandi; qui conatus animæ mutandi perceptionem *Percepturitia* adpellatur.

§. 453.

*e vi repres.
Appetitus
sensitiveus.*

Quando vi imaginationis cum objecto repræsentato jungimus id eam voluptatis, §. 276. atque adeo illud tanquam bonum nobis exhibetur; conatus ille determinatur ad perceptiones objecto ipsi respondentes. Atque hæc tendentia

tia ad perceptiones prævisas seu conatus producendi perceptionem prævisam est proprie illud, quod appetitus sensitivus adpellatur. §. 339. Unde adparet, quomodo *appetitus* ex unica illa animæ vi, qua idea universi limitata formatur, enascatur.

§. 454.

Ut res manifestior evadat, ean- *Exemplum.*
dem exemplo illustrare juvat. Si vinum vitro infusum contuemur, atque imaginatio nobis in memoriam revocat voluptatem ex odore & sapore ante perceptam, §. 276. vis animæ determinatur ad producendas odoris & saporis perceptiones, atque in conatu easdem producendi consistit vini Appetitus.

§. 455.

Contraria ratione se res habet in *e repræsent.*
averfatione sensitiva. Quando ni- *universi*
mirum vi imaginationis cum ob- *Averfatio*
jecto repræsentato jungimus ideam *sensit.*
tædii vel doloris, §. 343. atque adeo illud tanquam malum nobis

N 3

repræ-

repræsentamus, §. 336. conatus animæ mutandi perceptionem determinatur in contrariam partem, hoc est, impedire conamur, ne perceptiones objecto respondentibus producantur, unde tædium siue dolor pendet. Atque conatus iste impediendi perceptiones prævisas est proprie illud, quod *avertatio sensitiva* dicitur. §. 339. Ut adeo denuo adpareat, quomodo averfatio ex unica illa vi, qua idea universi limitata producitur, §. 412. enascatur.

§. 456.

Anima tendit ad diversos corporis situs.

Perceptiones rerum præsentium, quas sensationes adpellamus, pendent a situ corporis respectu objectorum externorum, §. 264. Quamobrem, ut aliæ aliis succedant, aut corporis mutandus est situs siue respectu corporum ambientium, siue respectu totius universi, aut corpora alia in viciniam nostri transferenda. Quando itaque anima ad certas tendit perceptiones, §. 453. *ad eum quoque corporis*

poris situm, atque corporum eorum in viciniam nostri translationem tendit, sine quibus perceptiones istas locum in se habere non posse perspicit.

§. 457.

Interdum quoque a certo corporis situ pendet, vel a corporum quorundam absentia, ne producantur perceptiones, quas impedire conamur. Atque eo in casu non minus quam in appetitu tendit ad eum corporis sui situm organorumque vel corporum aliorum motum, quo sine perceptio prævisa impediri nequit.

Ulterior explicatio.

§. 458.

Perspicitur adeo, quomodo motus cum sui corporis atque organorum ipsius, tum motus quoque aliorum corporum, qui hominum in potestate positus, determinetur.

eiusdem.

§. 459.

Appetitus sensitivus & averfatio sensitiva vehementior affectus est,

In affectu multiplex tendentia anima.

N 4

§. 345.

§. 345. ex confusa adeo boni vel mali multiplicis repræsentatione originem trahens, §. 339. Quamobrem cum unaquaque cum repræsentatione boni enascatur aliqua tendentia ad certam quandam perceptionem, §. 453. ex quavis autem mali repræsentatione conatus aliquis sequatur impediendi certam quandam perceptionem, §. 455. *in affectu multiplices adsunt sive tendentiæ ad certas quasdam perceptiones, sive conatus impediendi certas quasdam perceptiones; quas tamen anima ob confusionem non distinguit.* §. 258.

§. 460.

Ratio commotionum corporis in affectu,

Et quia cum istis conatibus perceptiones producendi vel impediendi tendentiæ ad certos corporis organorumque ipsius motus conjunguntur, §. 456. 457. vi commercii inter mentem & corpus istius modi motus in corpore consequuntur, §. 397. Atque hinc reddenda est ratio *commotionum, quæ in corpore observantur, dum mens affectu perturbatur.* §. 461.

§. 461.

Fieri sane nequit, ut mens plures perceptiones diversas una producat, vel plurium productionem una actu positivo impediatur: unde in ipso *affectus aestu* perturbatur, cui confusa sanguinis & fluidorum in corpore commotio respondet.

ut & perturbationis.

CAP. II.

De Facultatis Appetitivæ Parte Superiore.

§. 462.

Appetitus Rationalis five Voluntas in eo differt a sensitivo, quod ille ex repræsentatione boni distincta, quemadmodum hic ex ejus repræsentatione confusa oritur, §. 339. Quamobrem cum appetitus sensitivus sit conatus perceptionem prævisam producendi, ad quam determinatur per ideam boni isti sociatam, §. 453. *Appetitus Rationalis* erit conatus producendi prævisam perceptionem, ad quam determinatur per ideam boni distinctam isti sociam, §. 463.

Appetitus Rationalis.

§. 463.

*Aversatio
Rationalis.*

Similiter quoniam *aversatio sensitiva* est conatus impediendi perceptionem prævisam, ad quam impediendam determinatur vis animæ, ob ideam mali confusam isti sociam, §. 455. *Aversatio vero Rationalis* sive *Noluntas* a sensitiva non nisi in eo differt, quod illa distinctæ, quemadmodum hæc confusæ repræsentationi natales debeat, §. 339. 371. *Aversatio Rationalis* erit conatus impediendi perceptionem prævisam ad quam impediendam vis animæ determinatur ob ideam mali distinctam isti sociam.

§. 464.

*Appet. &
Avers. Ra-
tion. non ex-
cedit vim
repræs.*

Quoniam notiones distinctæ in mente nostra à vi universi repræsentativa: §. 439. una cum judiciis tam intuitivis, quam discursivis manant, §. 444. ab his vero *Appetitus Rationalis* & *Aversatio Rationalis* deriventur, §. 462. 463. *Appetitus atque Averfatio Rationalis vim universi repræsentativam non exce-*

excedit, neque adeo alio principio opus est, unde *actus* appetituum & averſationum rationalium in ſingulari determinetur.

§. 465.

Quæcunque in mente noſtra obſervantur, vel ad facultatem cognoscitivam vel appetitivam referri, atque utriusque vel ad partem inferiorem vel ſuperiorem ex antecedentibus conſtat. Poſtquam igitur oſtendimus, quæcunque per utriusque partem inferiorem & ſuperiorem tanquam poſſibilia concipiuntur, *per vim repræſentativam univerſi actuari*; actu ipſo patet, *ex vi illa repræſentativa rationem reddi omnium, quæ animæ inſunt, perinde ac phænomenorum corporis ratio ex ſtructurâ ejusdem redditur.*

Ex vi repræſentativæ omnia deducuntur.

§. 466.

Enim vero, quemadmodum in explicandis eorum, quæ corporibus accidunt, habenda quoque eſt ratio regularum motus; ita ſimiliter

Regula Logico-Morales.

ter in explicandis eorum, quæ menti accidunt habenda est ratio regularum cogitationum seu cognitionis & appetitus, quas *Logico-Morales* dicimus.

§. 467.

Schol.

Mirum verò non est, insuper habitis hisce regulis quosdam comprehendere non potuisse, quomodo ex unica animæ vi eaque repræsentativa universi manare queat *appetitus*.

§. 468.

*Diversitas
animæ &
corporis.*

Ceterum cum regulæ *Logico-Morales* a regulis *motuum*, quas corpora in operando observant, prorsus diversæ sint, neque iisdem principiis innitantur; nova prorsus ratione elucet, *animam & corpus* diversissimæ esse naturæ, atque adeo *Substantias prorsus diversas* esse, nec operationes animæ a corpore, nec corporis ab anima perfici posse.

§. 469.

*Libertas as-
seritur.*

In appetitu Rationali bonum distin-

distincte dijudicamus, §. 371. adeoque ex eo num nos statumque nostrum perficiat, §. 336. consequenter beneficio *Rationis*, 322. cum in dijudicatione judiciis discursivis locus sit. Jam cum *Libertas*, vi cuius eligitur quod maxime arridet, quando ad neutrum per naturam mens determinata, §. 390. in solo appetitu rationali locum habeat, *libertatem menti convenire*, hoc est, *Voluntatem ejus liberam esse* evidens est, propterea quod ratione prædita.

SECTIO IV.

De Commercio, quod
inter Mentem & Corpus
intercedit.

CAP. I.

De Systemate Influxus
Phyfici.

§. 470.

Cum indubia experientiæ fide *Quæritur*
constet, in mente oriri per- *quomodo?*
ceptio-

ceptiones, quibus objecta in illa agentia tanquam extra nos præsentantur, quam primum mutationes in organis sensoriiis accidunt, §. 392. & vicissim ad decretum animæ liberum consequi exemplo motus in corpore, quos vult, §. 397. ab omni tempore *quæstio* agitata fuit inter Philosophos, *quomodo id fieri possit.*

§. 471.

In Systemate Influxus Physici.

Aristoteles cum sequacibus tribuit corpori *vim agendi in animam* & animæ vicissim *vim agendi in corpus*, actione quadam physica & naturali: quæ explicandi commercium inter mentem & corpus hypothesis *Systema Influxus Physici* appellari consuevit, ad *Cartesii* usque tempora solum in Philosophia receptum.

§. 472.

Anima producit ideam immaterialem, materiali respondens.

Cum perceptiones in mente ad præsentiam idearum materialium in cerebro oriantur, §. 423. vitæ animæ producantur, §. 412. *stante*

stante Systemate influxus Physici, spiritibus animalibus, quorum motu ideæ materiales efficiuntur, §. 422. *tribuenda est facultas determinandi animæ vim ad producendam ideam immaterialem materiali respondentem.*

§. 473.

Vicissim cum motus in corpore non consequatur nisi spiritibus animalibus per nervos ex cerebro influentibus in musculum, §. 423. *stante Systemate influxus Physici animæ tribuenda est facultas determinandi motum spirituum animalium in cerebro, ut per nervos influant in musculum, cujus opemotus animæ desideratus producendus.*

& determinat spiritus animales.

§. 474.

Concessa Spiritibus animalibus facultate determinandi perceptivam animæ facultatem, & vicissim animæ determinandi Spirituum animalium motum, patet, *cur mens statim producat perceptionem*

Responsio ad lo quomodo.

imma-

immaterialem ad præsentiam ideæ materialis in cerebro, & cur motus organi statim sequatur, cum anima eundem vult.

§. 475.

*Incertitudo
modi com-
mercii.*

Quoniam istarum facultatum ideam plane habemus nullam; jam ante Cartesii tempora dubitari cœpit, num istiusmodi facultates, quas Systema influxus Physici in gratiam explicandi commercii inter mentem & corpus sumit, sint possibiles.

§. 476.

*Cartesii in-
stitutum.*

Ex quo *Cartesius* de rebus naturalibus ex notionibus earum distinctis ratiocinandum esse docuit, rejectis, quibus nulla in mente respondet idea, nominibus; de facultate spirituum animalium perceptiones animæ determinandi magis dubitare cœperunt *Philosophi*, quamvis acumine præditi; nondum ideo eandem rejecerunt, sed ulteriori examini cum *Cartesio* subjecerunt.

§. 477.

§. 477.

Legum motus naturalium, unde regulæ motus in conflictu corporum observatæ demonstrari possunt atque solent, §. 157. hæc habetur, *in conflictu corporum eandem conservari virium quantitatem*, §. 184. Admisso influxu Physico animæ in corpus & corporis in animam eadem virium quantitas conservari nequit, cum pereat aliqua in gratiam animæ, alia ab eadem in gratiam corporis producat. Cum igitur regulis conflictus corporum a legibus motus pendentibus contineatur *Ordo Naturæ*, §. 229. *influxus Physicus ordini naturæ repugnat, & eundem turbat.*

*In 3. Phys.
ordini na-
turæ (O. tra-
rins.*

§. 478.

Non videtur Deus talem constituisse naturæ ordinem, ut ab animabus continuo turbetur. Atque ea est ratio, cur potissimum *Cartesius* influxum Physicum prorsus rejecerit.

*Cartesio
rejectionis.*

O

CAP.

CAP. II.

De Systemate Adfistentiæ,
feu Causarum Occasionalium.

§. 479.

*Systema
causarum
occasionalium,*

CUM *Cartesius* influxum Physicum rejiceret, §. 478. neque eidem appareret, quomodo commercium inter mentem & corpus ex notionibus animæ & corporis explicari possit; ad voluntatem Dei confugit sumens, *Deum legem quandam sancivisse, ut ad determinatos quosdam motus spirituum animalium in cerebro determinatæ quædam perceptiones in anima oriantur, & vicissim, ut ad volitionem animæ sequantur determinati quidam motus in corpore.* Hæc Hypothesis commercium inter mentem & corpus explicandi hodie *Systematis Adfistentiæ*, item *Systematis causarum occasionalium* fert nomen.

§. 480.

*in quo Deus
agit secundum
potentiam ordi-*

Cum perceptiones in mente ad præsentiam Idearum materialium
in

in cerebro, §. 423. vi eidem propria producantur, §. 412. *stante* *Systemate* *causarum* *occasionalium* *vis animæ per concursum Dei determinatur* ad eam perceptionem producendam, quæ *ideæ materiali* in cerebro respondet, Deo secundum *potentiam ordinatam*, non *absolutam* agente. §. 479.

§. 481.

Similiter cum motus in corpore non consequantur, nisi spiritibus animalibus per nervos ex cerebro in musculum influentibus, §. 423. *stante* *Systemate* *adistentiæ spirituum animalium in motu jam constitutorum directio per concursum Dei determinatur*, ut iidem per nervos influant in musculos motuum ab anima volitorum productrices, Deo secundum *potentiam ordinatam*, non *absolutam* agente. §. 479.

§. 482.

Quoniam motus spirituum animalium in cerebro, quo *ideæ materiali* *Prærogativa Syst. præ influxu.*

lis continetur, §. 423. in gratiam perceptionum non perit, §. 480. ut in Systemate influxus Physici, in Systemate causarum occasionalium illibata relinquitur Lex Naturæ de eadem virium quantitate conservanda, nec ordo naturæ turbatur.

§. 483.

*Hugenius
rejecit Syst.
C. O.*

Postquam *Hugenius* regulis motus veris, quas ignorabat *Cartesius*, detectis reperiit in conflictu corporum non minus summatim conservari directionem, quam virium quantitatem eandem; *Leibnizius* ob violationem hujus legis in Systemate causarum occasionalium, in quo directio a Deo immediate mutatur, §. 481. Systema Cartesianum *rejecit*, sicuti geminam ob rationem *Cartesius* Systema Influxus Physici improbavit.

§. 484.

*Leibnizius
etiam.*

Urget præterea *Leibnizius*, Augustini sententiam secutus, in naturalibus miracula quærenda non esse.

CAP.

CAP. III.

De Systemate Harmoniæ
Præstabilitæ.

§. 485.

Quemadmodum in corpore *naturale* dicitur, quod per ejus essentiam & naturam explicari potest, §. 187. *supernaturale* vero, si-
ve *miraculum*, quod per eandem explicari nequit, §. 188. im-
mediata Dei virtute productum, §. 190. ita similiter in anima *Natura-*
le dicitur, quod per ejus essentiam & naturam explicari potest; *super-*
naturale vero si-ve *miraculum*, quod per eandem explicari nequit.

*Quid anima
naturale?
supernatu-
rale?*

§. 486.

Leibnizius igitur commercium *Systema*
inter mentem & corpus intelligibi- *Harm.*
li modo & naturaliter explicaturus *Præst.*
intulit, quæ in anima accidunt,
ex essentia & natura animæ secun-
dum regulas *Logico-Morales*, §. 466.
485. corporis vero motus quoscun-
que, etiam qui mentis imperio sub-

O 3

sunt,

sunt, ex structura corporis organici secundum regulas motus consequi, utraque substantia, quod suum est agente, sed operationibus utriusque inter se consentientibus, artificio Numinis prorsus admirando nec ulla arte humana imitanda *Harmonia Præstabilita*. Hæc Hypothesis commerciū inter mentem & corpus explicandi *Systema Harmoniæ Præstabilite* appellari solet.

§. 487.

*Explicatio
illius.*

Anima igitur in Systemate Harmoniæ Præstabilite *semet ipsam determinat ad perceptiones producendas*, quæ ideis materialibus in cerebro respondent, quibus objecta externa in organa sensoria agentia repræsentantur, §. 423. Sunt autem determinationes regulares, cum per essentiam & naturam mentis, situ corporis organici in universo materialiter, constitutione organorum sensoriorum formaliter limitatam, §. 413. 414. fiant mutationibus

nibus ab objectis in organa sensoria agentibus convenienter.

§. 488.

Datis autem perceptionibus, quibus objecta externa in organa nostra sensoria agentia extra nos repræsentantur, cetera eodem modo consequuntur in anima in quocunque Systemate, nec ulla differentia in Systemate Harmoniæ præstabilitæ notatur, quippe quod a ceteris non nisi in eo differt, quod anima ad perceptiones objectorum in organa sensoria agentium non determinetur a causa externa, ut in Systemate influxus Physici & in Systemate causarum occasionalium, §. 472. 480. sed semet ipsam determinet. §. 487.

*Differentia
Systematis
H. P.*

§. 489.

Eodem igitur pervenit modo ad libera sua decreta in Systemate Harmoniæ præstabilitæ, quo in Systemate Influxus Physici.

§. 490.

Omnis adeo difficultas huc redit, *Difficultas
huius Syst.*

dit, *utrum & quomodo* fieri possit, ut corpus decreta animæ libera ad imperium ipsius exequatur, si anima destituatur facultate determinandi directionem spirituum animalium, ut influant in musculos motuum decretorum productores, quemadmodum in Systemate influxus Physici contingere debet, nec ut in Systemate adstantiæ per concursum divinum eadem determinetur.

§. 491.

*Determina-
tio influxus
spirituum
animal.*

Quoniam sensationes ansam sup-
peditant animæ ad decreta sua for-
manda & ab his per varias perce-
ptiones, judicia & ratiocinia tan-
dem ad eadem perveniatur, per-
ceptionibus autem animæ in cere-
bro suæ respondeant ideæ materia-
les, §. 423. immo ibidem etiam no-
tiones universales, judicia & ratio-
cinia materialiter repræsententur,
quæ repræsentationes materiales
in cerebro in universum omnes mo-
tu spirituum animalium vel fluidi
nervei subtilissimi efficiuntur, *Spi-
ritus*

ritus animales ad influendum in musculum determinantur ab iis, quorum motu repræsentationes istæ accidunt.

§. 492.

Omnis adeo quæstio huc redit, Cardo Systematis H. P.
num Deus ordinem rerum ita constituere potuerit, ut vi structuræ cerebri atque nervorum objecta externa in organa sensoria agentia, a quibus anima sumit ansam ad libera sua decreta, determinare possint spiritus animales juxta motuum leges naturales ad influendum in musculos, quorum actione producitur motus ab anima imperatus.

§. 493.

Quia Systemata Influxus Physi- Possibilitas
ejus.
 ci & Assistentiæ ordini naturæ ad-
 versantur, §. 477. 483. atque Sy-
 stema Harmoniæ Præstabilitæ so-
 lum eidem sit conforme, cum ad
 commercium inter mentem & cor-
 pus explicandum non utatur, nisi
 quæ essentiæ & naturæ mentis at-
 que corporis conveniunt, ordinem

O 5 rerum

rerum dicto modo potuisse constitui *tanto confidentius* sumitur, tum quod is ab absoluta necessitate perinde ac animæ decreta liber, tum quod Deus hæc ab ætérno prævidens, juxta ea quæ in Theologia Naturali consequuntur, animæ corpus in operationibus suis *Harmonicum* jungere potuerit.

§. 494.

Impossib.

Qui igitur Systematis Harmoniæ Præstabilitæ *impossibilitatem* evincere sumit, is impossibilitatem corporis animæ libere volentis in operationibus suis harmonici demonstrare tenetur.

§. 495.

*Non nocet
libertati.*

Patet adeo *libertatem animæ per Systema Harmoniæ præstabilitæ non oppugnari.*

§. 496.

*ad operationes
gratia
non est ex-
tendendum.*

Ceterum cum Systema Harmoniæ Præstabilitæ tantum explicat commercium naturale, quod inter mentem & corpus intercedit;
non

non extendendum illud est ad operationes gratiæ.

§. 497.

Quoniam verò per Systemata *Influxus Physici, Assistentiæ & Harmoniæ præstabilitæ* explicare intendimus, *quomodo* commercium inter mentem & corpus, quod indubia experientiæ fide constat, subsistere possit: Theologo autem, Politico, Medico atque Morum doctori abunde sufficiant, quæ de eodem experiendo discimus: has hypotheses nullum habere in Theologiam, Politicam, Medicinam atque Ethicam influxum dilucide apparet.

*Innocentia
explicatio-
nis commer-
cii.*

SECTIO V.

De Immortalitate Animæ & Animabus Brutorum.
Spirituque in Genere.

CAP. I.

De Immortalitate Animæ.

§. 498.

Anima est Ens simplex, §. 408. *Incorrupti-
bilis anima.*

naturaliter igitur interire nequit,
 §. 75. consequenter sua natura est
incorruptibilis.

§. 499.

*Anima
 creata est a
 Deo,*

Similiter cum sit Ens simplex, §. 408. naturaliter oriri nequit, §. 71. 72. ergo aut necessario existit, aut à Deo in instanti producta est, cum antea ejus nihil esset, §. 73. Enimvero necessario non existit, cum per essentiam & naturam suam sibi repræsentet hoc universum, §. 413. 414. quod in numerum entium contingentium referendum, Deumque ut infra demonstrabitur autorem agnoscit. *A Deo igitur ex nihilo in instanti producta, hoc est, creata est.*

§. 500.

*& corpori
 superstes,*

Propterea, quod anima incorruptibilis, §. 498. cum corpore interire nequit. Dum enim corpus interit, corrumpitur, hoc est, materia ex qua constat, dissolvitur in partes. *Causæ igitur naturales, quæ corpus destruunt, animam destruere nequeunt.*

§. 501.

§. 501.

Animam annihilari, exceptio non annihili-
nulla est. Cum enim causæ cor-latur.
pus destruentes materiam ex qua
constat, non annihilent, immo
annihilare nequeant, cum contin-
gant motu, motu autem materia
non nisi locum mutet, ipsa verò
non mutetur, §. 58. *nulla adest ra-*
tio, cur anima annihilari debeat.

§. 502.

Ens, quod memoriam sui habet, Homo est
hoc est, recordatur, se antea in persona.
hoc istoque statu fuisse, dicitur *Per-*
sona. Quamobrem cum homo sui
memoriam habeat, vel experientia
teste, in *Personarum numerum re-*
ferendus.

§. 503.

Immortale tum demum proprie Immortale
dicitur Ens, quod, cum indestru-quid?
ctibile sit, statum quoque perso-
nalitatis servat.

§. 504.

Ut igitur anima sit immortalis, Reminiscentia requiritur immort.
non sufficit eam esse indestructibi-
lem

lem, verum etiam statuum hujus vitæ recordetur necesse est, §. 281.

§. 505.

*Uterior as-
sertio.*

Quoniam itaque hac in vita est in statu perceptionum distinctarum, multo magis post vitam hujus corporis in simili statu erit.

§. 506.

*non adver-
sante reli-
gione.*

*Major gradus claritatis perceptio-
num in animabus hominum pro-
miscue omnibus non contrariatur
religioni christianæ; etenim ut in
beatis voluptatem, ita in damnatis
dolorem intendit.*

§. 507.

*Dem. im-
mortalita-
tis anima.*

In statu perceptionum distinctarum anima sui conscia est, §. 404. & vi status præsentis recordatur præteritorum, §. 281. 271. Ergo eadem a morte corporis sui quoque conscia subsistit statuumque præteritorum recordatur, §. 505. præsertim cum status post mortem rationem sui habeat in statu præsentis vitæ, revelatione consentiente. *Est adeo immortalis.* CAP.

CAP. II.

De

Spiritu in genere & unione
Spiritus nostri cum corpore.

§. 508.

PER *Spiritum* intelligimus Sub- *Spiritus*
stantiam intellectu & volun- *quid ?*
tate libera præditam.

§. 509.

Elementa rerum materialium *Elementa*
quidem substantiæ simplices sunt, *non sunt spi-*
adeoque entia immaterialia, sed *ritus.*
inter spiritus referri nequeunt.
§. 508.

§. 510.

Enim vero *anima hominis* intel- *est anima.*
lectu, & voluntate, §. 294. 371.
eaque libera prædita est, in nume-
rum ergo spirituum referenda. §.
508.

§. 511.

Cum anima corpori unita dica- *Uni Spiri-*
tur, quatenus sensationes tum *tus cum*
quoad actum, tum quoad speciem *corpore.*
a mutationibus in organis sensoriiis
factis,

factis, & hæc a situ corporis in universo, & vicissim motus voluntarii in corpore ab animæ liberæ decreto pendent, anima vero nostra spiritus sit, §. 508. *spiritum corpori uniri patet, si ratio specificationis perceptionum ultima in corpore, & vicissim ratio specificationis motuum in organis corporis in spiritu invenitur.*

§. 512.

Non-indifferentia spiritus ad corpus.

In Systemate Harmoniæ Præstabilitæ vis animæ ad perceptiones suas non determinatur a principio extrinseco, §. 487. quemadmodum in Systemate Influxus Physici, §. 472. & in systemate assistentiæ, §. 480. Anima igitur in illo Systemate non est indifferens ad unionem cum quolibet corpore, ut in ceteris systematibus; sed non nisi cum eo corpore uniri potest, cum quo unitur, principio rationis sufficientis convenienter. §. 8.

§. 513.

in Syst. H. P. unio maxime naturalis,

Quoniam adeo in Systemate Harmoniæ præstabilitæ ratio unionis

nis animæ cum corpore in ipsa corporis atque animæ essentia & natura continetur, §. 512. illud vero in homine *naturale* seu *physicum* dicitur, quod per ejus essentiam & naturam explicari potest, §. 188. *in Systemate harmoniæ præstabilitæ unio animæ cum corpore maxime naturalis seu physica est.*

§. 514.

Hac ex unione naturali sequitur, nullam prorsus culpam circa actiones malas in Systemate Harmoniæ præstabilitæ in Deum redundare; sed hæc paucis exponi non possunt.

§. 515.

Spiritus perfectissimus est, qui intellectu perfectissimo & voluntate perfectissima gaudet. §. 508.

§. 516.

Perfectissimus Intellectus est, qui omnia possibilis distincte simul repræsentat, §. 294.

§. 517.

Perfectissima est Voluntas, quæ non

P

Voluntas perfectissima.

non appetit nisi optimum, §. 371.
Spiritus ergo perfectissimus non nisi optimum appetit. §. 515.

§. 518.

*Spiritus
gaudet ra-
tione.*

Cum ratio sit facultas intuendi nexum veritatum universalium, §. 322. hic vero a ratiociniis, intellectus operatione pendeat, ens intellectu præditum rationis particeps. *Spiritus* itaque *omnis rationis particeps*. §. 508.

§. 519.

Sapientia.

Sapientia est habitus actionibus fines convenientes præscribendi & media ad eos ducentia eligendi, finesque particulares ita sibi invicem subordinandi, ut propiores sint media remotiorum.

§. 520.

*Sapientia
perfectissi-
ma,*

Siquod ens omnes fines particulares ita sibi invicem subordinare noverit, ut remotiorum media fiant propiores; erit illud *sapientia perfectissima* præditum. §. 519.

§. 521.

*utitur via
brevissima.*

Sapiens cum media eligat propter

pter finem, §. 519. à superfluis, hoc est, iis, sine quibus finis intentus obtineri potest, abstinere. Unde nil facit frustra, tenditque ad scopum via brevissima.

§. 522.

Stultitia opponitur Sapientiæ, *Stultitia quid?* atque adeo arguit electionem finium particularium sibi mutuo adversantium & mediorum vel fini prorsus contrariorum vel per ambages ad eundem ducentium.

CAP. III.

De Animabus Brutorum.

§. 523.

BRuta organis sensoriiis, nervis pariter atque cerebro instruuntur, quemadmodum homo. Perinde igitur in ipsorum cerebro *idea materiales* oriuntur ab impressione in organa sensoria atque in homine. Quamobrem cum anima humana unita sit corpori, propterea, quod sibi repræsentat hoc universum convenienter mutationi-

Bruta habent animas,

bus in organis sensoriis factis, §. 511. non sine ratione colligitur, cum brutorum quoque corporibus unitas esse animas objecta in organa sensoria ipsorum agentia sibi repræsentantes convenienter mutationibus in organis sensoriis factis. Tot enim diversi modi repræsentandi possibiles sunt, quot diversæ mutationes organorum sensoriorum. Argumentamur ab *Analogia*, cui argumentandi modo maximum robur inesse deprehenditur.

§. 524.

Et gaudens
claritate
perceptionum.

Ut nobis eorum, quæ percipimus, conscii simus, pendet a claritate perceptionum partialium, §. 404. Cum organa sensoria brutorum ob convenientiam cum nostris loquantur, perceptiones eorum partiales claritate gaudere, §. 523. quoniam similes mutationes in iis contingunt ac in nostris; *quin bruta quoque eorum, quæ percipiunt, sibi met conscia sint apparet*, quamvis pro diversitate claritatis in percipien-

ciendo diversa bruta magis minusve sibi eorum, quæ percipiunt, conscia sint.

§. 525.

Bruta destituuntur vocibus articulatis, quibus tanquam signis ideæ rerum ipsis obversantium indigitantur; certo indicio, ipsa cognitione universalium carere, nec distincte judicare, multo minus ratiocinari.

Sed carent facultatibus superioribus.

§. 526.

Cognitione Universalium & facultate ratiocinandi destituta nexum veritatum universalium intueri nequeunt, adeoque rationis expertia, merito irrationalia dicuntur.

sunt irrationalia.

§. 527.

Experientia autem docemur, in brutis si non omnibus, saltem aliquibus iisque perfectioribus, una perceptionum conjunctarum producta prodire & alteram. Quoniam hæc imaginationi atque memoriæ conformiter fiunt, §. 271.

habent imaginationem & memoriam,

281. *imaginatio atque memoria brutis omnino tribuenda.*

§. 528.

ac Analogum rationis,

Dum bruta ad conspectum circumstantiarum casus præsentis beneficio imaginationis atque memoriæ recordantur ejus, quod antea in simili casu accidit, idem eventurum expectant, §. 527. Hæc casuum similium expectatio cum imitetur confuse ratiocinium, phrasi veterum non incongrue *Analogum Rationis* adpellatur: quod cum vicem rationis in brutis subeat, eadem, etsi rationis expertia, §. 526. *analogum rationis* habent.

§. 529.

Appetit. Sen. & aversationem.

Ad appetitum sensitivum atque aversationem sensitivam, ex confusa boni malique repræsentatione orientem, sufficit sensus, imaginatio atque memoria. Quam ob rem cum bruta sensu, §. 523. imaginatione atque memoria gaudeant, §. 527. *appetitus quoque sensitivus atque aversatio sensitiva in ipsa cadit.* §. 530.

§. 530.

Enim vero cum rationis expertia sint, §. 526. voluntas vero libera absque ratione locum habere nequeat, §. 469. *bruta Voluntate libera destituuntur.*

Theologia Naturalis.

CAP. I.

De

Existentia Dei & Attributis
cum eadem connexis.

§. 531.

NOs existere omni caret dubio, *Ens a se.*
§. 245. quoniam itaque ratio
sufficiens detur necesse est, cur po-
tius simus, quam non simus, §. 8.
*aut ratio illa in nobis continetur, aut
in ente alio a nobis diverso.* Quod si
ens alterum denuo habeat ratio-
nem existentiae suae in alio, non
pervenietur ad rationem sufficien-
tem existentiae nostrae, nisi tandem
subsistas in aliquo ente, quod ra-
tionem suae existentiae in se ipso ha-

bet. Aut igitur nosmet ipsi sumus ens istiusmodi, aut datur aliud ens a nobis diversum, quod existentiae suae rationem in se ipso habet, atque *ens à se* dicitur.

§. 532.

est independens

Cum *ens à se* existentiae suae rationem in se habeat, §. 531. nullius virtute ad existendum indiget, sed propria existit, adeoque *independenter* ab alio ente. Dicimus enim ens quoddam *independens ab alio*, quatenus ejus, quod ipsi tribuitur, ratio extra ipsum in alio non continetur; quemadmodum e contrario *Dependens*, quatenus ejus; quod ipsi inexistit, ratio in alio continetur.

§. 533.

in omnibus,

Quod a se existit ens, existere potest, etiamsi aliud non existat, §. 532. consequenter *in omnibus*, quae ipsi conveniunt, *ab alio prorsus independens est*, §. 532.

§. 534.

*necessarium
&
aeternum.*

Quod rationem existentiae in se habet,

habet, vi essentiae suae existit, §. 16.
consequenter immutabiliter, §. 19.
adeoque necessario. Patet adeo
ens a se necessario existere, §. 531.
consequenter ab æterno, §. 27. ut
adeo *primum sit atque ultimum*,
cum ipso neque prius, neque po-
sterius concipi possit.

§. 535.

Cum ens a se necessario existat, *simplex*,
§. 534. ut unquam desinat fieri ne-
quit, §. 27. consequenter corpus
esse non potest, §. 61. sed *ens sim-
plex est*, §. 67.

§. 536.

Mundus est ens compositum, §. *non est mun-*
123. idemque contingens, §. 127. *dus, nec na-*
134. immo & natura rerum ab ab- *tura rerum.*
soluta necessitate libera, §. 156.
186. *Ens igitur a se, quod simplex*
est, §. 535. nec mundus, nec natura
rerum esse potest.

§. 537.

Quoniam mundus ab eo, qui *Elementa*
existit, diversus, diversa quoque ab *non sunt ens*
a se.

elementis hujus mundi elementa postulat, §. 208. mundus vero in numerum *contingentium* refertur, §. 134. elementa quoque in numero contingentium sunt. Quamobrem cum ens a se sit necessarium, §. 534. *nec elementa rerum materialium ens a se esse possunt.*

§. 538.

*nec anima
est ens a se.*

Vis animæ nostræ situ corporis in universo materialiter, constitutione organorum sensoriorum formaliter limitatur, §. 412. Cum igitur limitationis fundamentum sit contingens, §. 134. ipsa quoque in numerum contingentium referenda, consequenter ens a se esse nequit, §. 534. Idem adhuc alia patescit ratione. Ob modo dicta anima est dependens a mundo, §. 532. Ens a se est independens ab omni alio ente, §. 532. *Anima igitur ens a se esse nequit.* Nimirum sicuti alius mundus alia postulat elementa, §. 537. ita quoque alias animas.

§. 539.

§. 539.

Datur itaque Ens a se, §. 531. *Ens a se diversum est ab omnibus.* quod est diversum a mundo corporeo, §. 536. ab elementis rerum materialium, quibus is constituitur, §. 537. atque ab animabus nostris, §. 538. hoc est *ab omnibus Entibus finitis*, quæ existere novimus, & in quo adeo rationem sufficientem existentiae suæ habere debent, §. 8. qua per essentiam & naturam suam destituuntur tanquam *contingentia*, §. 26.

§. 540.

Quoniam illud ens, quod in se *Deus est. ens a se.* continet rationem sufficientem actus contingentium, mundi scilicet, elementorum atque animarum, vocatur *Deus*: *Deum* existere per demonstrata liquet, §. 539. qui adeo propria virtute existit, §. 532. ab alio ente prorsus independens, §. 533. *ens necessarium*, idemque primus atque ultimus, §. 534. simplex, §. 535. hincque sua natura incorruptibilis. §. 75.

CAP.

CAP. II.

De Attributis divinis
in Genere.

§. 541.

*Norma At-
tributorum.*

CUM in Deo contineatur ratio
sufficiens actus universi, §.
140. *ea ipsi tribuenda sunt attribu-
ta*, per quæ intelligitur, cur mun-
dus actum fuerit consecutus. §. I I.

§. 542.

*Mundus est
unus.*

*Patet autem mundum non nisi
unicum existere.* Ponamus enim
existere plures : aut plures illi
mundi erunt inter se similes, aut
dissimiles. Si sint similes, nulla
erit ratio, cur unus hunc, alter
istum occupet locum. §. 8. 21. id
quod principio rationis sufficientis
repugnat, §. 8. Idem adhuc valet,
si ponantur dissimiles. Cum enim
in unoquoque mundo mutationes
eodem modo consequentur, quo-
cunque ordine inter se collocen-
tur; nulla ex ipsis peti potest ratio,
cur hoc potius, quam alio ordine collo-

collocentur. §. 21. Secus se res habet in iis, quæ inter se connexa unum totum constituunt, ubi situs determinatur ex rationibus intrinsicis.

§. 543.

Unus itaque cum existat mundus, §. 542. etsi plures sint possibiles, §. 134. in Deo ratio sufficiens continetur necesse est, cur hic potius mundus existat, quam alius, §. 540. *consequenter ea ipsi tribuenda sunt attributa, per quæ intelligitur, cur hic potius mundus existat, quam alius.* §. 8.

Uterior attributorum norma.

CAP. III.

De Intellectu Divino & Attributis cum eodem connexis.

§. 544.

DE Perfectionibus & Attributis divinis distincte agendum est ob diversas rationes. Cultus divinus definitur per actiones ejusmodi, quarum motiva sunt perfectiones

Usus tractationis distinctæ Attributorum div.

ctiones divinæ. Cui perfectiones divinæ cognitæ non sunt, illi non sunt motiva agendi. Quo sunt certius cognitæ, eo impellunt fortius. Quo sunt cognitæ distinctius, eo agentem dirigunt tutius.

§. 545.

*Perfectio
Mundi est
motivum
Dei.*

Quoniam nihil est sine ratione sufficiente, cur potius sit, quam non sit, §. 8. nec Deus sine ratione huic potius universo actum impertitus est, quam alteri. Quod enim eidem actum impertitus fuerit, exinde elucet, quia non necessario existit, §. 536. Enim vero mundi, qui possibiles sunt, perfectione inter se differunt, §. 227. *ob perfectionis itaque diversitatem hunc potius, quam alium rerum ordinem ad actum perduxit.* Quod si enim ad notiones universi atque perfectionis ejusdem attendas, facile perspicitur, rationem aliam locum habere non posse.

§. 546.

Deus est Spiritus,

Ubi unum alteri præfertur ob ratio-

rationem ei, quod eligitur, intrinsecam, ibi libera voluntas, §. 389. 469. consequenter intellectus, §. 294. locum habet. *Deus itaque intellectu atque libera voluntate præditus, §. 545. consequenter Spiritus est. §. 508.*

§. 547.

Vi igitur intellectus mundos *Omniscius*, possibiles omnes sibi repræsentat distincte, §. 294. cumque perfectio universi in eo consistat, quod rationes particulares rerum cum simultanearum tum successivarum ad idem spectantium tandem in rationes generales communes resolvantur, §. 221. Deus perfectiones omnium mundorum possibilium dijudicaturus maxima, minima, quoad spatium & tempus in unoquoque simul sibi distincte repræsentet necesse est, consequenter cum omnes mundi possibiles comprehendant omnia possibilia in certa Systemata redacta, §. 116. omnia possibilia cognoscit, ideoque *omniscius* dicitur.

§. 548.

§. 548.

*Intellectus
divinus.*

Est adeo intellectus divinus distincta & simultanea repræsentatio omnium possibilium, consequenter idem *infinitus*, §. 78. atque *absolute summus*.

§. 549.

*caret sci.
cogn. infer.*

Dum Deus omnia distincte simul cognoscit, facultate cognoscitiva inferiore, hoc est, sensu & imaginatione caret, omniaque *intuitive* cognoscit. §. 302.

§. 550.

*intellectus
purus.*

Quoniam Deus sensu & imaginatione caret, *intellectu puro* gaudet, §. 298.

§. 551.

*eius immen-
sitas*

In quovis mundo singula quoad spatium & tempus inter se connexa sunt, §. 121. & actus contingentis naturaliter per seriem causarum, quæ a se invicem dependent, ut effectus a sua causa, determinatur, §. 127. atque per seriem simultanearum inter se connexarum

rum §. 128. in quælibet quantumlibet minima parte integrum deprehenditur universum. Unde *immensitas intellectus divini* elucet, si ad nostrum referatur. §. 46.

§. 552.

Intellectus divinus ad omnia *absolute* possibilia extenditur omniaque in *summus.* singulis distinguit, quæ differentia insunt, §. 547. adeoque *absolute maximus sive summus* est. §. 446.

§. 553.

Quoniam Deus in unoquoque *Præscientia.* statu, quem tanquam præsentem considerat, simul intuetur futurum, §. 551. quæ olim futura sunt, tanquam præsentia intuetur, id quod *præscientia* salutatur.

§. 554.

Cum præscientia rebus nullam mutationem intrinsecam inducat, §. 551. 553. nec contingentiae rerum, nec libertati humanæ officit. Pertinere enim actiones hominum liberas ad objectum præscientiæ divinæ inde elucet, quod

Q

homo

homo ansam arripiat ad decernendum ab iis, quæ in universo fiunt, & in decernendo ad certam regulam sese attemperet, §. 373. Unde simul perspicitur, *quomodo ea novit Deus, quæ sub conditione nunquam implenda forent.*

§. 555.

*se ipsum
cognoscit*

Propterea quod Deus omnia distinctissime sibi representat, §. 547. quæcunque ullo modo a se invicem differunt, perfectissime distinguit; §. 258. Atque ideo non modo eorum omnium, sed & sui ipsius sibi conscius est, §. 404. *consequenter se ipsum cognoscit.*

§. 556.

*est fons es-
sentialium.*

Intellectus divinus omnia possibilita concipit & in systemata redigit, §. 547. *est igitur fons tum possibilitatis intrinsecæ, tum extrinsecæ;* hoc est, novit Deus & quænam fieri, & a quibus causis ad actum deduci possint, cumque possibilitate rerum intrinseca essentia absolvetur, §. 16. *intellectus divinus est fons essentialium.* §. 557.

§. 557.

Quodsi ergo quæfiveris, cur entia finita hanc habeant essenti-
am; ratio quidem ultima erit, quod intellectus divinus eadem ita concipiat: unde *quoad essentiam ab intellectu divino pendent.* §. 532

idem.

§. 558.

Quoniam possibilitas cum intrinseca tum extrinseca ab intellectu divino pendet, §. 556. quoties de ea in philosophia sermo fuerit, non potest tanquam ejus ratio allegari *voluntas divina*, sed intrinseca demonstratur, quod sit *a contradictione liberum*, quod tanquam possibile defenditur; extrinseca vero, quod ab his vel istis causis actus intrinsece possibilis determinari possit. §. 14.

*Qualitates
occulta reji-
ciuntur.*

§. 559.

Cum omnium possibilium fons sit intellectus divinus, tam quoad possibilitatem intrinsecam, quam extrinsecam, §. 556. *Deus solus inventor omnium* dicendus: homi-

*Deus om-
nium in-
ventor, &*

nes proprie loquendo nihil inveniunt, sed divina inventa meditando assequuntur, nisi foetus imaginationis excludant. §. 549.

§. 560.

*fons omnis
veritatis.*

Similiter cum intellectus divinus omnia intrinsece possibilia omni possibili modo combinet, §. 556. unde veritas, §. 34. & perfectio §. 35. resultat; idem omnis veritatis & perfectionis fons est. *Patet adeo omnem veritatem esse a Deo.*

§. 561.

Summa ratio in Deo

Quia omnis veritatis autor Deus est, §. 560. quin omnium quoque veritatum nexum intime perspiciat dubitari nequit, §. 555. *Summa igitur ratione præditus est, §. 322.*

§. 562.

*ob finem
produxit
hoc univ-
sum.*

Deus dum mundum produxit, ad diversitatem perfectionis in pluribus obviæ attendit, §. 35. sed cum nihil sit sine ratione sufficiente, §. 8. ratio quoque detur necesse est, cur ob hunc perfectionis gra-

gradum; qui universo actuali inest; hoc potius universum produxerit, quam aliud. Enimverò id, cujus gratia causa efficiens operatur, finis est, §. 96. *Evidens adeo, dari finem aliquem, ob quem Deus universum hoc produxit. Immo ulterius liquet, perfectionem universi esse medium obtinendi illum finem.* §. 98.

§. 563.

Perfectio universi in eo consistit, quod rationes particulares, cur unum alteri coëxistat, tandem in rationes generales communes resolvantur, §. 221. Quamobrem cum Deus ob perfectionem huic universo in existentem ipsum cæteris prætulerit, quod esset ea medium obtinendi finem, quem per hujus universi productionem intendit, §. 562. patet omnino, *Deum non modo ideo hunc produxisse mundum, quod unum ita esset propter alterum, consequenter rationes istas particulares, cur unum alteri succedat, vel alteri coëxistat, esse fines a Deo inten-*

E Subordinatione medicum atque finium.

Q 3

tos,

tos, §. 96. sed Deum quoque hosce fines ita sibi mutuo subordinasse, ut tandem sint medium obtinendi finis ultimi, propter quem mundum produxit.

§. 564.

Summa Sapientia Dei.

Si quod ens omnes fines particulares ita sibi invicem subordinare noverit, ut remotiorum media fiant propiores, summa sapientia præditum est, §. 520. Deum igitur sapientissimum esse certissimum est. §. 563.

§. 565.

Ufus rerum sunt fines div.

In productione universi Deus tanquam finem intendit, ut unum esset propter alterum, §. 563. Ufus igitur, quem res sibi mutuo præstant, sunt fines a Deo intenti.

§. 566.

immo & ipsa rerum essentia,

Quoniam id, quo ens unum alteri prodest, ex ipsius essentia & natura consequitur, §. 155. quæ ex essentia & natura rerum materialium consequuntur, pro finibus à Deo intentis habentur, §. 565. *atque*

atque adeo ipsa rerum essentia & natura est medium, quo Deus finem consequitur. §. 96.

§. 567.

Nec obscure hinc ulterius colligitur, ipsum rerum artificialium usum ab artifice inventore non intentum respectu Dei pro fine haberi.

Artificialium quoque usum.

§. 568.

Cum perfectio universi, quæ ex essentia & natura rerum resultat sit medium illius finis, quem Deus tanquam ultimum & principalem, §. 101. 100. intendit, §. 562. finis hic non in universo, sed extra ipsum in Deo quærendus tanquam in ente a mundo diverso. §. 539. Enim vero, quoniam Deus ab alio ente prorsus independens est, §. 532. ex productione universi nihil in ipsum redundare valet, quod antea non habebat. Quamobrem nihil remanet, quam ut creaturæ rationali manifestetur per universi perfectionem ipsa Autoris perfectio. Dubio itaque caret, Deum hanc perfectio-

Finis mundi manifestatio gloria div.

Q 4 nis

nis suæ manifestationem intendisse. Atque idem est, quod vulgo dicitur, *Deum produxisse mundum ad ad manifestandam gloriam suam.*

§. 569.

*Creatura
specula per-
fectionum
div.*

Fecit Deus mundum omniaque quæ in ipso sunt, ut exinde ipsius perfectionem agnoscamus. §. 568. Res igitur in universo perfectiones divinas repræsentant, ita ut ex iis, quæ in ipsis deprehendimus, ad perfectiones divinas argumentari liceat: id quod experientiæ consentaneum. *Atque ideo creaturæ non incongrue Specula perfectionum divinarum dicuntur.*

§. 570.

*Deus opti-
mum elegit
mundum,*

Sapientis est eligere media fini convenientia. Deus est sapientissimus, §. 563. ipsius igitur est, eligere media fini convenientissima, hoc est, ea, quibus finis ab ipso intentus omnium optime obtinetur. Eum igitur eligit mundum, cujus perfectione omnium optime sua perfectio manifestatur. §. 568. Quo-

Quoniam itaque mundus perfectissimus, aut, si mavis, optimus omnium possibilium magis patefacit Numinis perfectionem, quam imperfectior; perfectissimum omnino, seu optimum elegisse mundum dicendus est. *Optimus* nimirum dicitur *mundus*, qui fini, ob quem factus est, convenientissimus, consequenter in quo plurimum perfectionis,

§. 571.

Sapientis est, nil facere frustra & *nil facit frustra,*
ad scopum via brevissima tendere.

§. 521. Deus igitur ens sapientissimus, §. 563. nil frustra facit, & brevissima ad scopum via tendit.

§. 572.

Quoniam leges motus non absolute necessariae sunt, §. 185. Deus easdem constituit fini suo convenienter, §. 568. Cum adeo sapientiam summi Numinis summam testari debeant, §. 563. 568. Natura quoque, quæ ad leges istas operatur, nil facit frustra, viaque ad scopum brevissima tendit. §.

§. 573.

*Utrum
summa sa-
pientia Li-
bertati op-
ceat?*

Quæri solet, *utrum hæc summa Numinis sapientia non præjudicet Libertati?* Si intelligas, quomodo demonstrari queat summa sapientia, intelliges simul, illam concordare libertati entis perfectissimi.

CAP. IV.

De Voluntate divina & Attributis cum ea connexis.

§. 574.

*Voluntas
Dei perfe-
ctissima.*

DEus hunc mundum elegit propterea quod optimus, §. 570. fertur adeo voluntas ipsius in optimum, §. cit. consequenter *omnium perfectissima*, cum vi regulæ appetitus §. 373. perfectio voluntatis æstimari nequeat, nisi ex motivis, §. 374.

§. 575.

*Opt. mun-
dus non offi-
cis libertati.*

Neque vero verendum est, *in Deo tolli libertatem*, si optimum mundum imperfectioribus prætulisse statuatur. Optimum enim ideo elegit, quod cum fini suo ceteris

teris convenientiorem deprehenderit, §. 570. Quis vero dixerit, violari libertatem, propterea *quod media præferamus*, quæ scopo nostro magis satisfaciunt ceteris, quæ minus apta intelligimus?

§. 576.

Produxit Deus mundum, ut gloriam suam manifestaret creaturæ rationali, §. 568. Enimvero quæ propter finem fiunt, sub hypothese finis consequendi, adeoque *hypothetica tantum necessitate* fiunt. §. 28. quæ uti contingentiae actionis §. 29. ita nec *libertati* officit.

§. 577.

Possibilitas determinandi actum possibilis dicitur *potentia activa*. Quoniam igitur Deus actum universi per intellectum ipsius possibilis determinavit, §. 545. 547. *potentia activa gaudet*, quæ vulgo simpliciter *Potentia* appellari consuevit.

§. 578.

Quoniam Deus mundum perfectissimum ad actum deducere potuit,

tuit, nulla obstat ratio, cur ejus potentia non suffecisset ceteris mundis minus perfectis producendis. Sed omnes mundi simul omnia possibilia comprehendunt: *Dei igitur potentia ad omnia possibilia extenditur*, atque ideo Deus dicitur, *Omnipotens*, & potentia ejus *omnipotentia* salutatur. Impossibilia vero ab omnipotentia divina excluduntur.

§. 579.

*Potentia
Dei est maxima.*

Cum major potentia omnem conceptum eludat, quam quæ ad actuanda omnia possibilia sufficit, *potentia Dei est maxima.*

§. 580.

*Mundi productio non
est absol. necess.*

Deus omnes mundos posibles producere valet, §. 578. non tamen nisi unicum producit, §. 547. *hujus igitur productio non absolutæ necessitatis est.* §. 26.

§. 581.

*Indifferentia exerci-
tiii.*

Dum itaque hunc mundum producit, potentiam habet producendi

di alium quemcunque, §. 579. adeoque absolute non repugnat, ut hunc mundum non producat. Gaudet itaque Deus *indifferentia exercitii*.

§. 582.

In voluntate Numinis habetur ratio, cur hic potius mundus, quam alius actum fuerit consecutus, §. 574. Actus igitur rerum a voluntate divina pendet, seu, quod perinde est, *voluntas divina est fons actualitatis*.

§. 583.

Potentia Dei ad actuanda omnia possibile sufficit, §. 578. Voluntas vero divina non fertur in impossibilia, sed in possibile optimum, §. 574. Potest adeo Deus *facere quaecunque vult*.

§. 584.

Deus elegit mundum perfectissimum; Quamobrem fieri nequit, ut quæ eidem contrariantur, velit. Quoniam tamen totius universi perfectionem minime comprehendimus,

*Voluntas
div. fons
actualita-
tis.*

*Potest Deus
quaecunque
vult.*

*Voluntas
Dei ex par-
te difficulter
noscitur.*

dimus, §. 222. ex parte autem judicaturi facile a veritate aberrare queamus, §. 223. *difficulter hac ratione innotescit, quænam Deus velit.*

§. 585.

Sed a priori,

Quoniam Deus ob propriam perfectionem non vult, §. 570. quæ universi perfectioni contrariantur; denuo fieri nequit, ut velit, quæ perfectionibus suis repugnent. Hac igitur ratione *a priori innotescit subinde, utrum Deus aliquid velit, nec ne?*

§. 586.

& a posteriori.

Cum voluntas divina sit fons actualitatis, §. 582. si ad ea attendimus, quæ in universo actuantur, *a posteriori cognoscere licet, quæ Deus velit.*

§. 587.

Criteria revelationis.

Denique voluntas divina innotescit *per revelationem immediatam*, cujus hæc notentur *criteria*, ne supposititiam pro vera amplectamur. Nimirum

i. Cum

1. Cum Deus vi sapientiæ suæ nihil faciat frustra; revelatio divina talia contineat necesse est, quæ homines ut scitu necessaria, *recto rationis usu* assequi nequeunt.

2. Nec quod Deus revelavit, perfectionibus ipsius contrariari potest. Quamobrem *contradictoriis in ea locus non est*, quia talis revelatio omniscientiæ ipsius repugnat.

3. Cum etiam veritates naturales a Deo auctore sint, ob præcedentem rationem *veritas revelata contradicere nequit naturali*, nisi quatenus contingentis contrarium per miraculum efficitur.

4. Denique nec revelatio *præcipere* potest, quæ legi naturali ac naturæ animæ repugnant.

CAP. V.

De Operibus Divinis.

§. 588.

Voluntas Dei de universo ad *Decretum Dei* actum producendo *Decretum Dei* adpellatur.

§. 589.

§. 589.

*de Mundi
aeternitate,*

Cum Deus libere elegerit hoc universum, eique actum impertitus, dubio caret, *quod ejus actum decreverit.* §. 588.

§. 590.

*ad omnia se
extendit.*

Per universum intelligimus integram rerum seriem, sive simul existant, sive se invicem sequantur, ita ut nec ea excludamus, quæ Deus per miraculum, aut alio, si quis datur, extraordinario modo producit, naturaliter non secutura, ob rationes mox clarius exponendas. *Decretum igitur Dei ad omnia extenditur*, quatenus in actum eorum influat necesse est: id quod jam dilucidius inquiremus, quantum per principia rationis nobis cognita licet. Uberius enim ex revelato lumine talia hauriuntur.

§. 591.

*Decretum
est unicum,*

Omnis igitur rerum series cum instar entis unius spectari debeat, Deus autem qui possibilia in Systemata

mata redegit, vi sapientiæ suæ illam *ens unum* fecerit : *Decretum quoque Dei in se unicum est*, etsi nostro concipiendi modo in plura partiri idem liceat.

§. 592.

Futuritio itaque rerum a decreto ^{futuritia rerum in eo,} divino pendet, hoc est a decreto *divino habent entia finita, ut certo existant.*

§. 593.

Est enim decretum divinum *immutabile*, cum ratio nulla adsit, cur mutari debeat. Vi omniscientiæ suæ intime perspicit omnia, ut ejus de perfectione universi judicium semper idem maneat, consequenter nec ejus voluntas §. 574. adeoque *nec decretum mutari possit.* §. 588. ^{& est immutabile.}

§. 594.

Deus igitur unico actu decernit ^{Corol.} omnia. In Decreto autem illo comprehenduntur præterita, præsentia & futura omnia, non genericè solum, sed specificè & individualiter. R §. 595.

§. 595.

*Creatio
quid? cuius*

Deus Decretum suum executurus mundo, qui in ipsius intellectu idealiter latebat, existentiam impertitus est, ipsis etiam Elementis. §. 537. Mundum adeo a potentia ad actum traduxit, cum nihil ejus extra intellectum divinum apparet: quæ ex non apparentibus productio vulgo *productio ex nihilo*, atque uno nomine *Creatio* salutatur.

§. 596.

*Continuatio
est*

Virtute propria existentia necessaria est attributum entis a se. Sed attributa sunt incommunicabilia §. 19. adeoque fieri nequit, ut mundus & quæ in ipso sunt propria virtute existant. §. 536. consequenter *Deus actum creaturæ* ita determinare non potuit, ut eundem propria virtute continuaret. §. 578.

§. 597.

Conservatio

Necesse igitur est, ut Deus continuet actionem, qua mundo & iis quæ in ipso sunt, existentiam largitur, quæque *Conservatio* dicitur.

tur. Unde simul intelligitur, cur Conservatio continuata Creatio dicatur. §. 595.

§. 598.

In omni ente finito distinguitur *Substantiale*, seu id, quod perdurat, a limitationibus ejusdem. Limitationes arguunt defectum ulterioris entitatis, nec indigent conservatione. Si enim *substantiali limitato actum largitur Deus*, limitationes una adsunt. *Limitationes non est necessarium.*

§. 599.

Quod ergo a *substantiali profluit*, Deo auctori tribuendum: quod vero ex limitationibus resultat, creaturae proprium est, cum limitationes essentis rerum adhæreant, quatenus idealiter in intellectu divino continentur adeoque non vi decreti inferuntur. §. 588. *earum consequentia non est decreto.*

§. 600.

Deus positivo suo influxu conservat, id quod reale est, & substantiale. Limitationes, & pendentes exinde modificationes rerum *Explic.*

rum peculiari influxu conservatio non indigent.

§. 601.

Causa mali. Mala ex limitationibus resultant, v. gr. ob finitudinem intellectus homo errat, ut malum pro bono amplectatur, §. 375. sunt adeo creaturæ propria, *nec Deus ullo modo causa mali dici potest.* §. 599.

§. 602.

Continuatio.

Nimirum Deus conservat creaturam & vim ipsius activam, §. 597. 600. regulasque præscribit, ad quas operatur, vi nempe corporum *leges motus*, vi animarum *leges Logico-morales*. Sed ob limitationes essentiae fieri potest, ut creatura juxta illas regulas operans a veri tramite deflectat, cujus rei exemplum inodo dedimus. §. 601.

§. 603.

Permissio mali.

Quoniam tamen Deus creaturam creat atque conservat, §. 595. 597. quæ ob limitationes originales essentiae juxta leges naturæ latas aberrat, §. 602. *quod malum permittat patet.* §. 604.

§. 604.

Deus mundum hunc elegit, *Ratio per-*
propterea quod optimus, hoc est, *missionis.*
fini, ob quem eundem fecit, con-
venientissimus, §. 570. Experien-
tia autem loquitur, dari in hoc
mundo etiam mala tam *physica*,
quam *moralia*. Unde perspicuum
est, in optimo etiam mundo, qui
scilicet in ceteris fini a Deo intento
convenientior, quam alius, malis
physicis atque moralibus locum
esse, ut adeo Deus mala permittat,
quatenus in idea mundi cetero-
quin optimi includuntur. *Per-*
mittuntur mala hac ratione, ne bo-
num una impediatur.

§. 605.

Quod si dicas, ecurr Deus non *Nullus mi-*
per miraculum impediat mala, *raculo lo-*
haud difficilis est responsio. Cum *cus.*
enim mala ex limitationibus essen-
tiarum resultent, §. 601. si Deus
creaturas producit, permittere
utique debet, quæ ab ipsis fiunt.
Nimirum fieri nequit, *ut Deus*

R 3 aliquid

aliquid velit, & idem simul non velit;
consequenter ut velit creaturam
limitatæ virtutis existere, nec ta-
men ut eidem convenienter agat.

§. 606.

*directio ma-
li ad bonos
fines.*

Quoniam tamen mundum
hunc eligit, quatenus ceteris per-
fectior, non intuitu mali, quod
approbare nequit; quod suum est
agit, atque malum, quod creatu-
ræ culpa in mundum irrepit, *ad
bonos fines dirigit* vi sapientiæ sum-
mæ, cujus rei luculenta exempla
experientia suppeditat.

§. 607.

*Vanitas
quarundam
objectionum.*

Qui sumunt, quod probare ne-
sciunt, fieri potuisse universum,
ex quo omne malum exulasset, hoc
universum futurum fuisse perfe-
ctius eo, quod existit, vel univer-
sum idem adhuc perstiturum fuis-
se, etiamsi Deus alios homines,
nempe natura sua sub iis circum-
stantiis illabiles, sub quibus huma-
num genus peccavit, produxisset;
*difficultates circa permissionem mali
absque ratione facessunt.* §.

§. 608.

Ceterum quando §. 601. asserimus, malum ex limitationibus originariis creaturarum resultare, *de possibilitate nos loqui manifestum est. Veritas historica*, qua hæc possibilitas ad actum deducta ex revelatione petenda est. *actualitas mali ex revelatione.*

§. 609.

Nulla autem difficultas premit originem mali possibilem, si rem curatius expendas. Cur enim *Deus, omnis mali expers?* nonne ideo, quia *omniscius*, & *sapientissimus*, in dijudicando bono non aberrat? ergo e contrario, *cur homo appetit mala?* nonne quod *bona appareant?* Cur mala apparent bona? nonne propterea, quod *ex notionibus confusis sensuum & imaginationis* judicat? Quis vero nescit cognitionem confusam finitudini seu limitationibus facultatis cognoscitivæ originariis *deberi?* cum ideo in Deum, cujus intellectus infinitus limitationes respuit, non cadat.

R 4

§. 610.

§. 610.

*Miracula
cedunt cau-
sis secundis.*

Quoniam Deus per causas finales, quibus efficientes in universo connectuntur, sapientiam suam manifestat, §. 564. fini ultimo convenienter, §. 568. quæ per causas secundas, hoc est, efficientes finitas consequi potest, *per miraculum non efficit*, etsi possibile in omni casu; cum in eo casu non nisi *potentiam Dei* loqueretur, effectu naturali de omniscientia, sapientia, omnipotentia testante, §. 548. 547.

§. 611.

*is cessanti-
bus succo-
dunt.*

Enim vero si quid ex causarum secundarum nexu seu ordine resultare nequeat, quod intendit Deus; quin *miraculo* utatur ad finem consequendum, *sapientiæ* est: atque hoc in casu perinde ac effectus naturalis de *omniscientia*, *sapientia*, *omnipotentia Dei una testantur*, §. 570.

§. 612.

An verò ad istiusmodi effectus
pro-

producendos quales ordinarie a causis secundis producuntur, Deus tanquam causa prima *in solum usum naturæ miraculis utatur*, an vero eadem *soli gratiæ usui* destinaret, ex altiori lumine, revelatione nempe divina decidendum relinquimus.

§. 613.

Ceterum quæ de operibus divinis dicta sunt ex *revelato lumine* plenius illustrantur.

CAP. VI.

De Attributis Divinis, quæ per Antecedentia demonstrantur.

§. 614.

Cum Deus mundum perfectissimum creavit, §. 570. malæque permittit, §. 608. ad bonos fines dirigit, §. 611. *unicuique creaturæ tantum perfectionis tribuit atque boni, quantum ipsi tribui potest.* Quamobrem cum Bonitas dicat pronitatem ad alterius perfe-

Deus summe bonus.

R 5 ctionem

tionem promovendam, notioni boni conformiter: *Deus est summe bonus erga creaturas.*

§. 615.

Vanitas objectionum.

Quibus *scrupuli* circa bonitatem divinam suboriuntur, illi non attendunt, quid ferat finitudo rerum, se suaque extra nexum cum rebus aliis considerant, mala a Deo exterminanda esse vel per miraculum somniant, nec eadem creaturæ culpa unice oriri perpendunt, immo pro malis subinde habent, *quæ talia non sunt.*

§. 616.

Deus est infinitus.

Deus se ipsum & omnia possibilia cognoscit, §. 547. Voluntas vero in cognitum fertur, §. 374. intellectus itaque & voluntas in Deo insunt *non per modum potentiæ, sed per modum actus*, ita ut omnia actu cognoscat, quæ cognoscere potest, actu velit, quæ libere velle potest. *Deus est ens infinitum seu illimitatum.*

§. 617.

§. 617.

Ob infinitudinem idem est *immutabilis*. Ponamus enim aliquid *immutabilis* in Deo mutari, erit itaque in eo, quod ante non inerat. Ergo quædam in Deo sunt per modum potentia; id quod *infinitudini* repugnat. §. 78.

§. 618.

Quoniam Deus immutabilis, §. 622. nulla in ipso datur *successio*, consequenter Deus non existit in tempore, nec in ipso præteritum, præsens & futurum distinguuntur, sed *omnia semper præsentia* sunt. *non existit in tempore.*

§. 619.

Anima habet intellectum, & voluntatem *liberam*; Deus quoque habet intellectum & voluntatem *liberam*; caret autem sensu & imaginatione, quibus homo præterea præditus. Intercedit itaque aliqua similitudo inter partem animæ superiorem atque Deum. Enim vero cum intellectus hominis sit valde limitatus, Dei autem infinitus, *Omnia universa sibi representat.*

tus, ea intercedit differentia, quæ inter finitum & infinitum locum habet. Idem alia adhuc ratione evincitur. Homo habet vim repræsentativam universi valde limitatam, Deus vero vim omnium universorum possibilium prorsus illimitatam. §. 547.

§. 620.

Via eminentia.

Patet hinc modus, quomodo ad notiones perfectionum divinarum perveniamus. Cum mens sibi suarum perfectionum sit conscia, eo ipso earundem notiones habet. Quodsi ergo limitationes separentur, ut finitum degeneret in infinitum seu illimitatum, perfectiones prodeunt divinæ. Quamobrem cum ex unica vi animæ universi repræsentativa animæ perfectiones a priori deduxerimus in Psychologia Rationali; qui ad hanc attendit, haud difficulter perspiciet, quod ex adæquata repræsentatione omnium universorum possibilium in Deo, supposita unius actualitate, attributa divina deduci queant.

Immo

Immo nec alia ratione nos eadem
in antecedentibus deduximus.

§. 621.

Deus caret cognitione confusa, *Deus caret*
§. 548. adeoque & appetitu sensi- *affectu.*
tivo & aversione sensitiva, §. 339.
consequenter *affectibus*, §. 345.

§. 622.

Cum per antecedentia constet, *Deus est*
in unico ente a se contineri ratio- *unicus.*
nem sufficientem contingentiae hu-
jus universi; *unicum quoque dari*
Deum liquet, Dii vero plures præ-
ter rationem finguntur.

§. 623.

Paganismus, qui plures Deos im- *Pagani-*
perfectionibus præditos admittit, *smus unde ?*
inde ortum traxit, quod mundus
non fuit agnitus *tanquam ens*
unum, ob non perspectum rerum
omnium nexum per causas effici-
entes atque finales, §. 122.

§. 624.

Ex bonitate secundum leges sa- *Deus est in-*
pientiae attemperata enascitur *justissimus.*
Justitia. Ita ex. gr. Magistratus per
bonitatem fertur in salutem omni-
um

um civium; sed ne id fiat cum detrimento universitatis, vi sapientiæ in eos severe animadvertit, qui officio suo defunt. Atque ita se probat *justum*, quatenus bonitatem ad sapientiæ leges attemperat. Deus equidem summe bonus est, §. 619. sed idem sapientissimus, §. 564. Cum igitur non velit, quæ perfectionibus suis repugnant, §. 585. quin bonitatem suam secundum leges sapientiæ attemperet, consequenter justus sit, dubitandum non est. Immo cum & bonitatis & sapientiæ summum possideat gradum *Justissimus* est.

§. 625.

*Summa
gaudet vo-
luptate.*

Ex perfectionis intuitu oritur *Voluptas*, §. 329. Deus se ipsum cognoscens summam sui ipsius perfectionem intuetur, una cum omni perfectione possibili, quæ in entia finita cadit. §. 547. *Summa igitur voluptate gaudet.* §. 329.

§. 626.

*Beatitudo
Dei.*

Quoniam Deus immutabilis, §. 622. summa perfectione constanter

ter fruitur. Et quia independens,
§. 532. a nullo alio ente in illius
fruitione turbari potest. Atque
hæc non impedita summæ perfe-
ctionis possessio *Beatitudinem Dei*
constituit; quam esse absolute
summam & *creaturæ*, utpote per
essentiam limitatæ, *incommunica-*
bilem evidens est.



Definitiones Præcipuæ per omnia Capita Metaphysicæ.

Definitiones Ontologicæ.

1. *Quid est Philosophia?*

Philosophia est scientia rationes atque causas re-
rum, quæ sunt atque fiunt, cur & quomodo
ita potius sint atque fiant, & non aliter, ex
principiis indubitatis demonstrandi. §. 1.

2. *Quid est Philosophus?*

Philosophus ille dicendus est, qui habitum possi-
det, causas & rationes rerum, quæ sunt at-
que fiunt ex principiis indubitatis demonstan-
di. §. 1.

3. *Quid est Ontologia?*

Ontologia est scientia Entis in genere. §. 2.

4. *Quid est Cosmologia?*

Cosmologia est scientia, quæ agit de Mundo ge-
neratim spectato. §. 2.

5. *Quid*

5. *Quid est Pſychologia?*

Pſychologia eſt ſcientia de Anima, iſque quæ in Anima contingunt. §. 2.

6. *Quid eſt Theologia Naturalis?*

Theologia Naturalis eſt diſciplina, quæ ea tradit, quæ ductu rectæ rationis cognosci de Deo poſſunt. §. 2.

7. *Quid eſt Metaphyſica?*

Ontologia, Cosmologia, Pſychologia & Theologia Naturalis uno nomine dicuntur *Metaphyſica*. vel:

Metaphyſica eſt ſcientia de Deo, Anima, Mundo, & entibus in genere ſpectatis. §. 3.

8. *Quomodo exprimitur ſummum Principium Cognoscendi Subjectivum?*

Quidquid cogitari vel concipi non poteſt, illud etiam non eſt. vel plenius:

Quidquid cogitari vel concipi ut poſſibile non poteſt, illud etiam non eſt poſſibile; & quidquid cogitari vel concipi non poteſt ut exiſtens, illud etiam non eſt exiſtens. §. 4.

9. *Quid eſt poſſibile? quid impoſſibile?*

Poſſibile eſt, quod cogitari, vel concipi poteſt; *impoſſibile*, quod non poteſt. §. 5.

10. *Quid eſt Contradictio?*

Contradictio eſt ſimultanea ejuſdem de eodem affirmatio & negatio. §. 6.

11. *Quomodo effertur Principium contradictionis?*

Nibil poteſt ſimul eſſe, & non eſſe.

12. *Quid eſt Ratio?*

Ratio eſt id, ex quo intelligi poteſt, quare alterum ſit. vel:

vel:

Ratio est id, quod responsionem præstat intelligibilem ad quæstionem, quare res sit, sit potius, quam non sit, sit hoc modo, non alio, §. 8.

13. *Quid est ratio sufficiens?*

Ratio sufficiens illa est, quousque nihil est in re, quod non ex ea ratione intelligi possit, quare sit. §. 8.

14. *Quomodo exprimitur Principium Rationis Sufficientis?*

Nihil est sine Ratione sufficiente. §. 7.

15. *Quid est Ens?*

Ens est, quidquid cogitari potest. §. 10.

16. *Quid est Non-Ens?*

Non-Ens est, quod primo quidem obtutu cogitari posse videtur, penitus autem consideratum nullam admittit cogitationem. §. 10.

17. *Quid est Existentia?*

Existentia est ille status entis, quo aptum est ad agendum vel patiendum. §. 11.

18. *Quid est Ens Rationis?*

Ens Rationis est, quod nullam habet existentiam, nisi in mente nostra. §. 11.

19. *Quid est Ens Actuale?*

Possibile, quod habet existentiam, dicitur *Actuale*. §. 13.

20. *Quid est Ens Potentiale?*

Ens Potentiale est Ens, quod non habet existentiam, ad alia tamen relatum in iis habere potest rationem sufficientem existentia. §. 13.

—S

21. *Quid*

21. *Quid est Essentia?*

Essentia dicitur primus rei conceptus, qui per ea constituitur, quæ sibi non repugnant, sed tamen se non determinant; qui adeo rationem continet omnium, quæ vel actu enti insunt, vel eidem inesse possunt. §. 16.

22. *Quid sunt Attributa seu Proprietates?*

Attributa seu Proprietates dicuntur illa, quæ Enti conveniunt, & sui rationem habent in sola Essentia. §. 17.

23. *Quid sunt Modi?*

Modi dicuntur illa, quæ enti conveniunt, sed rationem in sola essentia sufficientem non reperiunt. §. 17.

24. *Quid intelligitur per Unitatem Entis?*

Unitas Entis dicitur inseparabilitas eorum per quæ Ens in esse suo determinatur. §. 19.

25. *Quid sunt eadem?*

Eadem sunt, quæ sibi invicem possunt substitui, ita ut facta substitutione nulla prodeat mutatio. §. 20.

26. *Quid sunt Diversa?*

Diversa sunt, quorum unum continet aliquid, quod non est in altero; seu quorum substitutio mutationem producit. §. 20.

27. *Quid est Nota Characteristica?*

Nota Characteristica est id omne, ex quo res aliqua cognoscitur, & a reliquis distinguitur. §. 21.

28. *Quid sunt Similia?*

Similia dicuntur, quæ easdem habent notas characteristicas? §. 21.

29. *Quid sunt Dissimilia?*

Dissimilia sunt, quæ diversas habent notas characteristicas. §. 21.

30. *Quid*

30. *Quid sunt Æqualia?*

Æqualia sunt, quæ eandem habent quantitatem.
§. 21.

31. *Quid sunt Inæqualia?*

Inæqualia sunt, quæ diversam habent quantitatem. §. 21.

32. *Quid sunt Partes?*

Partes dicuntur, quæ simul sumta constituunt unum aliquod Ens. §. 22.

33. *Quid est Totum?*

Totum dicitur ens, quatenus partibus constat.
§. 22.

34. *Ita Totum consideratur in oppositione ad partem; Quid est autem Totum in oppositione ad mutilum?*

Totum in oppositione ad mutilum, est id, quod constat partibus sibi debitis. §. 22.

35. *Quid est Totum Universale?*

Genus respectu plurium specierum; & *Species* respectu plurium Individuorum adpellantur *Totum Universale*. §. 22.

36. *Quid est Totum Integræle?*

Quando corpora plura & diversa componunt unum aliquod corpus, illud unum corpus adpellatur *Totum Integræle*. §. 22.

37. *Quid est Totum Similare seu Homogeneum?*

Totum Similare seu Homogeneum est id, cujus partes sunt ejusdem naturæ cum Toto. §. 22.

38. *Quid est Totum Dissimilare seu Heterogeneum?*

Totum Dissimilare seu Heterogeneum est, quod habet partes diversæ naturæ cum Toto. §. 22.

39. *Quid sunt Opposita?*

Opposita dicuntur, quorum unum involvit negationem alterius. §. 25.

40. *Quid sunt Contrarie Opposita?*

Contrarie opposita sunt, quæ eidem enti simul inesse non possunt. §. 25.

41. *Quid sunt contradictorie Opposita?*

Contradictorie Opposita sunt, quæ simul esse non possunt. §. 25.

42. *Quid est Necessarium?*

Necessarium est, cujus *Oppositum* involvit contradictionem. §. 26.

43. *Quid est Contingens?*

Contingens est, cujus oppositum est possibile; seu nullam involvit contradictionem. §. 26.

44. *Quid est hypothetice Necessarium?*

Cujus oppositum in hypothesi aliqua data est impossibile, vel contradictionem involvit. §. 28.

45. *Quid est Ordo?*

Ordo est similitudo obvia in modo, quo res juxta se invicem collocantur, vel se invicem insequuntur. §. 32.

46. *Quid est Veritas?*

Veritas est ordo eorum, quæ Enti conveniunt. §. 34.

47. *Quid est Perfectio?*

Perfectio est, si in varietate rerum fuerit consensus, ita ut singula ex rationibus generalibus iisdem determinantur. §. 35.

48. *Quid est Perfectio Simplex?*

Si una fuerit ratio determinans generalis, in quam ceteræ resolvuntur, *Perfectio* est *Simplex*. §. 36.

49. *Quid*

49. *Quid est Perfectio Composita?*

Si plures fuerint rationes determinantes generales, in quas ceteræ resolvuntur, Perfectio est Composita. §. 36.

50. *Quid est Ens Simplex?*

Ens Simplex est, quod caret partibus. §. 67.

51. *Quid est Ens Compositum?*

Ens compositum dicitur, quod ex pluribus a se invicem distinctis constat partibus. §. 44.

52. *Quid est Extensum?*

Si multa a se invicem distincta tanquam in uno nobis repræsentamus, Ens Extensum concipimus. §. 49.

53. *Quid est Continuum?*

Si in extenso partes eo ordine juxta se invicem collocantur, ut aliæ inter ipsas ordine alio interponi nequeant, compositum dicitur Continuum. §. 50.

54. *Quid est Spatium?*

Spatium est ordo rerum simultanearum. §. 52.

55. *Quid est Locus?*

Locus est determinatus ceteris coëxistendi modus. §. 52.

56. *Quid est Tempus?*

Tempus est ordo rerum successivarum. §. 54.

57. *Quid est Motus?*

Motus est mutatio Loci. §. 58.

58. *Quid est Actio?*

Actio est mutatio status, cujus ratio continetur in ente, quod eundem mutat. §. 80.

59. *Quid est Passio?*

Passio est mutatio status, cujus ratio continetur extra ipsum Ens, cujus status mutatur. §. 80.

60. Quid est Potentia?

Nuda agendi possibilitas adpellatur Potentia. §. 81.

61. Quid est Vis seu Virtus?

Vis seu Virtus est conatus agendi. §. 81.

62. Quid est Substantia?

Substantia est ens agendi potentia præditum. §. 83.

63. Quid est Accidens?

Accidens est ens agendi potentia destitutum. §. 83.

64. Quid est Principium?

Principium est id, quod in se continet rationem alterius. §. 87.

65. Quid est Principiatum?

Principiatum est, quod rationem sui habet in altero. §. 87.

66. Quid est causa Efficiens?

Causa Efficiens dicitur id, cujus actio est ratio existentiae alterius. §. 88.

67. Quid est Effectus?

Effectus dicitur id, quod rationem existentiae suae habet in actione alterius. §. 88.

68. Quid est Finis?

Finis est id, cujus gratia causa efficiens operatur. §. 96.

69. Quid est Medium?

Medium est id, quod rationem continet, cur finis actum consequatur. §. 98.

70. Quid est Finis Principalis?

Finis, propter quem quis ita agit, ut, si nullum alium finem sibi haberet propositum, tamen ageret, Principalis adpellatur. §. 100.

71. Quid est Finis minus Principalis?

Finis minus Principalis est propter quem quis ita agit, ut, si nullum alium sibi haberet propositum, non ageret. §. 100.

Defi-

Definitiones Cosmologicae.

72. *Quid est Mundus?*

Mundus est congeries rerum mutabilium omnium cum simultanearum tum successivarum inter se connexarum. §. 116.

73. *Quæ dicuntur inter se connexa?*

Connexa inter se dicuntur, quorum unum continet rationem alterius, nempe cur alterum una existat, vel posterius sequatur prius. §. 119.

74. *Quid sunt Corpora?*

Corpora dicuntur entia composita, ex quibus tanquam partibus componitur *Mundus*. §. 143.

75. *Quid est Machina?*

Machina est ens compositum, cujus operationes ad regulas motus structuræ convenienter consequuntur. §. 124.

76. *Quid est Vis Inertiæ seu Passivæ?*

Vis Inertiæ seu Passivæ dicitur illud, quo corpus motui resistit. §. 146.

77. *Quid est Materia Corporis?*

Materia corporis dicitur extensum vi inertiæ præditum. §. 148.

78. *Quid est Vis Activæ corporum?*

Vis activa corpori tribuitur, quatenus in motu constitutum alterum quiescens movere potest. §. 149.

79. *Quid sunt Regulæ Motus?*

Regulæ Motus dicuntur illæ regulæ, juxta quas vis corporum tam activa, quam passiva in conflictu eorum modificatur. §. 158.

80. *Quid est Vis Elastica?*

Vis Elastica est ea vis, qua corpora compressa in statum pristinum restituuntur a vi compri-
mimente liberata. §. 172.

81. *Quid est Natura Corporum?*

Vis Activa corporum, unde actiones eorum pen-
dent, dicitur *Natura corporum*. §. 154.

82. *Quid est Naturale?*

Naturale dicitur id alicui, cujus ratio in essentia
& natura ejus continetur. §. 187.

83. *Quid est Supernaturale seu Miraculum?*

Supernaturale seu Miraculum dicitur id alicui,
cujus ratio in essentia & natura ejus non con-
tinetur. §. 187.

84. *Quid est Natura Cursus?*

Natura Cursus adpellatur eventuum essentia
corporum atque regulis motus conformis con-
secutio. §. 231.

85. *Quid sunt Elementa?*

Elementa dicuntur entia simplicia, unde compo-
sitorum partes ortum trahunt. Seu Composi-
torum principia dicuntur *Elementa*. §. 200.

Definitiones Psychologicae.

86. *Quid est Anima seu Mens?*

Anima seu Mens dicitur illud ens, quod in nobis
sui & aliarum rerum extra nos est conscium.
§. 248.

87. *Quid est Perceptio?*

Quatenus mens objectum sibi repraesentat, *Per-
ceptio* ei adscribitur. §. 251.

88. *Quid*

88. Quid est Adperceptio?

Quatenus anima perceptionis suæ sibi est conscia,
eatenus Adperceptio ipsi tribuitur. §. 251.

89. Quid est Sensatio?

Sensatio est perceptio, cujus ratio continetur in
organo corporis nostri. §. 264.

90. Quid est Organon Sensorium?

Organon Sensorium dicitur Organon corporis, in
quo ratio continetur sensationis. §. 264.

91. Quid est Imaginatio?

Imaginatio est facultas producendi perceptiones
rerum absentium. §. 271.

92. Quid est Memoria?

Memoria est facultas ideas reproductas reco-
gnoscendi, quod eadem sint, quas jam antea
habuimus. §. 281.

93. Quid est Intellectus?

Intellectus est facultas res distincte repræsentandi.
§. 294.

94. Quid est Experiri?

Quæ ad perceptiones nostras attenti cognosci-
mus, Experiri dicimur. §. 305.

95. Quid est Ingenium?

Ingenium adpellatur facilitas observandi rerum
similitudines. §. 321.

96. Quid est Ratio?

Ratio est facultas intuendi nexum Universalium.
§. 322.

97. Quid est Voluptas?

Voluptas oritur e sensu perfectionis, siue illa vera
fuerit, siue apparens tantum. §. 329.

98. Quid est Tedium?

Tedium oritur e sensu imperfectionis, siue illa
vera fuerit, siue apparens tantum. §. 333.

99. *Quid est Bonum?*

Quidquid nos statumque nostrum perfectiorem reddit, Bonum dicitur. §. 336.

100. *Quid est Malum?*

Quidquid nos statumque nostrum imperfectiorem reddit, Malum adpellatur. §. 336.

101. *Quid est Appetitus Sensitivus?*

Appetitus Sensitivus est inclinatio mentis ad objectum pro ratione boni confuse in eo percepti. §. 340.

102. *Quid est Aversatio Sensitiva?*

Aversatio Sensitiva est reclinatio mentis ab objecto pro ratione mali confuse in eo percepti. §. 341.

103. *Quid est Affectus?*

Affectus est appetitio, vel averfatio sensitiva vehementior. §. 345.

104. *Quid est Lætitia?*

Lætitia est prædominium insigne Voluptatum. §. 347.

105. *Quid est Tristitia?*

Tristitia est prædominium insigne Tædii. §. 348.

106. *Quid est Amor?*

Amor est dispositio mentis ex alterius felicitate voluptatem percipiendi. §. 349.

107. *Quid est Odium?*

Odium est dispositio animi ex alterius infelicitate Voluptatem percipiendi. §. 350.

108. *Quid est Invidia?*

Invidia est tædium ob felicitatem alterius. §. 352.

109. *Quid est Misericordia?*

Misericordia est tædium ob infelicitatem alterius. §. 353.

110. *Quid*

110. Quid est Acquiescentia in se ipso?

Acquiescentia in se ipso est lætitia ob bonum,
quod patravimus. §. 354.

111. Quid est Penitentia?

Penitentia e contrario est tristitia ob malum,
quod patravimus. §. 355.

112. Quid est Gloria?

Gloria est lætitia orta super bono a nobis patra-
to, quatenus ad aliorum opinionem refertur.
§. 356.

113. Quid est Pudor?

Pudor est tristitia orta ex malo a nobis patrato vel
patrando, quatenus ad aliorum opinionem
refertur. §. 357.

114. Quid est Gratitude?

Gratitude est amor in benefactorem ob præstita
nobis beneficia. §. 358.

115. Quid est Favor?

Favor est amor Personæ ob mores nobis acceptos.
§. 359.

116. Quid est Spes? Quid Fiducia?

Spes est Voluptas ex bono obtinendo percepta; si
prædominetur Voluptas seu in lætitiā dege-
neret, Fiduciæ nomen nanciscitur. §. 360.

117. Quid est Metus? quid Desperatio?

Metus est tædium ex malo imminente perceptum.
Desperatio autem tristitia intolerabilis super
malo imminente. §. 360.

118. Quid est Terror?

Nimia tristitia ex malo improvise percepta Ter-
ror dicitur. §. 362.

119.

119. *Quid est Vacillatio animi?*

Vacillatio animi est alternatio Voluptatis atque doloris super bono, quod an obtentu possibile sit reperire non possumus. §. 363.

120. *Quid est Pusillanimitas?*

Pusillanimitas est tristitia orta ex difficultate boni obtinendi. §. 364.

121. *Quid est Desiderium?*

Desiderium est tædium subortum ex mora boni obtinendi. §. 365.

122. *Quid est Ira?*

Ira est tædium insigne ortum ex injuria nobis vel aliis illata, conjunctum cum odio ejus, qui eam intulit. §. 366.

123. *Quid est Vigilare?*

Quando anima nostra in eo est statu, ut objecta externa in corporis organis sensoriiſ mutationem producant, & ipsa res extrinsecas clare vel distincte sentiat, tum dicitur vigilare. §. 433.

124. *Quid est dormire? quid somnus?*

Quando anima in eo versatur statu, ut nihil clare sentiat, nihilque clare imaginetur, tum dicimur dormire, & ille status dicitur somnus. §. 430.

125. *Quid est Somnium?*

Somnium est status intermedius inter Somnum atque vigilias. §. 433.

126. *Quid est Appetitus Rationalis seu Voluntas?*

Appetitus Rationalis seu Voluntas est inclinatio animæ ad objectum, pro ratione boni, quod in eo distincte cognoscere nobis videtur. §. 371.

127.

127. *Quid est Aversatio Rationalis seu
Noluntas?*

Aversatio Rationalis seu Noluntas est reclinatio
mentis ab objecto, pro ratione mali, quod in
eo distincte cognoscere nobis videmur. §. 372.

128. *Quid est Spontaneitas?*

Quatenus anima semetipsam determinat, neque,
principio determinandi externo habet opus,
catenus *Spontaneitas* ipsi tribuitur. §. 387.

129. *Quid est Libertas?*

Libertas est facultas animæ, ex pluribus possi-
bilibus sponte eligendi, quod ipsi maxime placet,
cum ad neutrum per naturam suam de-
terminata sit. §. 389.

130. *Quid est Persona?*

Ens quod memoriam sui habet; seu quod recor-
datur se antea in hoc istove statu fuisse, dici-
tur *Persona*. §. 502.

131. *Quid est Immortale?*

Immortale tum demum proprie dicitur ens, quod,
cum indestructibile sit, statum quoque Perso-
nalitatis servat. §. 503.

Definitiones à Theologia Naturali.

132. *Quid est Deus?*

Deus est ens simpliciter necessarium, idemque a
contingentibus distinctissimum. §. 534. 539.

vel:

Deus est illud ens, quod in se continet rationem
suffi-

sufficientem actus contingentium, Mundi scilicet, Elementorum atque animarum. §. 540.

133. *Quid est Spiritus?*

Spiritus est Substantia intellectu & voluntate libera prædita. §. 508.

134. *Quid est Spiritus perfectissimus?*

Spiritus perfectissimus est, qui intellectu perfectissimo & voluntate perfectissima gaudet. §. 515.

135. *Quid est Intellectus perfectissimus?*

Intellectus perfectissimus est, qui omnia possibilia distincte simul repræsentat. §. 516.

136. *Quid est Voluntas Perfectissima?*

Voluntas perfectissima est, quæ non appetit, nisi optimum. §. 517.

137. *Quid est ens independens?*

Independens dicitur *ens* ab alio, quatenus ejus, quod ipsi tribuitur, ratio extra ipsum in alio non continetur. §. 532.

138. *Quid est Præscientia divina?*

Quoniam Deus in unoquoque statu, quem tanquam præsentem considerat, simul intuetur futurum, quæ olim futura sunt, tanquam præsentia intuetur, & id adpellatur *Præscientia*. §. 553.

139. *Quid est Omniscientia divina?*

Omniscientia divina est distincta cognitio omnium omnino possibilibum æque ac actualium. §. 547.

140. *Quid est Potentia Activa?*

Possibilitas determinandi actum possibilis dicitur *Potentia Activa*. §. 577.

141. *Quid est Omnipotentia divina?*

Quatenus potentia Dei activa ad omnia omnino
possibilia extenditur, eatenus Deo tribuitur
Omnipotentia. §. 578.

142. *Quid est Sapientia divina?*

Sapientia divina seu summa Deo adscribitur, qua-
tenus viis brevissimis, seu mediis respective
paucissimis fines amplissimos plenissime con-
sequitur. §. 564. 571.

143. *Quid est Bonitas divina?*

Quatenus Deus unicuique creaturæ tantum per-
fectionis atque boni tribuit, quantum ipsi tri-
bui potest, eatenus Deo summa adscribitur.
Bonitas. §. 614.

144. *Quid est Actio divina?*

Actio divina est relatio divinarum virium, ad
aliquam existentiam, cujus rationem continet.

145. *Quid est Actio Dei ad intra?*

Actio Dei ad intra nuncupatur, cujus objectum
est ipsa Dei existentia.

146. *Quid est Actio Dei ad extra?*

Actio Dei ad extra nuncupatur, quæ in se conti-
net rationem rerum contingentium adeoque
extra Deum existentium.

147. *Quid est Creatio?*

Creatio est actio Dei ad extra, qua possibilia con-
tingentia ad actum traducuntur. §. 595.

148. *Quid est Conservatio?*

Conservatio est continuata creatio. §. 597.

149. *Quid est Decretum Dei?*

Voluntas Dei de universo ad actum perducendo
Decretum Dei adpellatur. §. 588.

150. *Quid est Justitia divina seu summa?*

Quatenus Deus & bonitatis & sapientiæ summum possidet gradum, eatenus ipsi summa adscribitur Justitia. §. 624.

151. *Quid est Infinitudo Dei?*

Infinitudo Dei est perfectionum omnino omnium sine gradu composibilitas. §. 616.

152. *Quid est Æternitas?*

Æternitas ex existentia, cui & initium & finis repugnat. §. 618.

153. *Quid est Beatitudo Dei?*

Beatitudo Dei est non impedita summæ perfectionis possessio. §. 626.

F I N I S.



005678652

